

বিভূতিভূষণ
বন্দ্যোপাধ্যায়

দুই বাড়ি .

বিভূতিভূষণ
বন্দ্যোপাধ্যায়

দুই বাড়ি

সিগনেট প্রেস
কলকাতা ২০



প্রথম সিগনেট সংস্করণ

প্রাচীন ১৩৫৯

প্রকাশক

দিলীপকুমার গুপ্ত

সিগনেট প্রেস

১০।২ এলগিন রোড

কলকাতা ২০

প্রচ্ছদপট

সত্যজিৎ রায়

সহায়তা করেছেন

শ্রীযু মিত্র

মুদ্রক

প্রভাতচন্দ্র রায়

ত্রিগোবিন্দ প্রেস

৫ চিত্তামণি দাস লেন

প্রচ্ছদপট মুদ্রক

গসেন এণ্ড কোম্পানি

৭।১ গ্রাউন্ড লেন

বাঁধিয়েছেন

বাসন্তী বাইপাস ওয়ার্কস

৬১।১ মির্জাপুর স্ট্রিট

সর্বস্ব সংরক্ষিত

দাম আড়াই টাকা.

দুই বাড়ি.



রামতারণ চৌধুরী সকালে উঠিয়া বড় ছেলে নিধুকে বলিলেন—নিধে, একবার হরি বাগ্‌দীর কাছে গিয়ে তাগাদা করে তখ দিকি। আজ কিছু না আনলে একেবারেই গোলমাল।

নিধুর বয়স পঁচিশ, এবার সে মোস্তারী পরীক্ষা দিয়া আসিয়াছে, সম্ভবত পাশও করিবে। বেশ লম্বা দোহারী গডন, রঙ খুব ফর্সা না হলেও তাহাকে এ পর্যন্ত কেউ কালো বলে নাই। নিধু কি একটা কাজ করিতেছিল, বাবার কথায় আসিয়া বলিল—সে আজ কিছু দিতে পারবে না।

—দিতে পারবে না তো আজ চলবে কি করে? তুমি বাপু একটা উপায় খুঁজে বাব কর, আমার মাথায় জো আসচে না।

—কোথায় যাব বলুন না বাবা? একটা উপায় আছে—ও পাড়ার গৌসাই-খুড়োর বাড়িতে গিয়ে ধার চেয়ে আনি না হয়—

—সেখানে বাবা আর গিয়ে কাজ নেই—তুমি একবার বিন্দুপিসীর বাড়ি যাও দিকি।

গ্রামের প্রান্তে গোয়ালপাড়া। বিন্দু গোয়ালিনীর ছোট্ট চালাঘরখানি গোয়ালপাড়ার একেবারে মাঝখানে। তাহার স্বামী কৃষ্ণ ঘোষ এ গ্রামের মধ্যে একজন অবস্থাপন্ন লোক ছিল—বাড়িতে সাত-আটটা গোলা, পুতুল প্রায় একশোর কাছাকাছি গরু ও মহিষ—কিছু তেজারতি কারবারও ছিল সেই সঙ্গে। ভূখের মধ্যে ছিল এই যে কৃষ্ণ ঘোষ নিঃসন্তান—অনেক পুজামানত করিয়াও আসলে কোনো ফল হয় নাই। সকলে বলে স্বামী মৃত্যুর পরে বিন্দুর হাতে প্রায় হাজার পাচেক টাকা পড়িয়াছিল।

বিন্দুর উঠানে দাঁড়াইয়া নিধু ডাকিল—ও পিসী, বাড়ি আছ ?

বিন্দু বাড়ির ভিতর বাসন মাজিতেছিল, ডাক শুনিয়া আসিয়া বলিল—কে গা? ও নিধু! কি ব্যা কি মনে করে ?

—বাবা পাঠিয়ে দিলে।

—কেন বাবা ?

—আজ খরচের বড় অভাব আমাদের। কিছু ধার না দিলে চলচে না পিসী। বিন্দু বিরক্তমুখে পিছন ফিরিয়া প্রশ্নানোদ্যত হইয়া বলিল—ধার নিয়ে বসে আছি তোমার সকালবেলা। গাঁয়ে শুধু ধার ছাও আর ধার ছাও—টাকাগুলো বারোভূতে দিয়ে না খাওয়ালে আমার আর চলছে না যে! হবে না বাপু, ফিরে যাও—

নিধু দেখিল এই বুড়িই অত্কাংক সংসার চলিবার একমাত্র ভরসা, এ যদি এভাবে মুখ ঘুরাইয়া চলিয়া যায়—তবে আজ সকলকে উপবাসে কাটাইতে হইবে। ইহাকে যাইতে দেওয়া হইবে না। নিধু ডাকিল—ও পিসী শোনো একটা কথা বলি।

—না বাপু, আমার এখন সময় নেই।

—একটা কথা শোনো না।

বিন্দু একটু থামিয়া অর্ধেকটা ফিরিয়া বলিল—কি বল না ?

—কিছু দিতে হবে পিসী। নইলে আজ বাড়িতে হাঁড়ি চড়বে না বাবা বলে দিয়েচে।

—হাঁড়ি চড়বে না তো আমি কি করব ? এত বড় বড় ছেলে বসে আছ

• চৌধুরী মশাইয়ের, টাকা-পয়সা আনতে পার না ? কি হলে হাঁড়ি চড়ে ?

—একটা টাকার কমে চড়বে না পিসী।

—টাকা দিতে পারব না। ধামা নিয়ে এস—দু'কাঠা চাল নিয়ে যাও।

—বা রে ! আর তেল-ছন মাছ-তরকারির পয়সা ?

—চাল জোটে না—মাছ-তরকারি। লজ্জা কর্তে না বলতে? চার-আনা পয়সা নিয়ে যাও আর দু'কাঠা চাল।

—যাকগে পিসী, দাও তুমি আট-আনা পয়সা আর চাল।

বিন্দু মুখ ভারি করিয়া বলিল—তোমাদের হাতে পড়লে কি আর ছাড়ান-কাড়ান আছে বাবা? যথাসর্বস্ব না শুবে নিয়ে এ গাঁয়ের লোক আমায় রেহাই দেবে কখনো? যাও তাই নিয়ে যাও—আমায় এখন ছেড়ে দাও যে ঝাঁচি।

নিধু হাসিয়া বলিল—তোমায় বেঁধে রাখিনি তো পিসী—টাকা ফেল—ছেড়ে দিচ্ছি।

বিন্দু সত্যিই বাড়ির ভিতর হইতে একটা টাকা আনিয়া নিধুর হাতে দিয়া বলিল—যাও, এখন ঘাড় থেকে নেমে যাও বাপু যে আমি ঝাঁচি—

নিধু হাসিয়া বলে—তা দরকার পড়লে আবার ঘাড়ে এসে চাপব বৈকি!

—আবার চাপলে দেখিয়ে দেব মল্ল। চেপে দেখ কি হয়—

নিধু বাড়ি আসিয়া বাবার হাতে টাকা দিয়া বলিল—বিন্দুপিসীর সঙ্গে এক-রকম ঝগড়া করে টাকা নিয়ে এলাম বাবা। এখন কি ব্যবস্থা করা যাবে?

পিতাপুত্রের কথা শেষ হয় নাই এমন সময় পথের মোড়ে গ্রামের ছহু জেলেকে মাছের ডালা মাথায় যাইতে দেখা গেল। রামতারণ হাঁক দিলেন—ও বাবা ছহু, শুনে যা—কি মাছ ও ছহু?

ছহু জেলে ইহাদের বাড়ির ত্রিসিম। ঘেঁষিয়া কখনো যায় না। সে বহুদিনের তিক্ত অভিজ্ঞতা দিয়া বুঝিয়াছে এ বাড়িতে ধার দিলে পয়সা পাইবার কোনো আশা নাই। আজ রামতারণের একেবারে সামনে পড়িয়া বড় বিব্রত হইয়া উঠিল। রামতারণ পুনর্বার হাঁক দিলেন—ও ছহু, শোনো বাবা—কি মাছ?

ছহু অগত্যা ঘাড় ফিরাইয়া এদিকে চাহিয়া বলিল—খয়রা মাছ—

—ঐদিকে এস, দিয়ে যাও—

গ্রামের মধ্যে ভদ্রলোকের সঙ্গে বেয়াদবি করা ছহুর সাহসে কুলাইল না, নগ্নতা মনের মধ্যে অনেক কড়া কথা রামতারণ চৌধুরীর বিরুদ্ধে জমা হইয়াছিল।

সে কাছে আসিয়া ডালা নামাইয়া কহিল—কতকের মাছ নেবেন?

—দাও আনা দুইয়ের—দেখি—বলিয়া রামতারণ চুপড়ির ভিতর হইতে নিজেই বড় বড় মাছ বাছিয়া তুলিতে লাগিলেন। ছহু বলিল—আর নেবেন না বাবু, দু-আনার মাছ হয়ে গিয়েচে—

—বলি ফাউ তো দিবি? দু-আনার মাছ একজায়গায় এক সঙ্গে নিচ্চি, ফাউ দিবিনে?

মাছ দিয়া ডালা তুলিতে তুলিতে ছহু বিনীতভাবে বলিল—বাবু, পয়সাটা? রামতারণ বিশ্বাসের স্বরে বলিলেন—সে কি রে? সকালবেলা নাইনি ধুইনি, এখন বাস্ত্র ছুঁয়ে পয়সা বার করব কি রে? তোর কি বুদ্ধিগুদ্ধি সব লোপ পেয়ে গেল রে ছহু?

ছহু মাথা চুলকাইতে চুলকাইতে বলিল—না, না, তা বলিনি বাবু, তবে আর দিনের পয়সাটা তো বাকি আছে কিনা। এই সবশুদ্ধু সাড়ে চার আনা পয়সা এই দুদিনের—আর ওদিকের দরুন ন'-আনা।

রামতারণ তাজিল্যের ভাবে ঘাড় নাড়িয়া বলিলেন—যা, এখন যা—ওসব হিসেবের সময় নয় এখন।

গ্রামের ভদ্রলোক বাসিন্দা যারা, তাঁরা চিরকাল এইভাবে গ্রামের নিম্ন-শ্রেণীর নিকট হইতে কখনো চোখ রাঙাইয়া কখনো মিষ্ট কথায় তুষ্ট করিয়া ধারে জিনিসপত্র খরিদ করিয়া চালাইয়া আসিতেছেন—ইহা এ গ্রামের সনাতন প্রথা। ইহার বিরুদ্ধে আপীল নাই। স্তব্রাং ছহু মুখ বুজিয়া চলিয়া যাইবে ইহাই নিশ্চিত, কিন্তু সন্ধ্যাবেলা রামতারণ চৌধুরী

কাছারীঝাড়ির ডাক পাইয়া তথায় উপস্থিত হইয়া বিশ্বয়ের সৃষ্টি দেখিলেন ছহু তাহার প্রাপ্য পয়সার জন্ত কাছারীতে নালিশ করিয়াছে। কাছারীর নায়েব দুর্গাচরণ হালদার—ব্রাহ্মণ, বাড়ি নদিয়া জেলায়। এই গ্রামের কাছারীতে আজ দশ-বারো বছর আছেন। নায়েবমহাশয়ের হাঁকডাক এদিকে খুব বেশি, সুবিবেচক বলিয়া তাঁহার খ্যাতি থাকায় জেলা কোর্টে আজ বছর কয়েক জুরি নির্বাচিত হইয়াছেন।

অজ্ঞ প্রজাদের কাছে তিনি গল্প করেন—বাপু হে, সাতদিন ধরে জেলায় ছিলাম—মস্ত বড় খুনী মামলা। আসামীর ফাঁসি হয় হয়, কেউ রদ করতে পারত না। আমি সব দিক শুনে ভেবে-চিন্তে বললাম, তা হয় না, এ লোক নির্দোষ। জজসাহেব বললেন, নায়েবমহাশয়ের কথা ঠিক, আমি আসামীকে খালাস দিলাম, এক কথায় খালাস হয়ে গেল—

রামতারণ কিছু বলিবার পূর্বেই নায়েবমহাশয় বলিলেন—চৌধুরীমশায়, এসব সামান্য জিনিস আমাদের কাছে আসে, এটা আমরা চাইনে। ছহু' বলছিল যে নাকি আপনার কাছে অনেকদিন থেকে মাছের পয়সা পাবে? রামতারণ গলা ঝাড়িয়া লইয়া বলিলেন—তা আমি কি দেব না বলেচি?

—না, তা বলেননি। কিন্তু ও বেচারাও তো গরিব, কতদিন ধার দিয়ে বসে থাকতে পারে? দু-একদিনের মধ্যে শেষ করে দিয়ে দিন। আচ্ছা, যা, ছহু তোর হয়ে গেল, তুই যা—

ছহু চলিয়া গেলে রামতারণ বলিলেন—দেব তো নিশ্চয়ই, তবে আজকাল একটু ইয়ে—একটু টানাটানি যাচ্ছে কিনা—

—সে আমার দেখবার দরকার নেই চৌধুরীমশায়। নালিশ করতে এসেছিল পয়সা পাবে, আমি নিষ্পত্তি করে দিলাম দুদিনের মধ্যে গুর পয়সা দিয়ে দেবেন—মিটে গেল।

—দুদিন নয়, এক হপ্তা সময় দিন নায়েবমশায়, এই সময়টা বড় খারাপ যাচ্ছে—

—কত পরস। পাবে? দাঁড়ান, সাড়ে-বারো আনা মোট বোধ হয়। এই নিন একটা টাকা—ওর দাম চুকিয়ে দিন। ও ছোটলোক, একটা কড়া কথা যদি বলে, ভদ্রলোকের মানটা কোথায় থাকে বলুন তো? ওর দেনা শোধ করুন, আমার দেনা আপনি যখন হয় শোধ করবেন।

রামতারণ হাঁপ ছাড়িয়া বাঁচিলেন। হঠাৎ তাঁহার মনে হইল নায়েব-মহাশয়কে তাঁহার সংসারের সব দুঃখ খুলিয়া বলেন। বলেন—নায়েবমশায় কি করব, বড় কষ্টে পড়েছি। দুবেলা খেতে অনেকগুলি পুষ্টি, বড় ছেলেটি সবে পাশ করেছে, এখনো কিছু রোজগার করে না। আমি বুড়ো হয়ে পড়েছি—জমিজমাও এমন কিছু নেই তা আপনি জানেন—যা সামান্য আছে তাতে সংসার চলে না। এই সব কারণে অনেক 'হীনতা স্বীকার করতে হয়, নইলে সংসার চলে না নায়েবমশায়—

মনে মনে এই কথাগুলি কল্পনা করিয়া রামতারণের চক্ষে জল আসিল। মুখে অবশ্য তিনি কিছু বলিতে পারিলেন না, নায়েবমহাশয়কে নমস্কার করিয়া চলিয়া আসিলেন।

এমন অপমান তিনি জীবনে কখনো হন নাই—শেষে কিনা জমিদারী-কাছারীতে ছয় জেলে তাঁহার নামে করিল নালিশ।

কালে কালে সবই সম্ভব হইয়া উঠিল—রামতারণের বাল্যকালে বা যৌবন-বয়সে গ্রামে এরূপ একটি ব্যাপার সম্ভবই ছিল না। সে দিন আর নাই।



নিধু পিতার পদূলি লইয়া বলিল—তাহলে যাই বাবা—

রামতারণের চোখে জল আসিল। বলিলেন—এস বাবা, সাবধানে থেক।
যা তা খেও না—আমি যত্নবাবুকে লিখে দিলাম তিনি তোমাকে দেখিয়ে-
টেখিয়ে দেবেন, স্বলুক-সন্ধান দেবেন। অত বড়লোক যদিও আজ তিনি,
এক সময়ে দুজনে একই বাসায় থেকে পড়াশুনো করেচি। তিনিও গরিবের
ছেলে ছিলেন, আমিও তাই। গাড়ি যেন একটু সাবধানে চালিয়ে
নিয়ে যায় দেখো।

কথাটা ঠিক বটে, তবে রামতারণ যে গরিব সেই গরিবই রহিয়া গিয়াছেন,
যত্ন বাঁড়ুয্যে আঙুল ফুলিয়া কল-গাছ হইয়া খ্যাতি-প্রতিপত্তি, বিষয়-
আশয় এবং নগদ টাকায় বর্তমানে মহকুমা আদালতের মোক্তার-বারের
শীর্ষস্থানীয়। যত্ন বাঁড়ুয্যের বাড়ি প্রাসাদোপম না হইলেও নিতান্ত ছোট
নয়, যে সময়ের কথা হইতেছে, তখন সারা টাউনের মধ্যে অমন ফ্যাগানের
বাড়ি একটিও ছিল না—আজকাল অবশ্য অনেক হইয়াছে।

নিধু ফটকের সামনে গরুরগাড়ি রাখিয়া কম্পিতপদে উঠান পার হইয়া
বৈঠকখানাতে ঢুকিল। মহকুমার টাউনে তার যাতায়াত খুবই কম—
কারণ সে লেখাপড়া করিয়াছে তাহার মামা-বাড়ির দেশ ফরিদপুরে।
যত্ন বাঁড়ুয্যে মহাশয়কে সে কখনো দেখে নাই।

সকালবেলা। পসারওয়ালা মোক্তার যত্ন বাঁড়ুয্যের সেরেস্তায় মঞ্চের ভিড়
লাগিয়াছে। কেহ বৈঠকখানার বাহিরের রোয়াকে বলিয়া তামাক খাইতেছে,
কেহ কেহ নিজ সাক্ষীদের সঙ্গে মকদ্দমা সম্বন্ধে পরামর্শ করিতেছে।

নিধু ভিড় দেখিয়া ভাবিল, ভগবান যদি মুখ তুলিয়া চান, তবে তাহারও মকেলের ভিড় কি হইবে না ?

যত্নবান্ সামনেই নথি পড়িতেছিলেন, নিধু গিয়া তাহার পায়ের ধূলা লইয়া প্রণাম করিল। যত্নবান্ নথি হইতে মুখ তুলিয়া বলিলেন—কোথা থেকে আসা হচ্ছে ?

—আজ্ঞে আমি কুড়ুলগাছির রামতারণ চৌধুরীর ছেলে। এবার মোক্তারী পাশ করে প্র্যাকটিস করব বলে এসেছি এখানে। বাবা আপনার নামে একটা চিঠি দিয়েছেন—

যত্নবান্ একটু বিস্ময়ের স্বরে বলিলেন—রামতাবণের ছেলে তুমি ? মোক্তারী পাশ করেচ এবাব ? লাইসেন্স পেয়েচ ?

—আজ্ঞে হ্যাঁ।

—বাসা ঠিক আছে ?

—কিছুই ঠিক নেই। আপনার কাছে সোজা আসতে বলে দিলেন বাবা। আমাদের অবস্থা সব তো জানেন—

যত্নবান্ চিন্তিতভাবে বলিলেন—তাইতো, বাসা ঠিক কবনি ? তোমার জিনিসপত্র নিয়ে এসেচ নাকি ? কোথায় সেসব ?

—আজ্ঞে, গাড়িতে রয়েছে।

যত্নবান্ হাঁকিয়া বলিলেন—ওবে লক্ষণ, ও লক্ষণ, বাবুর জিনিসপত্রের কি আছে নামিয়ে আয়। বাবাজি তুমি এখানেই এবেলা খাওয়া-দাওয়া কর, তারপর যা হয় ব্যবস্থা করা যাবে।

নিধু* বিনীতভাবে জানাইল যে সে বাড়ি হইতে আহালাদি করিয়াই রওয়ানা হইয়াছে।

—এত সকালে ? এর মধ্যে খাওয়া-দাওয়া শেষ ? রাত থাকতে উঠে না বেলে তো তুমি কুড়ুলগাছি থেকে এতটা পথ গরুরগাড়ি করে আসতে পারোনি।

—আজ্ঞে, মা বললেন দধিঘাতা করে বেরুতে হয়, তাই ঘরে পাঁজি
কই দিয়ে দুটো ভাত খেয়ে ভোরবেলা—

—হঁ, তা বটে। তবে কথা কি জানো বাবা, সব বরাতে। ও দধিঘাতাও
বুঝিনে, কিছুই বুঝিনে—বরাতে না থাকলে দধিঘাতা কেন, তোমার ও
ঘোলঘাতা, মাখনঘাতাতেও কিছু হবার যো নেই, বুঝলে বাবা ?

কথা শেষ করিয়া যত্ন বাঁড়ুঘো চারিপাশে উপবিষ্ট মুহুরী ও মকেল-
বুন্দের প্রতি সগর্ব দৃষ্টি ঘুরাইয়া আনিলেন। পরে আবার বলিলেন—এই
মহকুমার প্রথম যখন প্র্যাকটিস করতে এসেছিলাম—সে আজ পঁয়ত্রিশ
বছর আগেকার কথা। একটা ঘটি আর একটা বিছানা সস্থল ছিল।
কেউ চিনত না, গ্রাম সাউন্দের খড়ের বাড়ি তিন টাকা মাসিক ভাড়ায়
এক বছরের জুগ নিয়ে মোক্তারী শুরু করি। তারপর কত এল কত গেল
আমার চোখের সামনে, আমি তো এখনো যাহোক টিকে আছি।

একজন মকেল বলিল—বাবু, আপনার সঙ্গে কার কথা? আপনার
মতো পসার জেলার কোর্টে কজনের আছে ?

অনেকেই মোক্তারবাবুর মন যোগাইবার জুগ একথায় সায় দিল।

যত্ন-মোক্তার নিধুর দিকে চাহিয়া বলিলেন—বাবাজি, সারা পথ গরুর
গাড়িতে এসেচ, তোমাদের গ্রাম তো নয় সেখানে যাওয়ার চেয়ে
কলকাতায় যাওয়া সোজা। একটু বিশ্রাম করে নাও, তারপর কথাবার্তা
হবে এখন বিকেলে।

মহকুমার টাউন থেকে কুড়ুলগাছি পাঁচ মাইল পথ। নিধু মাঝে মাঝে
ম্যালেরিয়ায় ভোগে, স্বাস্থ্য তত ভালো নয়, এইটুকু পথ আলিয়াই
সতাই সে ক্লান্ত হইয়া পড়িয়াছিল। যত্ন বাঁড়ুঘোর বৈঠকখানায় ফরাসের
উপর শুইবামাত্র সে ঘুমাইয়া পড়িল।

বৈকালের দিকে যত্নবাবু কোর্ট হইতে ফিরিলেন, গায়ে চাপকান, মাথায়

শামলা, হাতে এক তড়ি কাগজ। নিধুকে বলিলেন—চা খাও তো
হে ? বস, চা দিতে বলি—

নিধু সলজ্জভাবে বলিল—থাক, আপনাকে ব্যস্ত হতে হবে না কাকাবাবু।
—বিলক্ষণ, বস আসচি—

প্রায় ঘণ্টাখানেক পরে চাকর আসিয়া নিধুকে বলিল—কর্তাবাবু
ডাকচেন বাড়ির মধ্যে।

নিধু সসঙ্কেতে বাড়ির মধ্যে ঢুকিল চাকরের পিছু পিছু। যত্নবান্ন
রান্নাঘরের দাওয়ায় পিঁড়ি পাতিয়া বসিয়া আছেন, তাঁহার পাশে আর
একখানা পিঁড়ি পাতা।

যত্নবাবু রান্নাঘরের খোলা দরজার দিকে চাহিয়া বলিলেন—ওগো, এই
এসেচে ছেলেটি। খাবার দাও।

মোক্তারগৃহিনী আধ-ঘোমটা দিয়া বাহির হইয়া আসিতেই নিধু তাঁহার
পায়ের ধূলা লইয়া প্রণাম করিল। তিনি তাহার পাতে গরম লুচি,
বেগুনভাজা ও আলুর তরকারি দিয়া গেলেন। নিধু চাহিয়া দেখিল
যত্নবাবু মাত্র এক বাটি সাবু খাইতেছেন।

নিধু ভাবিল, ভদ্রলোকের নিশ্চয় আজ জর হইয়াছে। সে জিজ্ঞাসা
করিল—কাকাবাবু, আপনার শরীর খারাপ হয়েছে নাকি ? সাবু
খাচ্ছেন যে ?

মোক্তারগৃহিনী এবার জবাব দিলেন—বাবা, গুঁর কথা বাদ ছাও।
ঝরোমাস সাবু জলখাবার দুবেলা।

যত্নবাবু বলিলেন—হজম হয় না বাবাজি, আর হজম হয় না। আর কি
তোমাদের বয়েস আছে ? এই এক বাটি সাবু খেলাম, রাত্রে আর কিছু
না। বড্ড খিদে পায় তো দুখানি স্কজির রুটি আর একটু মাছের কোল।
তা সব দিন নয়।

নিধু এবার সত্যিই অবাক হইল। সে পাড়ারগায়ের ছেলে, শখ করিয়া যে ক্ষুদ্র সাবু খায়, ইহা সে দেখে নাই। তাহার বাবাও তো যত্নবান সমবয়সী, তিনি এখনো যে পরিমাণে আহার করেন, যত্নবান দেখিলে নিশ্চয়ই চমকাইয়া যাইবেন।

জলযোগের পরে বাহিরের ঘরে আসিতেই চাকর ফর্সিতে তামাক সাজিয়া দিয়া গেল। যত্নবান তামাক টানিতে টানিতে বলিলেন—তারপর একটা কথা জিগেস করি বাবাজি, কিছু মনে কোরো না, মোক্তারী করতে তো এলে, সঙ্গে কত টাকা এনেচ ?

নিধু প্রশ্নের উত্তর ভালো বুঝিতে না পারিয়া বলিল—আজ্ঞে টাকা ? কিসের টাকা ?

—বসে বসে খেতে হবে তো, খরচ চালাতে হবে না ?

—আজ্ঞে তা বটে। টাকা সামান্য কিছু—ইয়ে—মানে হাতে আছে কিছু।

চাল এনেচি দশ সের বাড়ি থেকে—তাই খাব।

যত্নবান হাসিয়া বলিলেন—বাবাজি, একেই বলে ছেলেমানুষ ! দশ সের চাল তোমার বাবা তোমার সঙ্গে পাঠিয়ে দিয়েছেন খাবার জন্তে। অর্থাৎ এই চাল ক’টা ফুরোবার আগেই তুমি রোজগার করতে আরম্ভ করে দেবে—এই কথা তো ?

—আজ্ঞে হ্যাঁ—তা—বাবা সেই ভেবেই দিয়েছেন।

নিধু সব কথা ভাঙিয়া বলিল না। এক টাকার ধান ধারে কিনিয়া আনিয়া নিধুর সংমা চালগুলি কাল সারা বিকালবেলা খরিয়া ভানিয়া কুটিয়া তৈরি করিয়া দিয়াছেন। নিধুর আপন মা নাই, আজ প্রায় পনেরো-ষোলো বৎসর পূর্বে নিধুর বালাকালেই মারা গিয়াছেন।

যত্নবান বলিলেন—বাবা, খেজুর গাছ তেলপান নয়। তোমার বাবা যা ভেবেছেন তা নয়। সেকাল কি আর আছে বাবাজি ? আমরা এখন প্রথম
২(৬১)

প্রথম বসি প্র্যাক্টিসে—সে কাল গিয়েচে। এখন ওই কোর্টের অশথতলায় গিয়ে আঁখো—একটা লাঠি মারলে তিনটে মোক্তার মরে। কারো পসার মেই। আবার কেউ কেউ কোটপ্যাণ্ট পরে আসে—মক্কেল কিছুতেই ভোলে না—

নিধুর মুখে নিরাশার ছায়া পড়িতে দেখিয়া তিনি তাড়াতাড়ি বলিয়া উঠিলেন—না, না, তুমি তা বলে বাড়ি ফিরে যাও আমি তা বলিনি। ছেলে-ছোকরা, দমবে কেন? আমি বলছি কাজ খুব সহজ নয়। হঠাৎ বড়লোক, হওয়ার কাল গিয়েচে। লেগে যাও কাজে—আমি যতদূর পারি সাহায্য করব। তবে একটি বছর কলসীর জল গড়িয়ে থেতে হবে।

—আজ্ঞে, কলসীর জল?

—তাই। বাড়ি থেকে জমানো টাকা এনে খরচ করতে হবে বাবাজি। দশ লের চালে কুলুবে না। রাগ করো না বাবাজি। অবস্থা গোপন করে তোমাকে মিথ্যে আশা না দেওয়াই ভালো। আমি স্পষ্টবাদী লোক। বাসা ভাড়া দিতে পারবে কত?

—আজ্ঞে, দু-তিন টাকার মধ্যে যাতে হয় তাই করে নেব। তার বেশি দেবার ক্ষমতা নেই। বাবার অবস্থা সব জানেন তো আপনি।

যতুবাবু বলিলেন—আচ্ছা, সম্ভ্রায় একটা বাসা তোমায় দেখে দেব এখন। দু-চারদিন এখানে থেকে কোর্টে যাতায়াত করতে পারতে অনায়াসেই কিন্তু তাতে তোমার পসার হবে না। উকীল মোক্তার নিজের বাসায় না থাকলে সম্মান হয় না। তোমার ভবিষ্যৎটা তো দেখতে হবে!

সেদিন যতুবাবু নিধুর জুখ একটা ছোট বাসা পাঁচ টাকা ভাড়ায় ঠিক করিয়া দিলেন।

শুধু বাঁড়ুয়ের খাতিরে নিধু ছ-একটি মকেল পাইতে আরম্ভ করিল। নিধু বড় মুখচোরা ও লাজুক, প্রথম প্রথম কোর্টে দাঁড়াইয়া হাকিমের সামনে কিছু বলিতে পারিত না—মনে হইত এজলাস শুদ্ধ মোক্তারের দল তাহার দিকে চাহিয়া আছে বৃষ্টি। ক্রমে ক্রমে তাহার সে ভাব দূর হইল। যতুবাবু তাহাকে কাজকর্ম সম্বন্ধে অনেক উপদেশ দিলেন। বলিলেন—ত্যাগ, জেরা ভালো না করতে পারলে ভালো মোক্তার হওয়া যায় না। জেরা করাটা ভালো করে শেখবার চেষ্টা কর। যখন আমি কি হরিহর নন্দী জেরা করব, তুমি মন দিয়ে শুনো, উপস্থিত থেক সেখানে।

নিধু কিন্তু এক বিষয়ে বড় অস্ববিধায় পড়িল।

যতুবাবু সে রেস্তায় সকালে সে প্রায়ই উপস্থিত থাকিয়া দেখিত—মকেলকে তিনি বড় মিথ্যা কথা বলিতে শেখান। আসামী, ফরিদাদী বা সাক্ষীদের তিনঘণ্টা ধরিয়া মিথ্যা কথার তালিম না দিয়া তাঁহার কোনো মোকদ্দমা তৈরি হয় না।

একদিন সে বলিল—কাকাবাবু, একটা কথা বলব ?

—কি বল ?

—ওদের অত মিথ্যা কথা শেখাতে হয় কেন ?

—না শেখালে জেরায় মার খেয়ে যাবে যে।

—সত্যি কথা যা তাই কেন বলুক না ?

—তাতে মোকদ্দমা হয় না বাবাজি। তা ছাড়া অনেক সময় সত্যি কথাই ওদের বার বার শেখাতে হয়। ওরা শিগিয়ে না দিলে সত্যি কথা পর্যন্ত

‘গুহিয়ে বলতে পারে না। আমাদের ওপর অবিচার কোরো না তোমরা—
এমন অনেক সময় হয়, মক্কেলে বাপের নাম পর্যন্ত মনে করতে পারে না
কোর্টে দাঁড়িয়ে। না শেখালে চলে ?

—আমাকেও অমনি করে শেখাতে হবে ?

—যখন এ পথে এসেচ, তা করতে হবে বৈকি। আর একটা কথা শিখিয়ে
দিই, হাকিম চটিও না কখনো। হাকিম চটিয়ে তোমার খুব ইম্প্রিট
দেখানো হল বটে, কিন্তু তাতে কাজ পাবে না। হাকিম চটালে নান্দ
অস্ববিধে। মক্কেল যদি জানে, অমুক মোক্তারের ওপর হাকিম সন্তুষ্ট নয়—
তার কাছে কোনো মক্কেল ঘেষবে না।

নিধু মাসখানেক মোক্তারী করিয়া যত্নবাবুর দৌলতে গোটা পনেরো টাকা
রোজগার করিল। তার বেশির ভাগই জামিন হওয়ার ফি বাবদ রোজগার।
যত্নবাবু দয়া করিয়া তাহাকে দিয়া জামিন-নামা সই করিয়া লইয়া মক্কেলের
নিকট হইতে ফি পাওয়াইয়া দিতেন।

একদিন একটি মক্কেল আসিয়া তাহাকে মারপিটের এক মোকদ্দমায় নিযুক্ত
করিতে চাহিল।

নিধু জিজ্ঞাসা করিল—অপরপক্ষে কে আছে জানো ?

—আজ্ঞে যত্ন বাঁড়ুয়ে—

নিধু মুখে কিছু না বলিলেও মনে মনে আশ্চর্য হইল। প্রবল প্রতাপ যত্ন
বাঁড়ুয়ের বিপক্ষে তাহার মতো জুনিয়র মোক্তার দেওয়ার হেতু কি ?
লোকটি তো অনায়াসে যত্ন বাঁড়ুয়ের প্রতিদ্বন্দ্বী প্রবীন মোক্তার হরিহর
নন্দী কিংবা অন্নদা ঘটক অভাবপক্ষে মোজাহার হোসেনের কাছেও যাইতে
পারিত ?

কথাটা ভাবিতে ভাবিতে সে কোর্টে গিয়া যত্ন বাঁড়ুয়েকে আড়ালে
প্রতিষ্ঠা করিয়া ফেলিল।

যত্নবান্ বলিলেন—ও, ভালোই তো বাবাজি। কিন্তু তোমার মকেলের-
মনের ভাব কি জানো না তো? আমি বুঝেছি।

—কি কাকাবাবু?

—আমি তোমাকে স্নেহ করি, এটা অনেকে জেনে ফেলেচে। তোমাকে
কেস দেওয়ার মানে—আমি বিপক্ষের মোক্তার, কেসে মিটমাটের
সুবিধে হবে।

—কেস মেটাতে চায়?

—নিশ্চয়ই। নইলে তোমাকে মোক্তার দিত না। অল্প মোক্তারের কথা
যদি আমি না শুনি? যদি কেস চালাবার জগ্রে মকেলকে পরামর্শ দিই?
এই ভয়ে তোমাকে মোক্তার দিয়েচে। ভালো তো। ওর কাছ থেকে
বেশ করে দু-চারদিন ফি আদায় কর, দু-চারদিন তারিখ পান্টে যাক—
হাতে কিছু আশ্রক—তারপর মিটমাটের চেষ্টা দেখলেই হবে।

—বড় অবর্ম হবে কাকাবাবু—অজ্ঞই কেন কোর্টে মিটমাটের কথা
হোক না?

—তাহলেই তুমি মোক্তারী করেচ বাবা! মাইনর পাশ করে সেকালে
মোক্তারীতে ঢুকেছিলাম—আর চুল পাকিয়ে ফেললাম এই কাজ করে।
তুমি এখনো কাঁচা ছেলে—যা বলি তাই শোনো। তোমার মকেল
মিটমাটের কথা কিছু বলেচে?

—আজ্ঞে না।

—তবে তুমি ব্যস্ত হও কেন এখুনি? আগে বলুক, তারপর দেখা যাবে।
একমাস শহরে মোক্তারী করিয়া নিধু বাড়ি ঘাইবার জগ্ৰ ব্যস্ত হইয়া উঠিল।
যহ্ মোক্তার বলিলেন—বাবাজি, সোমবার যেন কামাই কোরো না।
শনিবারে যাবে, সোমবারে আসবে। মাথায় আকাশ ভেঙে পড়লেও
আসবে। নতুন প্র্যাকটিসে ঢুকে কামাই করতে নেই একেবারে।

নিধু 'বে আজে' বলিয়া বিদায় লইয়া মোক্তার-লাইব্রেরী হইতে বাহির হইয়া নিজের বাসায় আসিল। অনেকদিন পরে বাড়ি যাইতেছে কাল—জাইবোনগুলির জগৎ কি লইয়া যাওয়া যায়? বাবার জগৎ অবশ্য ভালো তামাক খানিকটা লইতেই হইবে। মায়ের জগৎই বা কি লওয়া উচিত? সারাদিন ভাবিয়া-চিন্তিয়া সে সকলের জগৎই কিছু না কিছু সন্তানদের সওদা করিল এবং শনিবার কোর্টের কাজ মিটিলে বড় একটি পুঁটুলি বাঁধিয়া হাঁটাপথে বাড়ি রওনা হইল। পাঁচ-ছ' ক্রোশ পথ—গাড়ি একখানা, দুই টাকা আড়াই টাকার কমে যাইতে চাহিবে না—অত পয়সা নিজের স্নেহের জগৎ ব্যয় করিতে সে প্রস্তুত নয়।

বর্ষাকাল।

সারাদিন কালো মেঘে আকাশ অন্ধকার, সজল বাদলার হাওয়ায় ভ্রমণে ক্লান্তি আনে না—পথের দুপাশে ঘন সবুজ দিগন্তপ্রসারী ধানক্ষেত, আউস ধানের কচি জাঙলার প্রাচুর্যে চোখ জুড়াইয়া যায়। তবে কয়দিনের বৃষ্টিতে কাঁচা রাস্তায় বড় কাদা—জোরে পথ হাঁটা যায় না মোটেই।

এক জায়গায় পথের ধারে বড় একটা পুকুর। পুকুরে অল্প সময় তত জল থাকে না, এখন বর্ষায় জল পাড়ের কানায় কানায় ঘাসের জমি ছুঁইয়া আছে, জলে কচুরিপানার নীলফুল, ওপারে ঘন নিবিড় বনঝোপে তিংপল্লার হলুদ রঙের ফুল।

নিধুর ক্ষুধা পাইয়াছিল—সঙ্গে একটা ঠোঙায় নিজের জগৎ কিছু মুড়কি কিনিয়া আনিয়াছিল। মোক্তারবাবুর যেখানে-সেখানে বসিয়া খাওয়া উচিত নয়—সে এদিক-ওদিক চাহিয়া ঠোঙা হইতে মুড়কি বাহির করিয়া জলযোগ সম্পন্ন করিল।

বেলা পড়িয়া আসার সঙ্গে সঙ্গে সে তাহাদের গ্রামের পাশের গ্রাম সন্দেশপুরে ঢুকিল।

সন্দেহপুর চাষা গাঁ—রাস্তার ধারে তালের গুঁড়ির খুঁটি লাগানো
মক্তবঘর, মক্তবের মৌলবী সাহেব তখনো ছাত্রদের ছুটি দেন নাই—যদিও
জ্যাজ শনিবার—তাহারা মক্তবঘরের সামনের প্রাঙ্গণে সারি দিয়া দাঁড়াইয়া
তারম্বরে নামতা পড়িতেছে।

মৌলবী ডাকিলেন—ও নিধিরাম, শুনে যাও হে—

মৌলবী শাদা-দাড়িওয়ালা বৃদ্ধ ব্যক্তি, তাহার বাবার চেয়েও বয়সে বড়!

নিধিরামকে তিনি এতটুকু দেখিয়াছেন।

নিধিরাম দাঁড়াইয়া বলিল—আর বসব না মৌলবী সাহেব, যাই—বেলা
নেই আর। এখনো ইস্কুল ছুটি দাওনি যে?

—আরে এস না—শুনে যাও।

—নাঃ, যাই।

মৌলবী সাহেব স্কুল-প্রাঙ্গণ ছাড়িয়া আসিয়া নিধিরামের রাস্তা
আটকাইলেন।

—চল, বস না একটু। এস—ওরে একখানা টুল বের করে দে মাঠে।

আরে তোমরা শহরে থাক, একবার শহরের খবরটা নিই—

নিধিরাম অগত্যা গেল বটে—তাহার দেরি সহিতেছিল না—কতক্ষণে
বাড়ি পৌছিতে ভাবিতেছে না আবার এই উপসর্গ! সে ঈষৎ বিরক্তির
স্বরে বলিল—কি আবার খবর?

—কি খবর আমরা জানি? তুমি বল শুনি। মোস্তারি করচ শুনলাম
সেদিন কার কাছে যেন। তারপর কেমন হুচে-টুচে?

—নতুন বসেচি, এখনি কি হবে বল! যত্ন-মোস্তার খুব সাহায্য করচে।

—যত্ন-মোস্তার? ওঃ, অনেক পরগা কামাই করে। সবই নসীব বুঝলে।
মাইনর পাশ করি আমরা একই ইস্কুল থেকে। অবিশ্তি আমার চেয়ে
সান্ত-আট বছরের ছোট। জাখ আমি কি করচি—আর যত্ন কি করচে!

—বাবারও তো ক্লাসফ্রেণ্ড—বাবাই বা কি করতেন তাও জ্ঞাথ—

—তাই বলচি সবই নসীব। একটা ভাব থাকবে ?

—পাগল! শ্রাবণ মাসের সন্দেশেলা ভাব থাক কি! ঠাণ্ডা লেগে যাবে যে!

—তুমি তো তামাকও খাও না। তোমাকে দিই কি ?

—তামাক খেলেই কি তোমার সামনে খেতাম মৌলবী সাহেব, তুমি আমার বাবার চেয়ে বড়।

—তোমরা মান খাতির রেখে চল তাই—নইলে নাতির বয়সী ছোকরারা আজকাল বিড়ি খেয়ে মুখের ওপর ধোঁয়া ছেড়ে দ্বায়। সেদিন আটঘরার দাশরথি ডাক্তারের ডাক্তারখানায় বসে আছি—

সন্ধ্যার অন্ধকার নামিবার বেশি দেরি নাই, নিধিরাম ব্যস্ত হইয়া বলিল—
আমি আসি মৌলবী সাহেব, সন্দের পর যাওয়ার কষ্ট হবে—স্বমুখে
ঔষধ রাত—

—আরে, তোমাদের গাঁয়ের পাঁচ-ছ'টা ছেলে পড়ে এখানে। দাঁড়াও না, নামতাটা পড়ানো হয়ে গেলেই ওরাও যাবে। এক সন্দেশেও।

—এখনো আজ ইস্কুল ছুটি দাওনি যে! রোজই এমন নাকি? আজ তার ওপর শনিবার।

—আরে বাড়ি গিয়ে তো চাষার ছেলে ছিপ নিয়ে মাছ মারতে বসবে, নয়তো গরুর জাব কাটতে বসবে তার চেয়ে এখানে যতক্ষণ আটকানো থাকে—একটু এলেমদার লোকের সঙ্গে তো থাকতে পারে।
তুটো ভালো কথাও তো শোনে! বুঝলে না? আমার রোজই সন্দের আগে ছুটি।

সন্ধ্যার পর নিধু গ্রামে ঢুকিল।

নিজের বাড়ি পৌছিবার আগে সে একবার থমকিয়া দাঁড়াইল। তাহাদের

বাড়ির ঠিক সামনে সরু গ্রাম্য-রাস্তার এপাশে লালবিহারী চাটুষোদের যে বাড়ি সে ছেলেবেলা হইতে জনশূন্য অবস্থায় পড়িয়া থাকিতে দেখিয়াছে—সে বাড়িতে আলো জলিতেছে! এক আধটা আলো নয়, দোতল্লর প্রত্যেক জানালা হইতে আলো বাহির হইতেছে—ব্যাপার কি?

সে বাড়ির সামনে আসিয়া দাঁড়াইয়া চাহিয়া দেখিল বৈঠকখানায় অনেক গ্রাম্য ভদ্রলোক জড় হইয়াছেন, তাহার বাবা রামতারণ চৌধুরীও আছেন তাহাদের মধ্যে। একজন স্থূলকায় প্রোঢ় ভদ্রলোক সকলের মাঝখানে বসিয়া হাত নাড়িয়া কি বলিতেছেন।

নিধু নিজের বাড়ির মধ্যে ঢুকিয়া পড়িল।

তাহাকে দেখিয়া প্রথমে ছুটিয়া আসিল নিধুর ভাই রমেশ।

—ওমা, ও কালী, দাদা বাড়ি এসেচে—দাদা—

তখন বাকি সবাই ছুটিয়া আসিয়া তাহাকে ঘিরিয়া দাঁড়াইল, সম্মিলিত ভাবে নানা প্রশ্ন করিতে লাগিল। নিধুর মা আসিয়া বলিলেন—তোরা সরে যা, ওকে আগে একটু জিরুতে দে—বস নিধু, পাখা নিয়ে আয় কালী—নিধু জিজ্ঞাসা করিল—মা কারা এসেচে ও বাড়িতে?

—জজবাবু বাড়ি এসেছেন ছুটি নিয়ে। এবার নাকি পুজো করবেন বাড়িতে—

—লালবিহারীবাবু!

—হ্যাঁ। তোর কাকা হন, কাকাবাবু বলে ডাকবি। বড়লোক। এতে কি?

—ভালো কথা। ওতে একটা মাছ আছে, দে-গন্ধার বিলে ধরছিল, কিনে এনেচি।

—ও পুঁটি, তোর দাদা মাছ এনেচে—আগে কুটে ক্যাল দিকি, পচে যাবে—বলিয়া নিধুর মা ঘরের মধ্যে চলিয়া গেলেন এবং অল্পক্ষণ পরে

একঘটি জল ও গামছা আনিয়া নিধুর সামনে রাখিয়া বলিলেন—হাত মুখ
আগে ধুয়ে ফেল বাবা, বলচি সব কথা ।

নিধুর আপন মা নাই, ইনি সৎমা এবং রমেশ নিধুর বৈমাত্রেয় ভাই । রমেশ
বলিল—দাদা একটা ডাব খাবে ? আমি একটা ডাব এনেছিলাম বন্ধুদের
গাছ থেকে ।

নিধুর মা ধমক দিয়া বলিলেন—যাঃ, বর্ষাকালের রাস্তিরে এখন ডাব খায়
কেউ ? তারপর জর হোক । তুই হাত মুখ ধুয়ে নে—আমি খাবার
নিয়ে আসি—

খাবার অর্থাৎ কিছু নয়, চাল ভাজা আর শহর থেকে সে বাড়ির জন্ত যে ছানার
গজা আনিয়াছে তাহাই দুখানা । জলপান শেষ করিয়া নিধু কোতুহল
বশত লালবিহারীবাবুর বৈঠকখানার বাহিরে গিয়া দাঁড়াইয়া দেখিতে
লাগিল । সেই স্থলকায় ভদ্রলোকটি তাহাকে দেখিতে পাইয়া বলিলেন—
ওখানে দাঁড়িয়ে কে ? ভেতরে এস না—

নিধু সসঙ্কোচে বৈঠকখানার ভেতরে ঢুকিতে রামতারণ চৌধুরী ব্যস্ত সমস্ত
হইয়া বলিলেন—নিধু কখন এলে ? এটি আমার ছেলে—এরই কথা
বলছিলাম তোমাকে । মোক্তারীতে ঢুকেচে এই সবে—

স্থলকায় ভদ্রলোকটিই লালবিহারী চাটুজ্যে—নিধু তাহা বুঝিল । সে
বাবাকে ও লালবিহারীকে আগে প্রণাম করিয়া পরে একে একে অগ্ৰাঙ্ক
ষয়োজ্যেষ্ঠ প্রতিবেশীদেরও প্রণাম করিল ।

লালবিহারী চাটুজ্যে বলিলেন—বস, বস । তারপর পসার কেমন হচ্ছে ?

নিধু বিনীতভাবে বলিল—আজ্ঞে, এক রকম হচ্ছে । সবে তো বসেচি—

লালবিহারী পূর্বস্বতি মনে আনিবার ভাবে বলিলেন—তোমার মতো
আমিও একদিন প্র্যাকটিস করতে বসেছিলাম বহরমপুরে । তিনবছর
ওকালতি করেছিলাম । সে সব দিনের কথা আজও মনে আছে—বেশ
২৬

ভালো করে খেটো হে মক্কেলের জন্তে। ফাঁকি দিও না। তাহলেই পসার হবে। মক্কেল নিয়ে ব্যবসা তোমার মতো আমিও একদিন করেচি, জানি তো।

পুত্রগর্বে রামভারণের বুক ফুলিয়া উঠিল। এত বড় একজন লোক, একটা মহকুমার ডিক্রি-ডিসমিসের মালিক—তাহার ছেলে নিধুর সহিত সমানে সমানে কথা কহিতেছেন। কই, আরও তো কত লোক গাঁয়ের বসিয়া আছে, ক'জনের ছেলে আছে—উকীল মোস্তার?

লালবিহারী পুনরায় বলিলেন—তুমি কাল যাবে না পরশু যাবে? নিধু উত্তর দিল—পরশু সকালে উঠেই চলে যাব—

—তাহলে কাল আমার বাড়ি দুপুরে খেও, দু-একটা কথা বলব।


বামভারণ একবার সগর্বে সকলের দিকে চাহিয়া লইলেন। ভাবটা এইরূপ—কই, তোমাদের কাউকে তো লালবিহারী খেতে বললে না? মাহুযেই মাহুয চেনে।

নিধু বিনীতভাবে বলিল—আজ্ঞে তা বেশ।

—আমার ছেলে অরুণকে তুমি ডাখনি—আলাপ করিয়ে দেব এখন— সেও ল' পড়চে। সামনের বছর এম, এ দেবে। তোমার বয়সী হবে।

নিধু বলিল—আচ্ছা, এখন তাহলে আসি কাকাবাবু—

নিধুর মা শুনিয়া বলিলেন—বড়লোক কি আর এমনি হয়! মন ভালো না হলে কেউ বড়লোক হয় না। তবে কত' যেমন, গিন্নি কিন্তু তেমন নয়। একটু ঠা'কারে আছে—তা থাক, আমরা গরিব মাহুয, আমাদের তাতে কিই বা আসে যায়! আমরা সকলের চেয়ে ছোট হয়েই তো আছি। থাকবও চিরকাল—



পরদিন সকালে রমেশ ছুটিয়া আসিয়া নিধুকে বলিল—দাদা, শিগগির এস, জজবাবুর ছেলে তোমায় ডাকচে—

নিধুদের বাহিরের ঘর নাই—তবে রোয়াকের উপর একখানা খড়ের চাল। আছে, নিধু বাহিরে গিয়া দেখিল একটি ঘোলা-সতেরো বছরের ছেলে চালার নিচে রোয়াকে বসিয়া কি একখানা বইয়ের পাতা উন্টাইতেছে।

নিধু ছেলেটিকে রোয়াকে মাহুর পাতিয়া বসাইল। ছেলেটি বলিল—আপনাদের বাড়িতে কোনো বাংলা বই আছে ?

নিধু ভাবিয়া দেখিয়া বলিল—না, বই তেমন কিছু নেই তো ? বাংলা রামায়ণ মহাভারত আছে—

—ও সব না। আমার বোন মঞ্জু বড় বই পড়ে। তার জন্তে দরকার—
সে পাঠিয়ে দিলে—

—তোমাদের বাড়ি বই নেই ?

—সব পড়া শেষ। মঞ্জু একদিনে তিনখানা করে বই শেষ করে—সিমলে বান্ধব লাইব্রেরী অত বড় লাইব্রেরী তার জন্তে ফেল—বই যুগিয়ে উঠতে পারে না—

—তোমার বোন কি কলকাতায় থাকে ?

—ও যে আমারবাড়ি থেকে পড়ে—এবার সেকেন ক্লাসে উঠল। সামনের বার ম্যাট্রিক দেবে। বাবা মফঃস্বলে বেড়ান, সব জায়গায় মেয়েদের হাইস্কুল তো নেই, তাই ওকে আমারবাড়ি কলকাতায় রেখেচেন পড়ার জন্তে।

দুপুরে সেই ছেলেটিই তাকে খাইবার জন্ম ডাকিয়া লইয়া গেল। নিধু উহাদের বাড়ির মধ্যে ঢুকিয়া অবাক হইয়া গেল। বড়লোকের বাড়ি বটে! চক-মিলানো দোতলা বাড়ির বারান্দা হইতে দামী দামী স্বদৃশ্য ভিজা শাড়ি ঝুলিতেছে, বারান্দায় স্ববেশা স্তন্দরী মেয়েরা ঘোরাফেরা করিতেছে, কোন ঘরে গ্রামোফোন বাজিতেছে—লোকজন, ভিড়ে, হৈচৈএ সরগরম। এই বাড়িটি সে পড়িয়া থাকিতে দেখিয়া আসিতেছে বাল্যকাল হইতে। কখনো ইহারা দেশে আসেন নাই—নিধু বাড়িটার মধ্যে কখনো ঢুকিয়া দেখে নাই এর আগে। বাবার মুখে সে শুনিয়াছে তাহার যখন বয়স চারি বছর, তখন একবার ইহারা দেশে আসিয়া ঘরবাড়ি মেরামত করে ও নতুন করিয়া অনেকগুলি ঘর বারান্দা তৈরি করে—কিন্তু সে কথা নিধুর স্মরণ হয় না।

একটি প্রৌঢ়া মহিলা তাকে যত্ন করিয়া আসন পাতিয়া বসাইলেন এবং কিছুক্ষণ পরে একটি পনেরো-ষোলো বছরের স্তন্দরী মেয়ে তাহার সামনে ভাতের থালা রাখিয়া গেল। কিছুক্ষণ পরে মহিলাটি আবার আসিয়া তাহার সামনে বসিলেন। নিধু লজ্জায় মুখ তুলিয়া চাহিতে পারিতেছিল না। মহিলাটি বলিলেন—লজ্জা করে খেও না বাবা। তোমাকে সেবার এসে দেখেছিলাম এতটুকু ছেলে, এর মধ্যে কত বড়টি হয়েচ। ও মজু, এদিকে আয়, তোর দাদার খাওয়া ছাখ, এখানে দাঁড়া এসে, আমি আবার ওদিকে যাব।

মেয়েটি আসিয়া মায়ের পাশে দাঁড়াইল। বলিল—বাবো, আপনি কিছু খাচ্ছেন না যে!

নিধু সলজ্জভাবে বলিল—আপনাকে বলতে হবে না—আমি ঠিক খেয়ে যাব—

মেয়ের মা বলিলেন—ওকে ‘আপনি’ বলতে হবে না বাছা। ও তোমার ছোট বোনের মতো—এক গায়ে পাশাপাশি বাড়ি, থাকা হয় না, আসা হয়

না তাই। নইলে তোমরা প্রতিবেশী, তোমাদের চেয়ে আপন আর কে আছে? তোমার মাকে ওবেলা আসতে বোলো। বসে খাও বাবা—মঞ্জু, ঝাড়া এখানে—

গৃহিনী উঠিয়া চলিয়া গেলেন। মেয়েটি বলিল—আমি মাংস এনে দিই—
—মাংস আমি খাইনে তো।

মেয়েটি আশ্চর্য হইবার স্বরে বলিল—খান না? ওমা, তবে মাকে বলে আসি। কি দিয়ে খাবেন?

নিধু এবার হাসিয়া বলিল—সেজ্ঞে তোমায় ব্যস্ত হতে হবে না। এই আয়োজন হয়েছে, আমার পক্ষে এত খেয়ে ওঠা শক্ত। সঙ্গে সঙ্গে সে ভাবিল, ইহার অর্ধেক রান্নাও তাহাদের বাড়িতে বিশেষ কোনো পূজা-পার্বণ কি উৎসবেও কোনোদিন হয় না। বড়লোকেরা প্রত্যহ কি এইরূপ খাইয়া থাকে?

মহকুমায় ষড়্-মোক্তারের বাড়ি সে খাইয়াছে—ইহার অপেক্ষা সে অনেক ধারাপ। বহুলোক সেখানে খায়—সে একটা হোটেলখানা বিশেষ।

খাওয়ার পরে সে বাহিরে আসিতেছিল, ছেলেটি তাহাকে বলিল—আমুন, আমার আঁকা মাপ আর মঞ্জুর হাতে-গড়া মাটির পুতুল দেখে যান।

এই সময়ে লালবিহারীবাবু কোথা হইতে বেড়াইয়া ফিরিলেন। নিধুকে দেখিয়া ব্যস্ত হইয়া বলিলেন—খাওয়া হয়েছে বাবা?

—আজ্ঞে এই উঠলাম খেয়ে।

—বেশ পেট ভরেছে তো? আমি তো দেখতে পারলুম না, মাঠে একটি পৈতৃক জমি আজ তিন-চার বছর বেদখল করেছে, তাই দেখতে গিয়েছিলুম—

—না কাকাবাবু, সেজ্ঞে ভাববেন না। অতিরিক্ত খাওয়া হয়ে গেল।
খুড়ীমা ছিলেন বসে—

লালবিহারীদ্রাব্ ঘরের মধ্যে ঢুকিলেন—ছেলেটির নাম বীরেন, সে নিধুকে
অন্তঃপুরের একটা ছোট ঘরের মধ্যে লইয়া গিয়া বসাইল। কিছুক্ষণ পরে
দুইটি ঘরের মধ্যে ঢুকিয়া তাহার হাতে পানের ডিবা দিয়া বলিল—পান
খান দাদা—আমার পুতুল দেখেননি বুঝি ? দাঁড়ান দেখাই—

মঞ্জু একটা আলমারির ভিতর হইতে এক রাশ মাটির কুমির, কুকুর,
রাধাকৃষ্ণ, সিপাই প্রভৃতি বাহির করিয়া বলিল—দেখুন, কেমন হয়েছে ?

—ভারি চমৎকার। বাঃ—

মঞ্জু হাসিমুখে বলিল—আমাদের স্কুলে এসব তৈরি করতে শেখায়। আরও
একটা জিনিস দেখাব—কাল আসবেন তো ?

নিধু বলিল—না, সকালেই যেতে হবে। এখন নতুন মোক্তারীতে ঢুকে
কামাই করা চলবে না। তা ছাড়া কেস রয়েছে।

—বিকেলে এসে চা খাবেন কিন্তু।

—চা তো আমি খাইনে—

—চা না খান, জলখাবার খাবেন—সেই সময় দেখাব। আসবেন কিন্তু
দাদা অবিশ্টি—

এই সময় বীরেন ঘরে ঢুকিয়া বলিল—মঞ্জু কিন্তু বেশ গান করতে পারে।
শোনেননি বুঝি নিধুদা ? ওবেলা গান শুনিয়া দে না মঞ্জু—

মঞ্জু বেশ সপ্রতিভ মেয়ে। বেশ নিঃসঙ্কোচেই বলিল—উনি ওবেলা জল
খেতে আসবেন নেমস্তন্ন করেচি—সেই সময় শোনাব।

নিধু বাড়ি আসিলেই তাহার মা জিগগেস করিলেন—ভালো খেলি ?

—খুব ভালো।

—কি কি খেলি বল। গিন্নির সঙ্গে দেখা হল ?

—হ্যাঁ, তিনি তো খাবার সময়ে বসেছিলেন।

—আর কার সঙ্গে আলাপ হল ?

—আর ওই যে বীরেন বলে ছেলেটি, বেশ ছেলে ।

আশ্চর্যের বিষয়, নিধুর মনের প্রবলতম ইচ্ছা যে সে মায়ের কাছে মঞ্জুর কথা বলে, সেটাই কিন্তু সে বলিতে পারিল না । মঞ্জুর সম্পর্কিত কোনো উল্লেখই সে করিতে পারিল না ।

নিধুর মা বলিলেন—গিন্নির সঙ্গে আমার ইচ্ছে যে একটু আলাপ করি । বড়লোকের বউ, আলাপ রাখা ভালো ।

—তা তুমি গিয়ে আলাপ করলেই পার—তিনি কি তোমার এখানে আসবেন, তোমায় যেতে হবে ।

—একা যেতে ভয় করে—

—তুমি যেন একটা কি ! প্রতিবেশীর বাড়ি যাবে এতে ভয় কি ? বাঘ না ভালুক ? তোমায় টপ করে মেরে ফেলবে নাকি ?

—তুই যদি যাস, তোর সঙ্গে যাই—

—তা চল না । আমায় তো—ইয়ে ওরা বিকেলে জল খেতে বলেচে ওখানে—

নিধুর মা আগ্রহের সহিত বলিলেন—কে, কে বললে তোকে ? গিন্নি বললে নাকি ?

—হাঁ তাই—ওই গিয়ে ঠিক গিন্নি ছিলেন না সেখানে, তবে ওই গিন্নিই বলে পাঠালেন আর কি ।

—তোকে বোধহয় গিন্নির খুব ভালো লেগেচে—

মায়ের এই সব কথা বড় অস্বস্তিকর । নিধু দেখিতেছে চিরকাল তার মায়ের ব্যাপার—বড়লোক দেখিলে অত ভাউয়া-ভুইয়া পড়িবার যে কি আছে ! তাহাকে ভালো লাগিলেই বা কি, উহারা তো তাহার সহিত মেয়ের বিবাহ দিতে যাইতেছে না ! সুতরাং ভবিষ্য লাভ কি এসব কথা ? মুখে উত্তর দিল—তা কি জানি ! হয়তো তাই ।

নিধুর মূ সগর্বে বলিলেন—ভালো লাগতেই হবে যে। না লেগে উপায় কি ?

না, মা'র জ্বালায় আর পারিবার যো নাই। এত সরল আর ভালোমানুষ লোক হইলে আজকালকার কালে জগতে তাহাকে লইয়া চলাফেরা করাও মুশকিল।

পৃথিবীতে যে কত খারাপ, জ্বাচার, বদমাইস লোক থাকে, নিধুর ইতিপূর্বে কোনো ধারণা ছিল না সে সম্বন্ধে। কিন্তু সম্প্রতি মোক্তারীতে ঢুকিয়া সে দেখিতেছে। মা'র মতো সরলা এ পৃথিবীতে চলে না।

বেলা ছ'টার সময় বীরেন বাহির হইতে ডাকিল—নিধু দা, আসুন—ও নিধু দা—

নিধু বাহিরে আসিতেই বলিল—দেয়ি করে ফেললেন যে! মজু কতক্ষণ থেকে খাবার সাজিয়ে বসে—আমায় বললে ডাক দিতে।

নিধুর মনে হঠাৎ বড় আনন্দ হইল। এ অকারণ পুলকের হেতু প্রথমটা সে নির্ণয় করিতে পারিল না—পরে ভাবিয়া দেখিল, মজু তাহার জন্ম খাবার লইয়া বসিয়া আছে—এই কথাটা তাহার আনন্দানুভূতির উৎস।

—বেশ দাদা, এই বুঝি আপনার বিকেল ?

নিধু রোয়াকের একপাশে গিয়া গো-চোরের মতো বসিল। এবার সে আরও বেশি সঙ্কোচ বোধ করিতে লাগিল—কারণ বিকালে আরও দু-তিনটি মহিলা সাজগোজ করিয়া এদিক-ওদিক দ্রুত লঘুপদে ঘোরাফেরা করিয়া সংসারের ও রান্নাঘরের কাজকর্ম দেখিতেছেন।

—চা খাবেন না ঠিক ?

—না শরীর খারাপ হয় খেলে। অভ্যাস নেই তো—

—তবে থাক। একটু সরবৎ করে দেব ?

—ও সবের দরকার নেই, থাক। কিন্তু আমি সেই জন্তে আরও এলাম—

মঞ্জু বিন্ময়ের স্বরে বলিল—কি জন্তে ?

এটা মঞ্জুর ভান । নিধু কি বলিতেছে তাহা সে কথা পাড়িতেই বুঝিয়াছে ।

নিধু বলিল—তোমার গান শুনব—তা ছাড়া আমার মা আসবেন একুনি—
—জ্যাঠাইমা ! বাঃ, একথা তো বলেননি এতক্ষণ ?

মঞ্জু মাকে ডাক দিয়া বলিল—ওমা, শুনচো জ্যাঠাইমা পাশের বাড়ির,
আজ একুশি আসবেন আমাদের বাড়ি । গিয়ে নিয়ে আসব ?

—না, তোকে যেতে হবে কেন ? তুই বরং নিধুকে খাবার দে—পাশের
বাড়ি, তিনি ঠিক আসবেন এখন ।

মঞ্জু নিধুকে খাবার দিয়া ঘর হইতে চলিয়া গেল এবং পরক্ষণেই আবার
আসিয়া সামনে দাঁড়াইল ।

নিধু জিজ্ঞাসা করিল—তুমি কোন ক্লাসে পড় ?

—সেকেন ক্লাসে ।

—কোন স্কুলে ?

—সিমলে গার্লস হাইস্কুল ।

নিধু শিক্ষিতা মেয়ের সঙ্গে কখনো মেশে নাই । এসব পাড়াগাঁয়ে মেয়েরা
হাইস্কুলে পড়া দূরের কথা অনেকে বাংলা লেখাপড়াই ভালো জানে না ।
নিধুর মনে হইল সে এমন একটি জিনিস দেখিতেছে, যাহা সে কখনো
পূর্বে দেখে নাই । তাহার মনে চিরকাল সাধ ছিল ভালো লেখাপড়া
শিখিবে—কিন্তু দারিদ্র্য বশত সে সাধ পূর্ণ হইল না । তবুও লেখাপড়ার
কথা বলিতে সে ভালোবাসে । এ পাড়াগাঁয়ে লেখাপড়া জানা লোক নাই,
কলা কুমড়া চাষের কথা শুনিতে বা বলিতে তাহার ভালো লাগে না,
অথচ এখানকার গ্রাম্য মজলিসে ওসব কথা ছাড়া অগ্র বিষয়ের আলোচনা
করিবার লোক নাই ।

নিধু বলিল—আচ্ছা, তোমার হিষ্টি আছে ? এ্যাভিশনাল কি নিয়েচ ?

—এ্যাভিজনাল হিষ্ট্রিই তো। নিয়েচি আর সংস্কৃত।

—অক্কে না ?

উহু, ও সুবিধে হয় না আমার।

নিধু হাসিয়া বলিল—আমার মতন। আমারও তাই ছিল ম্যাট্রিকে। অক্কে আমারও তত সুবিধে হত না।

মধু হাসিয়া বলিল—সেদিক থেকে বেশ মিলেচে বটে ! আপনি কোন বছর ম্যাট্রিক দিয়েছিলেন ?

—আজ ছ'বছর হল—

—কোথায় পড়তেন ?

—মামারবাড়ি থেকে।

এই সময় মায়ের গলার আওয়াজ পাইয়া নিধু ব্যস্তভাবে বলিল—
মা এসেচেন—

মধু বলিল—আপনি খান—আমি দেখি—

খানিক পরে গিন্নির সহিত নিধুর মাকে রান্নাঘরের সামনের রোয়াকে বসিয়া কথা বলিতে দেখা গেল। নিধুর মা অত্যন্ত সঙ্কোচের সহিত কথা বলিতেছেন, পাছে তাঁহার কথার মধ্যে অত বড়লোকের গিন্নি কোনো দোষ ক্রটি ধরিয়া ফেলে এই ভয়েই যেন তিনি জড়সড়।

গিন্নি বলিলেন—আচ্ছা এখানে ম্যালেরিয়া কেমন ?

নিধুর মা বলিলেন—আছে বই কি দিদি। ভয়ঙ্কর ম্যালেরিয়া—

—এখানে বারোমাস কিস্ত বাস করা চলে না, যাই বলুন—

—আমাকে 'আপনি' বলবেন না দিদি, আমরা কি তার যুগিয়া ? আপনি বয়সেও বড়, মানেও বড়।

গিন্নি খুশি হইয়া বলিলেন—সে আবার কি কথা ? আচ্ছা তাই হবে।

তুমিই বলব এর পরে—

নিধুর মা বললেন—আপনি বলছেন বারোমাস বাস করা চলে না—বাস না করে যায় কোথায় সব ? এ গাঁয়ে কারো কি ক্ষমতা আছে ?

—সে যাই বল। আমি তো এই সাতদিনও আসিনি, এর মধ্যেই হাঁপিয়ে পড়েছি। ঠুঁকে বলছিলাম চল এখান থেকে যাই—উনি বলেন পৈতৃক ভিটেটা—এবার পুজোটা করব ভেবেছি—তা আমি বলি—চোখ-কান বুজে থাকি একটা মাস, আর কি করব ?

—আপনারা রাজা লোক দিদি, আপনাদের কথা আলাদা। আমরা আর যাব কোথায়, তেমন ক্ষমতাও নেই, সুবিধেও নেই। কাজেই কাদায় গুণ পুঁতে পড়ে থাকা—

—ঠুঁকে বলি, বালিগঞ্জে একটা বাড়ি করে ফেল এই বেলা।

—সে কোথায় দিদি ?

—বালিগঞ্জ কলকাতায়। খুব ভালো জায়গা। আমার কাকা আলিপুরে বদলি হলেন এবার—সবজ্জ ছিলেন দিনাজপুরে—আমায় বললেন, হৈম—জামাইকে বল আমার বাড়ির পাশে একটু জমি নিয়ে বাড়ি করতে। কাকা আজ বছর দুই বাড়ি কিনেছেন কিনা বালিগঞ্জে, দুই খুড়তুতো ভাই বড় চাকুরী করে, একজন মৃস্মক, একজন সবডেপুটি—খুব বড় ঘরে বিয়েও হয়েছে দুজনের। দান সামিগ্রি আর ফার্নিচার দুখানা ঘরে ধরে না—

এই সময় মঞ্জু আসিয়া নিধুর মাকে পায়ে ধুলা লইয়া প্রণাম করিল। গিম্মি বলিলেন—এটি আমার বড় মেয়ে। কলকাতায় পড়ে—

নিধুর মা মঞ্জুর দিকে চাহিলেন এবং সম্ভবত তাহার সাজগোজের পারিপাট্য ও রূপের ছটায় এমন আশ্চর্য হইয়া গেলেন যে আশ্চর্যবাদ থাক, কোনো কিছু কথা পর্বস্ত বলিতে তুলিয়া গেলেন।

গিম্মি বলিলেন—নিধুকে খাবার দিয়েচিল ?

মেয়ে বলিল—নিধুদা খাচ্ছে বসে। খুড়ীমা, আপনি চা খান তো ?

নিধুর মা বলিলেন—না মা, চা খাওয়ার অভ্যাস তো নেই।

নিধুর মায়ের প্রত্যেক কথায় ও ব্যবহারে প্রকাশ পাইতেছিল স্নেহ ইহাদের বাড়ি আসিয়া এবং ইহাদের সঙ্গে মিশিবার স্বযোগ পাইয়া তিনি একেবারে কৃতার্থ হইয়া গিয়াছেন।

মঞ্জু খানিকটা নিধুর মা'র কাছে থাকিয়া আবার নিধুর কাছে চলিয়া গেল। বীরেন সেখানে বসিয়া গল্প করিতেছিল।

বীরেন মঞ্জুকে দেখিয়া বলিল—নিধুদা তোকে কি গান করতে বলেচেন—

নিধু বলিল—ও বেলা বলেছিলে যে ! জল খাওয়ার সময়ে গান করবে—

মঞ্জু বেশ সহজ স্বরে বলিল—বেশ করব এখন। খুড়ীমা তো শুনবেন—
ওঁরা গল্প করচেন যে।

—আমি মাকে ডাকব ?

—না না এখন থাক ! আমি করব এখন গান, ততক্ষণ এঁদের গল্প হয়ে যাক।

নিধুর আগ্রহ বেশি হইতেছিল—মেয়েদের মুখে গান সে কখনো শোনে নাই। এ সব দেশে মেয়েরা গান গাহে না। মেয়ে হারমোনিয়ম বাজাইয়া পুরুষের সামনে গাহিতেছে, এ একটা নূতন দৃশ্য যাহা সে কখনো দেখে নাই।

কিছুক্ষণ পরে মঞ্জু সত্যিই হারমোনিয়ম বাজাইয়া গান গাহিল। অনেকগুলি গান। তাহার কোনো লজ্জা সঙ্কোচ নাই, বেশ সহজ, সরল ব্যবহার।

নিধুর মা তো একেবারে মুগ্ধ। মেয়েটির দিক হইতে তিনি আর চোখ ফিরাইতে পারেন না।

গান যে ধরনের, সে ধরনের গান তিনি কখনো শোনে নাই—অনেক

জায়গায় কথা বুঝিতে পারা যায় না—কি লইয়া গান—তাহাও বুঝা যায় না। শ্রামা-বিষয় বা রামপ্রসাদী গান নয়। দেহতত্ত্বও নয়। অবিশ্রি এতটুকু মেয়ের মুখে দেহতত্ত্বের গান ভালোও লাগিত না।

শুনিতে শুনিতে নিধুর মায়ের মনে হইল—তিনি যেন কোথায় মেঘলোকে চলিয়া যাইতেছেন উড়িয়া। সেখানে যেন বালাকালে তাঁহার বাপের বাড়িতে যেমন ফাস্তন-১৫ত মাসে শুকনো ধুরফুলের উড়ন্ত পাপড়ি ধরিয়া আনন্দ পাইতেন—বাবুর-হাটের সেই পুরুরের ধারে, সেই ফুলগাছতলায় বসিয়া বারো বছরের বালিকাটির মতো আবার ধুরফুলের পাপড়ি ধরিতেছেন—আবার সেই আনন্দভরা বালাকাল তাঁহার মেহময় পিতাকে লইয়া ফিরিয়াছে, যে পিতার মুখ মনের মধ্যে স্পষ্ট হইয়া এখন আর ফোটে না। কথাবার্তাও অস্পষ্টভাবে মনে পড়ে।

নিজের অজ্ঞাতসারে কখন নিধুর মা'র চোখে জল আসিয়া গেল।

ইতিমধ্যে হারমোনিয়মের আওয়াজ পাইয়া পাড়ার আরও অনেকগুলি ছোট ছোট ছেলেমেয়ে ছুটিয়া আসিয়াছিল; কিন্তু তাহারা বাড়ির মধ্যে ঢুকিতে সাহস না করিয়া দরজার সামনে ভিড় করিতেছে দেখিয়া মঞ্জু বীরেনকে বলিল—দাদা, ওদের ডেকে নিয়ে এস বাড়ির মধ্যে—

নিধুও মৃদু। মঞ্জুর মুখের গান শুনিয়া তাহার মনে হইল এ এমন এক ধরনের জীবন, যাহার মধ্যে সে এই প্রথম প্রবেশ করিল। জীবনে এত ভালো জিনিসও আছে! শুধু সাক্ষী দেখানো, কেস সাজানো, যত্ন-মোক্তারের ব্যবসার সম্বন্ধে উপদেশ—মক্কেল ও হাকিমকে তুষ্ট রাখিবার নানা কলাকৌশল সম্বন্ধে বক্তৃতা—বাড়ির দারিদ্র্য, অভাব অভিযোগ—এ সবের উদ্দেশ্যে এমন জগৎ আছে—আকাশ যেখানে নীল, সূর্যোদয় অরুণরাগারক্ত, সারাদিনমান বিহঙ্গ কাকলীমুখর। যেখানে উষেগ নাই, গাউনপরা উকীল-মোক্তারের ভিড় নাই, হাকিমদের গম্ভীর গলার

আওয়াজ নাই, জেরায় প্রতিপক্ষের মোক্তারের খুঁত চোখের দৃষ্টি নাই ।

নিধু বাঁচিল, সে বাঁচিয়া গেল আজ, জুগতের সহজে তাহার বিশ্বাস
বদলাইয়া গেল—সৌন্দর্যের অস্তিত্ব সে খুঁজিয়া পাইল এতদিনে ।

ইতিমধ্যে কখন নিধুর ছোট ভাই রমেশ আসিয়া দাদার কাছে দাঁড়াইয়াছে ।

নিধু বলিল—তুই কখন এলি রে ?

রমেশ হাসিয়া বলিল—এই এলাম—

আঙুল দিয়া দেখাইয়া বলিল—দিদির গলা শুনে—একবার ভাবলাম যাব
কি না যাব, তারপর আর পারলাম না—

নিধু বলিল—তা আসবিনে কেন ? বেশ করেচিস—

সে আরও তৃপ্তি পাইল যে তাহার মা ও রমেশ এমন গান শুনিতে পাইল,
কখনো শোনে না তো এ সব !

মধু বলিল—আপনার ছোট ভাই বুঝি ?

নিধু ঘাড় নাড়িল ।

—পড়ে ?

—পড়ার সুবিধে হয় না এখানে, তবে ওকে আমারবাড়ি রেখে কিংবা
নিজের কাছে নিয়ে গিয়ে এবার পড়াব—খুব বুদ্ধিমান ছেলে ।

—আমরা যদি কলকাতায় বাড়ি করি, আমাদের বাড়িতে রেখে
দেবেন না ?

মধুর উদারতায় নিধু মুগ্ধ হইয়া গেল । এ রকম কেহ বলে না । মধু
ছেলেমানুষ, মন এখনো সরল—তাই বোধ হয় বলিল । পরের ঝগড়া কে
সহজে আজকাল ঘাড়ে করিতে চায় ?

রমেশ লজ্জায় ঘাড় গুঁজিয়া বসিয়া রহিল ।

বীরেন বলিল—রমেশ, ফুটবল খেলতে পার ? একটা ফুটবল টিম
করব ভাবচি ।

নিধু রমেশের হইয়া উত্তর দিল—ফুটবল এখানে কে খেলবে ? অনেকে
চোখেও দেখেনি। তবে ও খেলা শিখে নিতে পারবে চট করে। গাছে
উঠতে, সঁতার দিতে, দৌড়াদৌড়িতে ও খুব মজবুত।

বাড়ি ফিরিয়া পর্বস্ত নিধুর মায়ের মন ছটফট করিতে লাগিল, জজবাবুর
বাড়ি যে তিনি ও তাঁহার ছেলেরা এত খাতির পাইয়া আসিল, কথাটা
কাহার কাছে গল্প করেন !

তাঁহার জীবনে এত বড় সম্মান আর কখনো কেহ তাঁহাকে দেয় নাই।
ওদের দরের লোকের সঙ্গে মিশিয়াছেনই বা কবে ?

পুকুরের ঘাটে গা ধুইতে গিয়া দেখিলেন পুৰপাড়ার প্রৌঢ়া জগোঠাকরুণ
বাসন মাজিতেছেন।

জগোঠাকরুণ গর্বিতা ও ঝগড়াটে প্রকৃতির বলিয়া গ্রামের সকলেই তাঁহাকে
সমীহ করিয়া চলে। তাহার উপর জগোঠাকরুণের অবস্থা ও ভালো। কিন্তু
কথাটা যে না বলিলেই নয়। নিধুর মা সহজভাবে ভূমিকা ফাঁদিলেন।

—ও দিদি, আজ যে এত দেরিতে বাসন মাজচ ?

জগোঠাকরুণ বাসনের দিকে চোখ রাখিয়াই বলিলেন—সময় পাইনি।
আজ ওবেলা দুজন কুটুপ এল বাড়িতে, তাদের জন্তে রান্নাবান্না করতে দেরি
হয়ে গেল। তারপর বড় ছেলে এসে বললে—মা, খাবার তৈরি করে দাও,
আটঘরার হাটে যাব। এই সব করতে বেলা গেল একেবারে—

নিধুর মা বলিলেন—আমারও আজ বড় দেরি হয়ে গেল। অল্প দিন এর
আগেই ঘাট সেরে চলে যাই—

জগোঠাকরুণ চুপ করিয়া আপন মনে বাসন মাজিতে লাগিলেন।

নিধুর মা পুনরায় বলিলেন—মজু কি চমৎকার গান করলে দিদি !

জগোঠাকরুণ মুখ তুলিয়া বলিলেন—কে ?

—~~জ~~ই যে জজবাবুর মেয়ে মজু। ওরা আজ খুব খাতির করেছে নিধুকে।

ওকে চা দ্বিমে খাবার দিয়ে জজবাবুর মেয়ে নিজে কাছে বসে গান শোনালে। বেশ লোক জজগিন্নিও—তিনি তো ভারি ব্যস্ত, বলেন—নিধুকে আগে দে জলখাবার, ও আমার ছেলের মতো। আমায় তো কাছে বসিয়ে কত সুখদুঃখের কথা—

কথাটা জগোষ্ঠাকরণের তেমন ভালো লাগিল না।

তিনি মুখ ঘুরাইয়া বলিলেন—বাদ দাও ওসব বড়মাতুষের কথা। বলে, বড়র পরীতি বালির বাধ, ক্ষণে হাতে দড়ি ক্ষণেক চাঁদ। কারু বাড়ি যাইওনে, সময়ও নেই। ওদের সঙ্গে মেলামেশা কি আমার সঙ্গে? তুমি বড়লোক আছ, বড়লোক আছ—আমি কেন যাব তোমার বাড়ি খোশামোদ করতে? আমার ও স্বাভাব নেই—তো তোমরা বৃষ্টি দেখা করতে গিয়েছিলে?

—ওমা, এমনি দেখা করতে যাব কেন? নিধুকে যে জজবাবুরা নেমস্তন্ন করে নিয়ে গিয়ে দুপুরবেলা কত যত্ন করে খাওয়ালে। আবার বিকেলে জলখাবারের নেমস্তন্ন করলে তার ওপর। নিধু তো লাজুক ছেলে—কিছুতেই যাবে না, ওরাও ছাড়বে না। শেষে জজবাবুর ছেলে নিজে এসে আমাকে, নিধুকে ডেকে নিয়ে গেল। একেবারে নাছোড়বান্দা—

জগোষ্ঠাকরণ সংক্ষেপে বলিলেন—বেশ।

কিছুক্ষণ দুজনেই চুপচাপ। পরে নিধুর মা-ই নীরবতা ভঙ্গ করিয়া বলিলেন—না, বেশ লোক কিন্তু ওরা।

জগোষ্ঠাকরণ মুখ খিঁচাইয়া কহিলেন—কি জানি বাপু, কারো ছন্দাংশেও কোনদিন থাকিনি—থাকবও না। বেশ হোক, খারাপ হোক, যারা আছে, তারাই আছে। মেয়েটার নাম কি বললে?

—মঞ্জু। কি চমৎকার মেয়ে দিদি!

—বয়েস কত?

—এই পনেরো-ষোলো হবে। ধপধপে ফর্সা রঙ কি! চেহারা কি।

—তাতে তোমারই বা কি আর আমারই বা কি? বেল পাকলে কাকের
কি? ওরা কি নিধুর সঙ্গে ওদের মেয়ের বিয়ে দেবে?


—না, না—তা আমি বলচিনে। তাই কি কখনো দেয়?

—তবে চূপ করে থাক। চেহারা হবে না কেন বল? তোমার মতো
আমার মতো পুঁইশাক খেয়ে তো ওরা মাহুষ নয়? নির্ভাবনায় ছুধ-ঘি
খেলে তোমারও চেহারা ভালো হত, আমারও চেহারা ভালো হত।

—সে কথা তো ঠিক দিদি।

—অত বড় পনেরো-ষোলো বছরের দিক্কা মেয়ে যে নিধুর সামনে মা-
বাপের সামনে হারমোনি বাজিয়ে গান করলে—এতেই দেখ না কেন?
তোমার বাড়ির মেয়ে আমার বাড়ির মেয়ে করুক দিকি, কালই গাঁয়ে
টি-টি পড়ে যাবে এখন। বড়মাহুষের ওপর কথা বলে কে? ওরা জানচে
আজ এসেচি এগাঁয়ে, কাল যাব চলে হিল্লি-দিল্লি—আমাদের নাগাল পায়
কে? তাই বলি ওদের সঙ্গে আমাদের মিশতে যাওয়াই বেহুবি—আমি
যাচি দেখাশুনো করচি ডেবে, ওরা ভাবে খোশামোদ করতে আসচে।

শেষের দিকের কথায় বেশ কিছু শ্লেষ মিশাইয়া জগোঠাকরণ তাঁহার
বক্তৃতা সমাপ্ত করিলেন এবং মাজা বাসনের গোছা তুলিয়া লইয়া পুকুরের
ঘাট ত্যাগ করিলেন।



সকালে নিধু চলিয়া যাইবে বলিয়া নিধুর মা ভোরে রান্না চড়াইয়াছিলেন ।
বড় মেয়েকে ডাকিয়া জিজ্ঞাসা করিলেন—তোর দাদাকে নেয়ে আসতে
বল ও পুঁটি—

পুঁটি বলিল—বড়দা, এখনও বিছানা থেকে ওঠেনি—

—সে কি রে ? ওকে উঠতে বল । কখন নাইবে, কখন থাকে—বেলা
দেখতে দেখতে হয়ে গেল ।

কিছুক্ষণ পরে নিধু স্নান সারিয়া আসিয়া খাইতে বসিল ।

নিধুর মা বলিলেন—যাবার সময় একবার ওদের সঙ্গে দেখা করে যা না ?

নিধু বিস্ময়ের স্বরে বলিল—কাদের সঙ্গে ?

—জজবাবুদের—ওই ওদের—গিমির সঙ্গে, মঞ্জুর সঙ্গে—

—হ্যাঁ, আমি আবার যাই এখন ! কি মনে করবে, ভাববে জলখাবার
খেতে এসেচে সকালবেলা ।

—তোর যেমন কথা ! তা আবার কেউ ভাবে বুঝি ? যা না ?

—আমার সময় নেই । ক' কোণ রাস্তা যেতে হবে জানানো ?

মুখে একথা বলিলও নিধু মনে মনে ভাবিতেছিল মঞ্জুর সঙ্গে একবার
যাওয়ার সময় দেখাটা হইলে মন্দ হইত না । কিন্তু মা বলিলেই তো
সেখানে যাওয়া যায় না ।

নিধুর মা বলিলেন—সামনের শনিবারে আসবি কিন্তু । আর পুঁটির সঙ্গে
ছ'গজ ফিতে কিনে আনিস—রয়েশের সঙ্গে এক দিশ্বে কাগজ । ও ভয়ে
তোকে বলতে পারে না । আমায় এসে চুপি চুপি বলচে । আমি

বললাম—তুই গিয়ে তোর দাদার কাছে বল না ? বললে—না ম্যু আমার ভয় করে ।

নিধু মায়ের পায়ের ধূলা লইয়া রওনা হইবার পূর্বে ছোট ভাই-বোনেরা আসিয়া কাঁড়াকাড়ি করিয়া পায়ের ধূলা লইবার চেষ্টায় পরস্পর ধাক্কাধাক্কি করিতে লাগিল । নিধু শাসনের স্বরে বলিল—রমু, চব্বিশখানা ইংরিজি-বাংলা হাতের লেখার কথা যেন মনে থাকে । শনিবারে এসে না দেখলে পিঠের ছাল তুলব ।

রমেশ দাদার সম্মুখ হইতে সরিয়া গেল । বড় লোকের সম্মুখে পড়িলেই যত বিপদ, আড়ালে থাকিলে বহু হান্ধামার হাত হইতে রেহাই পাওয়া যায় ।

পথে পা দিয়া নিধু একবার জজবাবুর বাড়ির দিকে চাহিল । এখনো বোধ হয় কেউ ওঠে নাই—বড়লোকের বাড়ি, তাড়াতাড়ি উঠিবার গরজ্জই বা কিসের ।

ছায়াভরা পথে শরৎ-প্রভাতের স্নিগ্ধ হাওয়ায় যেন নবীন আশা, অপরিচিত অমুভূতি সারা দেহের ও মনের নব পরিবর্তন আনিয়া দেয় । গাছের ডালে বগ্ন মটরলতা ছলিতেছে, তিৎপল্লার ফুল ফুটিয়াছে—এবার বর্ষায় যেখানে-সেখানে বনকচুর ঝাড়ের বৃদ্ধি অত্যন্ত যেন বেশি । নিধু আশ্চর্য হইয়া ভাবিল—এসব জিনিসের দিকে তাহার মন তো কখনো তেমন যায় না, আজ ওদিকে এত নজর পড়িল কেন ?

শরৎ-প্রভাতের স্নিগ্ধ হাওয়ার সঙ্গে মিশিয়া আছে কাল বিকালে শোনা মঞ্জুর-গানের স্বর ।

সে স্বর তাহার সারারাত কানে ঝঙ্কার দিয়াছে—শুধু মঞ্জুর গানের স্বর নয়—তাহার স্বন্দর ব্যবহার, তাহার মুখের স্বন্দর কথা—ঘাড় নাড়িবার বিশেষ ভঙ্গিটি । বড় বড় কালো চোখের চপল চাহনি ।

সত্যই রূপসী মেয়ে মঞ্জু। মহকুমার টাউনে তো কত মেয়ে দেখিল—অমন মুখ এ পর্যন্ত কোনো মেয়েরই সে দেখে নাই জীবনে। মঞ্জুর সঙ্গে দেখা না হইলে অমন ধারা রূপ যে মেয়েদের হইয়া থাকে—ইহার মধ্যে অসাধারণত কিছু নাই—ইহা সে ধারণা করিতে পারিত না।

মঞ্জু স্থলে পড়ে। স্থলে-পড়া মেয়ে সে এই প্রথম দেখিল। মেয়েদের এমন নিঃসঙ্কোচ ধরন-ধারণ সে কখনো কল্পনা করিতে পারিত না। এসব গ্রামের অশিক্ষিত কুরুপা মেয়েগুলো এমন অকালপক যে বারো-তেরো বছরের পরে জ্যেষ্ঠ ভ্রাতা বা পিতৃব্য সমতুল্য প্রতিবেশীর সামনে দিয়া চলাফেরা করিতে বা তাহাদের সম্মুখে বাহিরে হইতে সঙ্কোচ বোধ করে।

নিধুর কি ভালোই লাগিয়াছে মেয়েটিকে !

আচ্ছা, অত বড় লোকের মেয়ে সে—তাহার মতো সামান্য অবস্থার লোকের প্রতি অত আদর যত দেখাইল কেন ? জীবনে এধরনের ব্যবহার কোনো অনাস্বীয় মেয়ের নিকট হইতে সে কখনো পায় নাই।

মঞ্জুর সহিত আবার যদি দেখা হইত আজ সকালটিতে !

সামনের শনিবারে—তবে একটা কথা। সামনের শনিবারে মঞ্জু নাও থাকিতে পারে। সে স্থলের ছাত্রী, কতদিন স্থল কামাই করিয়া এখানে বসিয়া থাকিবে ? যদি চলিয়া যায় ?

কথাটা ভাবিতে নিধুর যেন রীতিমতো বেদনা বোধ হইতে লাগিল। পরের মেয়ের প্রতি এ ধরনের মনোভাব তাহার এই প্রথম। সান্নাধ্য নেশায় আচ্ছন্নভাবে কাটিয়া গেল নিধুর। সামনে ওই সারি সারি আড়ত দেখা দিয়াছে—টাউন আর আধমাইল পথ।

নিজের বাগায় পৌঁছিয়া সে দেখিল বাড়িওয়ালার সরকার তাহার জন্ত অপেক্ষা করিতেছে।

নিধুকে দেখিয়া বলিল—মোক্তারবাবু, বাড়ি থেকে আসচেন ?

—হ্যাঁ। কালীবাবু কি ভাড়ার জন্তে বসে আছেন ?

—আজ বাবু বললেন মোক্তারবাবুর কাছ থেকে ভাড়াটা নিয়ে আসতে।

—স্মার দুদিন যাক। বাড়ি থেকে আসচি, হাতে কিছু নেই। বুধবারে আসবেন—

কোট্টে যত্ন-মোক্তার তাহাকে বলিলেন—ওহে, একটা জামিননামায় সই করতে হবে।

—জামিন মূভ্ করলে কে ?

—আমি করলাম। পাচশো টাকার জামিন। যা আদায় করতে পার।

—আপনি বলে দিন। ভালো লোক তো ?

—কপাল ঠুকে জামিন হয়ে যাও। ফি ছাড় কেন ?

—তা নয়, আমি বলচি না পালায় শেষকালে। বেশি টাকার জামিন তাই ভয় হয়।

—কোনো ভয় নেই।

নতুন মোক্তার সে, জামিননামার ফি প্রধান সম্বল। যত্নবাবু অমুগ্রহ করেন বলিয়া তা মেলে—নতুবা তাহাই কি স্থলভ ? এক মাসের মধ্যে একটিবার সে জুনিয়ার হইয়া একটি মোকদ্দমায় জামিনের দরখাস্ত দাখিল করিয়াছিল। এ ব্যবসা চলিবে কিনা কে জানে ? বুধবার বাড়িভাড়া দিবে তো বলিল—কিন্তু দিবে কোথা হইতে ?

মোক্তার-বারের ঘরের এক কোণে সাধন-মোক্তার সাক্ষী পড়িতেছেন—
—অর্থাৎ যে মিথ্যার তালিম একবার সকালে দিয়া আসিয়াছেন—
এখন আবার তাহা সাক্ষীদের মনে আছে কিনা তাহারই পরীক্ষা লইতেছেন।

সাধনবাবু বলিলেন—এই যে নিধিরাম ! বাড়ি থেকে এলে নাকি ?

নিধু নীরসকণ্ঠে বলিল—এই এখন এলাম। সব ভালো ?

—ভালো, আর কই তেমন ? বাতে ভুগচি ! তোমার সঙ্গে কথা আছে একটা।

—কি বলুন ?

—এখন নয়। তিনটের পর ঘর একটু নিরিবিচি হলে তখন বলব। চলে যেও না যেন।

—আচ্ছা, আমি একবার যত্নবাবুর সঙ্গে দেখা করে আসি। কাজ আছে।

তিনটার পর ত্রিফহীন মোক্তারের দল বড় কেউ বার-লাইব্রেরীতে উপস্থিত থাকে না। থাকেন দু-একজন প্রবীণ ও পসারওয়ালা মোক্তার, তাঁহাদের কেস থাকে—মক্কেলকে শিখাইতে-পড়াইতে হয়। হাকিমের এজলাসে অকারণেও দু-একবার ঢুকিয়া অনাবশ্যক মিষ্ট কথাও দু-একটা বলিতে হয়।

নিধুর আজ মন তত ভালো ছিল না। সে তিনটার কিছু পূর্বে লাইব্রেরীতে ফিরিয়া দেখিল—হরিবাবু মোক্তার বসিয়া বসিয়া ধরঙ্গী-মোক্তারের সঙ্গে কোর্টে সেদিন প্রতিপক্ষের সাক্ষীকে কি করিয়া জেরায় জব্দ করিয়াছেন—তাহারই বিস্তারিত বর্ণনা দিয়া যাইতেছেন। ধরঙ্গী জুনিয়ার মোক্তার, হরিবাবুর কাছে জামিনটা-আসটার আশা রাখে—সে বেচারী ঘন ঘন সমর্থনসূচক ঘাড় নাড়িতেছে।

হরিবাবু বলিলেন—আরে নিধিরাম যে ! কোর্টে দেখলাম না ?

—কোর্টে দেখবেন কি বলুন হরিদা। আমরা হলাম তুণভোজী জীব—আপনারা বাঘ ভালুক, আপনাদের ছেড়ে আমাদের কাছে কি মক্কেল ঘেঁষে যে হাকিমের এজলাসে সওয়াল-জবাব করতে যাব ?

হরিবাবু সহাস্তবদনে বলিলেন—তোমার উপমাটা লাগসই হল না যে ! তুণভোজী জীবের মধ্যে হাতিও যে পড়ে।

—আজ্ঞে তা পড়ে। তবে আমাদের ওজন কম, কাজেই হুতি নই একথা বুঝতে দেরি হয় না। যাদের ওজন বেশি, তাঁরা ওটা হবার দাবী করিতে পারেন।

—চল হে ধরণী যাওয়া যাক, বলিয়া হরিবাবু উঠিলেন।

কিছুক্ষণ পরে সাধন ভট্টাচার্য ঘরে ঢুকিয়া এদিক-ওদিক চাহিয়া বলিলেন—কেউ নেই ঘরে? হ্যাঁ, তোমার সঙ্গে একটা কথা আছে।

—কি বলুন?

—তুমি বিয়ে করবে?

নিধু আশ্চর্য হইয়া বলিল—কেন, বলুন তো?

—আমার একটি ভাইঝি আছে—দেখতে-শুনতে—মানে-গেরস্তায়ের উপযুক্ত। রান্নাবান্না—

নিধু বাধা দিয়া বলিল—খুব ভালো পারে বুঝলাম। কিন্তু আমি বিয়ে করে খেতে দোব কি? পসার কি রকম দেখচেন তো?

সাধন ভট্টাচার্য হাসিয়া বলিলেন—ওহে, ওসব কথা ছোকরা মাঝেই বিয়ের আগে বলে থাকে। আর মোক্তারীর পসার একদিনে হয় না। আমি চব্বিশ বছর এই কাজ করে চুল পাকিয়ে ফেললাম, আমি সব জানি। তুমি যখন যত্নদার মতো মুরুবি পেয়েচ, তোমার পসার গড়ে উঠতে ছ-বছরও লাগবে না। ঢুকেচ তো মোটে একমাস। এখনি বিগ্ ফাইভদের অন্ন মারবার আশা কর?

—যত্নবাবুর ওপর ভরসা করে আমার মতো ব্রিফ্লেস্ মোক্তারের বিয়ে করা চলে না।

—খুব চলে। তা ছাড়া আমি তোমায় সাহায্য করব—আমার জামাইকে আমি দেখতে পারব।

ইহাতে নিধু খুব আশাবিহীন হইল না, কারণ সাধন-মোক্তারের পসার

এমন কিছু লোভনীয় ধরনের নয়। সে বলিল—না দাদা, ওসব আমাদের
সাজে না—আপনিই ভেবে দেখুন না ?

—তোমার সংসারে কে কে আছেন ?

—বুড়ো বাবা, মা—মানে আমার সংমা, একটি বৈমাত্র ভাই, আর
আমার ক’টি ভাই-বোন।

—বৈমাত্র ভাইয়ের ব্যয় কত ?

বুদ্ধিমান নিধু বুদ্ধি সাধন-মোক্তার আসলে তাহার সংমার ব্যয়
জানিবার জন্য এই প্রশ্নটি করিয়াছেন সুতরাং সে বলিল—তার ব্যয় এই
চোদ্দ-পনেরো, তবে আমার সংমা আমাকে মাহুষ করে এসেছেন
ছেলেবেলা থেকে। মামার কথা আমার মনেই পড়ে না।

—তুমি এই রবিবারে আমার বাড়ি খাবে।

—সে তো হয় না। শনিবারে যে বাড়ি যেতে হবে—

—না, না, এই শনিবারে তো গিয়েছিলে। যেতেই হবে—না গেলে
শুনব না। এক শনিবার না হয় নাই গেলে বাড়ি ?

নিধিরাম আরও দু-একবার আপত্তি করিল—কিন্তু সাধন-মোক্তার তাহার
কথায় আমল দিলেন না। নিধিরাম ভালোমাহুষ ও লাজুক, বারের
অন্ততম প্রবীণ মোক্তার সাধন ভট্টাচার্যের মুখের উপর জোর করিয়া না
বলিতে পারিল না। ঠিক হইয়া গেল নিধিরাম রবিবার সকালে উঠিয়া
তাঁহার বাসায় যাইবে, সেখানেই চা খাইবে—তারপর মধ্যাহ্ন-ভোজন
করিয়া চলিয়া আসিবে।

বাসায় আসিয়া নিধিরাম মনমরা হইয়া বিছানায় শুইয়া পড়িল। এ আকার
কোথা হইতে কি উপসর্গ আসিয়া জুটিল দেখ ! কোথায় সে শনিবারের
অপেক্ষায় আঙুলে দিন গুণিতেছে, কোথা হইতে বুড়ো সাধন ভট্টাচার্য কি
বাদ সাধিল।

.. সে বুঝিতে পারিয়াছে। মঞ্জুর সহিত আর তাহার দেখা হইবে না। হয়তো সামনের সোমবারেই সে কলকাতায় তাহার মামারবাড়ি চলিয়া যাইবে। এ শনিবারে গেলে দেখাটা হইত। এবার যদি দেখা না হয়, তবে আবার সেই পূজার ছুটি ছাড়া মঞ্জু নিশ্চয়ই আর বাড়ি আসিবে না। তাহার এখনো তো কতদিন বাকি।

মাথাটা একটু প্রকৃতিস্থ হইলে সে ভাবিল, মঞ্জুকে এমন করিয়া সে দেখিতে চায় কেন? কেন তাহার মন এত ব্যাকুল সেজ্ঞা? মঞ্জুর সঙ্গে দেখা করিয়া লাভ কি? আচ্ছা, এবার না হয় সে দেখাই পাইল—কিন্তু জঙ্ঘবাবু যদি আর গ্রামে পাঁচ বছর না আসেন, যদি আদৌ আর না আসেন—তবে মঞ্জুর সঙ্গে দেখাশোনা তো এমনিই বন্ধ হইয়া যাইবে। কিসের মিথ্যা মোহে সে রঙিন স্বপ্ন বুনিতোছে?

রবিবারে সাধন-মোক্তার আর্টটো বাজিতে না বাজিতে নিধুর বাসায় আসিয়া হাজির হইলেন। নিধু বলিয়া বলিয়া যত্ন-মোক্তারের বাড়ি হইতে আনা ক্যালকাটা ল' রিপোর্ট পড়িতেছিল। সাধন দেখিয়া বলিলেন—কি পড়চ হে? বেশ, বেশ। নিজের উন্নতি নিয়েই থাকতে হবে। যতদূর বই? তা ছাড়া আর কে এখানে অত বই কিনবে বল?

নিধু বলিল—বন্ধন, একটু চা খাবেন না?

—না, না, তুমিই আমাদের বাড়ি গিয়ে চা খাবে—সব ঠিক করে রেখেচে মেয়েরা। ওঠ—

সাধন-মোক্তারের বাড়ি টাউনের পূর্বপ্রান্তে টিকাপাড়ায়। হুজনে হাঁটিয়া আসিলেন, নিধু বাসায় চেহারা ও আসবাবপত্র দেখিয়া বুঝিল সাধন-মোক্তারের অবস্থা যে বিশেষ ভালো তাহা নয়। বাহিরের ঘরে একখানা ভাঙা তক্তপোষের আধ-ময়লা ফরাসের উপর বসিয়া সাধনের মুহুরী কুপারাম

বিশ্বাস ক্ষোভাপড়া করিতেছে—একদিকে মকেলদের বসিবার নিষিদ্ধ একখানি কাঠের বেঞ্চি পাতা। একটা পুরোনো আলমারিতে সামান্য দামের টিপকলের তালি লাগানো—ঘরের দোরের বাঁ দিকে তামাক খাইবড়ের সরঞ্জাম, জায়গাটা টিকের গুঁড়ো, তামাকের গুল, আধপোড়া দেশলাই—কাটি পড়িয়া রীতিমতো নোংরা। দেয়ালে স্থানে স্থানে পানের পিচের দাগ।

নিধু বাহিরে গিয়া বসিতেই কুপারাম বিশ্বাস অত্যন্ত বিনয়ের সঙ্গে দাঁত বাহির করিয়া বলিল—আস্থন বাবু, এ শনিবারে বুঝি বাড়ি যাননি ? বেশ। বাবু, সোনাতনপুরের মারামারির কেসে কি আপনার কাছে লোক গিয়েছিল ?

নিধু বলিল—না, যতুবাবুর কাছে গিয়েচে এক পক্ষ স্ত্রী—আমাদের জামিননামা সম্বল, সেটা পাবই। পক্ষ কি আমাদের মতো জুনিয়ার মোস্তারের কাছে যায় ?

কুপারাম বিনয়ে গলিয়া গিয়া দুহাত কচলাইয়া বলিতে লাগিল—হেঁ হেঁ বাবু, ওটা কি কথা—আপনার মতো লোক—ইত্যাদি।

নিধুর মনে হইল কুপারাম যে তাহাকে অতখানি বিনয় প্রদর্শন করিয়া খাতির করিতেছে—ইহার মূলে রহিয়াছে তাহার সহিত সাধন-মোস্তারের পরিবারের বৈবাহিক সম্বন্ধের সম্ভাবনা। নতুবা প্রবীণ সাধন-মোস্তারের মুহুরী ঘুঘু কুপারাম বিশ্বাসের কথা নয় তাহার প্রতি এতটা হাত কচলাইয়া সম্মম দেখানো। কই, বার-লাইব্রেরীতে গত দেড় মাসের মধ্যে কুপারাম কোনোদিন তাহার সঙ্গে ছুটি কথাও বলে নাই তো !

সাধন বাড়ির ভিতর হইতে আসিয়া বলিলেন—একটা বালিশ দেবে. কি নিধিরাম ? কষ্ট হচ্ছে বসতে !

নিধিরাম হাসিয়া বলিল—আজ্ঞে না, বালিশ কি হবে আমার ? আপনি বলুন একটা আনান—

এই সময়ে চাকরে একখানা রেকাবিতে লুচি, আলুভাজা, পটলভাজা, দুটি সন্দেশ এবং এক বাটি চা আনিয়া নিধুর সামনে রাখিল। সাধন ব্যস্ত হইয়া বলিলেন—জল, জল নিয়ে আয় এক গ্লাস—আর ও'রে শোন, পান দুটো অমনি—পান—

নিধু জানাইল সকালবেলা সে পান খায় না। সাধনকে জিজ্ঞাসা করিল—আপনি খাবেন না ?

—নাঃ, আমার অম্বল। কিছু সহি হয় না, কাল রাতে খেয়েছি, এখনো পেট ভার। তুমি খাও—তোমরা ছেলে-ছোকরা মাছুষ। আরও লুচি দেবে ?

—কি যে বলেন ! আর কিছু দিতে হবে না। আর দিলে খাওয়া যায় ?

চা পানের পরে এ-গল্লে ও-গল্লে বেলা প্রায় দশটা সাড়ে-দশটা হইয়া গেল। সাধন বলিলেন—তাহলে নিধিরাম এবাবে স্নানটা করে নাও এখানেই।

ও, নেয়ে এসেচ ? তবে আমি একবার বাড়ির মধ্যে থেকে আসি।

কিছুক্ষণ পরে আসিয়া তিনি নিধুকে বাড়ির মধ্যে ডাকিয়া লইয়া গেলেন।

ক্ষুদ্র বাসা, দু-তিনখানি মাত্র ঘর, কিন্তু বাসায় লোকজন ও ছেলে-মেয়ে নিত্যস্ত মন্দ নয় সংখ্যায়। নিধু মনে মনে ভাবিল—বাবা, এ পঞ্চপাল সব থাকে কোথায় এই ক'টা ঘরে ?

বারান্দায় দুখানি কার্পেটের আসন পাতা। একখানিতে নিধুকে বসাইয়া সাধন তাহার পাশের আসনটিতে বসিয়া বলিলেন—ও বুড়ি, নিয়ে এস মা—

একটি চোদ্দ-পনেরো বছরের না-ফর্সা, না-কালো রঙের রোগা গড়নের মেয়ে দুজনের সামনে ভাতের থালা নামাইয়া চলিয়া গেল এবং পুনরায় আর একখানা থালার ওপর বাটি সাজাইয়া ঘরে ঢুকিয়া দুজনের সামনে তরকারির বাটিগুলি স্থাপন করিল। তখন সে চলিয়া গেল বটে, কিন্তু সাধন তাহাকে বেশিক্ষণ চোখের আড়ালে থাকিতে দিলেন না। কখনো

মুন, কখনো লেবু, কখনো জল ইত্যাদি এটা-সেটা আনিবার আদেশ করিয়া সব সময় তাহাকে ঘর-বার করাইতে লাগিলেন। সে এই থাকে, এই যায়, আবার আসে সাধনের ডাকে। নিধু মনে মনে হাসিল, সে ব্যাপারটা আগেই বুঝিয়া লইয়াছে—এই সেই ভাইঝিটি, যাহাকে কৌশল করিয়া দেখাইবার জগুই আজ এখানে তাহাকে খাওয়াইবার এই আয়োজন। এমন কি নিধুর ইহাও মনে হইল পাশের ঘরের কবাটের ফাঁক দিয়া বাড়ির মেয়েরাও তাহাকে দেখিতেছেন। একবার তো একজোড়া কোতুহলী চোখের সহিত অতি অল্পক্ষণের জগু তাহার চোখোচোখিই হইয়া গেল।

সাধন বাহিরে আসিয়া বলিলেন—নিধিরাম, তুমি আমার সামনে লজ্জা করো না, তামাক খাও তো চাকরে দিয়ে যাচ্ছে—রুপারাম, যাও গিয়ে নেয়ে নাও গে—বেলা হয়েছে অনেক।

নিধিরাম বিড়িটি পর্যন্ত খায় না। সে বলিল—আমি খাইনে, আমি বরং পান আর একটা—

—একটা কেন তুমি চারটে খাও—ওরে ও ইয়ে—আরও পান নিয়ে—সাধন-মোক্তার খুব ব্যস্ত হইয়া পড়িলেন।

রুপারাম মুহুরীকে সরাইয়া দেওয়া হইয়াছে, ঘরে কেহ নাই—সাধন একটু উল্খস করিয়া নিধুকে জিজ্ঞাসা করিলেন—তাহলে নিধিরাম আমার ভাইঝিকে কি রকম দেখলে?

নিধিরাম আশ্চর্য হইবার ভান করিয়া বলিল—কই, কে বলুন তো?

সাধন-মোক্তার বলিলেন—বেশ, ওই তো তোমাকে পরিবেশন করলে?

—ও! তা—তা বেশ, ভালোই। দিবা মেয়েটি।

এটা অবশ্য নিধু বলিল নিছক ভদ্রতা ও শোভনতার দিক লক্ষ্য করিয়া—কোনো প্রকার বৈবাহিক মনোভাব ইহার মধ্যে আদৌ ছিল না। সাধন

কথা শুনিয়া খুশি হইয়াছিলেন বলিয়া মনে হইল নিধুর। কিন্তু এ সম্বন্ধে তিনি আপাতত কোনো কথা না উঠাইয়া কয়েকদিন পরে আবার তাহাকে জীকিয়া পাঠাইলেন।

নিধু গিয়া দেখিল সাধন-মোক্তার আসামী পড়াইতেছেন। সকালবেলা, মক্কেলের ভিড় যাহাকে বলে তাহা না থাকিলেও দু-পাঁচটি মক্কেল গরুর গাড়ি করিয়া দূর গ্রাম হইতে আসিয়াছে।

—বস নিধিরাম, একটু বস। আমি কাজ সেরে নিই—তারপর বল তোমায় মেরেছিল কেন ?

যাহাকে শিখানো হইতেছে সে বৃদ্ধা, মারপিটের নালিশ করিতে আসিয়াছে, সঙ্গে দু-তিনটি প্রতিবেশীও আনিয়াছে। বৃদ্ধা শিক্ষা মতো বলিয়া যাইতে লাগিল—আমার বাছুর ওনার ধানক্ষেতে গিয়ে নেমেছিল, তাই উনি মারামারি করে বাছুরডাকে, আমি তাই দেখে বকি ওনাকে—

—দাঁড়াও দাঁড়াও, সব ভুলে মেরে দিলে ? তুমি বকবে কেন ? তুমি কি বললে ?

—আমি দু-একটা গালমন্দ দেলাম, বুড়োমানুষ, মুখি এখন তো আর ছুট নেই—

—ওকথা বললে তোমার মোকদ্দমা কাং হবে—কি শিখিয়ে দিলাম ? বলবে, আমি বললাম ওঁকে, তুমি বাছুর মারছ কেন ? তোমার ধান খেয়ে থাকে তুমি পণ্টঘরে দাওগে যাও—মারো কেন ?

বুড়ি বলিল—হঁ।

সাধন-মোক্তার মুখ খিঁচাইয়া বলিলেন—কি বিপদেই পড়েছি রে ? ‘হঁ’ কি ? কথাটা বলে যাও আমার সঙ্গে সঙ্গে। তুমি কি বললে বল ?

—এই বললাম, তুমি বাছুর মারচ কেন, আমার আজ দুই জোয়ান বেটা

বেঁচে থাকুক, তবে কি তুমি আমার বাছুরের গায়ে হাত দিতি—তোমারও
যেন একদিন এমনি হয়—

—আহা হা—কোথাকার আপদ রে ! জোয়ান বেটার কথায় কি দরকর
আছে ? জোয়ান বেটা মরুক বাঁচুক কোটের তাতে কি ? বল আমি
বললাম—বাছুর তুমি মারচ কেন, পণ্টঘরে দাও যদি অনিষ্ট করে থাকে—
—হুঁ—

—আবার বলে হুঁ ! আমি যা বলে দিলাম তা বলে যাও না বাপু, এখানে
আমার সময় নষ্ট করবে আর কতক্ষণ, দু-ঘণ্টা তো হয়ে গেল। তারপর যা
শিখিয়ে দিলাম, কোর্টে গিয়ে এজাহারের সময় সব ভুলে তাল পাকিয়ে—
ভোঁতা মুখ নিয়ে বাড়ি ফিরে যেও এখন। তুমি ওকথা বলতে সে তোমায়
কি বললে ?

—বললে—ধান আমার যা লোকসান হয়েছে পণ্টঘরে দিলি তা পূরণ হবে
না—ওর দাম দিতি—

—ওরে না বাপু না ! ও কথা বললে মোকদ্দমা সাজানো যাবে না। বলে
দিলাম হাজার বার করে যে ! কতবার শেখাব এক কথা ? বল—আমার
কথার উত্তরে সে আমায় অশ্লীল ভাষায় গালাগালি দিলে—

—কি বলব বাবু—সে আমায় কি বললে ?

—এমন গালাগাল দিলে যা হজুরের সামনে বলা যায় না। বল ?

—এমন গালাগাল দিলে যা হজুরির সামনে উচ্চারণ করা যায় না—

—হুঁ। বেশ হয়েছে—যাও, এখন কোথায় থাওয়া-দাওয়া করবে করে ঠিক
বেলা এগারোটার সময় কাছারী যাবে। সকালে কাছারীতে না গেলে
মোকদ্দমা রুজু হবে না।—তারপর ই্যা নিধিরাম, চা খাবে একটু ? এই
একটু অবসর পেলাম সকাল থেকে।

—আজ্ঞে না চা খাব না। কি বলছিলেন আমায় ?

সাধন-মোক্তার কিছু ভূমিকা ফাঁদিয়া পুনরায় ভাইবির বিবাহের প্রস্তাব তুলিলেন। নিধিরাম বড় লজ্জিত ও বিব্রত হইয়া পড়িল—বিবাহের সম্বন্ধে সে এ পর্যন্ত কোনো কথাই ভাবে নাই, তাহার মাথার মধ্যেই একথা নাই। কি কৃষ্ণেই সাধনের বাড়ি নিমন্ত্রণ খাইতে আসিয়াছিল।

সে বলিল—দেখুন আমি তো এ বিষয়ে কিছু ঠিক করিনি, তা ছাড়া আমার বাবা রয়েছে—

সাধন ব্যস্ত হইয়া বলিলেন—আহা হা, তোমার মত আছে যদি বুঝি তবে তোমার বাবার কাছে এফুনি যাচ্ছি। তোমার কথা আগে বল—

নিধু মহা বিব্রত হইয়া পড়িল। অস্তুত হুদিন সময় নেওয়া দরকার—তারপর ভাবিয়া একটা ভদ্রতাসঙ্গত উত্তর অস্তুত দেওয়া যাইতে পারে। সে বলিল—আচ্ছা কাল শনিবার বাড়ি যাচ্ছি, মা'র কাছে একবার বলে দেখি, সোমবার আপনাকে—

সাধন খপ করিয়া হঠাৎ নিধিরামের হাত দুটি ধরিয়া বলিলেন—একাজ করতেই হবে নিধিরাম। আমাদের বাড়ি শুধু সব মেয়েদের তোমাকে দেখে বড় পছন্দ হয়েছে। আর ও টাকাকড়ি, পসার-টসারের কথা ছেড়ে দাও। কপালে থাকে হবে, না থাকে না হবে। বলি যত-দার কি ছিল? ভাঙা থালা সঞ্চল করে এসেছিলেন এখানকার বারে মোক্তারী করতে। কপাল খুলে গেল, এখন লক্ষ্মী উছলে উঠচে ঘরে! অমনিই হয়। তাহলে সোমবারে যেন পাকা মত পাই—একটু কিছু মুখে দিয়ে যাবে না?

শনিবারে দীর্ঘ পথ হাঁটিয়া বাড়ি যাইবার সময় ছায়াস্তিম্ভ ভাত্র অপরাহ্নে সুনীল আকাশের গায়ে নানা রঙের মেঘস্তর দেখিতে দেখিতে নিধুর মন কিসের আনন্দে ও নেশায় যেন ভরপুর হইয়া উঠিল। মজুকে আজ সে দেখে নাই দীর্ঘ তেরো দিন—যদি সে থাকে, যদি তাহার সঙ্গে দেখা হয়! কথাটা ভাবিতেই নিধুর বুকের মধ্যে যেন কেমন ভোলপাড় করিতে

লাগিল। দেখা ইওয়া কি সম্ভব? নাও তো হইতে পারে। মজু কি আর তাহার জন্ম গ্রামে বসিয়া থাকিবে পড়াশুনা ছাড়িয়া?

ভাবিতে ভাবিতে গ্রামের কাছে সে আসিয়া পড়িল।

আর বেশি দূর নাই। ওই কৈদেটির বিলের আগাড় দেখা যাইতেছে।

নিধু অমুভব করিল তাহার বৃকের ভিতরটাতে যেন কেমন এক অশাস্ত, চঞ্চল আবেগ, এতদিন এ ধরনের আবেগের অন্তিত্ব সে অবগত ছিল না।

বাড়ি পৌছিয়াই প্রথমে নিধুর চোখে পড়িল তাহার মা বসিয়া বসিয়া কচুর ডাঁটা কুটিতেছেন। তাহাকে দেখিয়া হাসিমুখে বলিলেন—ওই ছাখ এয়েচে! আমি ঠিক বলেচি সে এ শনিবার আসবেই। তাই তো কচুর শাক তুলে বেছে ধুয়ে—ওরে ও পুঁটি, শিগগির তোর দাদাকে হাত পা ধোয়ার জল এনে দে—

হাতমুখ ধুইয়া স্নান হইয়া ও কিকিং জলযোগ করিয়া নিধু মায়ের সহিত গল্প করিতে বসিল। প্রথমে এ কেমন আছে, সে কেমন আছে জিজ্ঞাসা করিয়া সে বলিল—জজবাবুদের বাড়ি সব ভালো?

নিধুর মা বলিলেন—হ্যাঁ, ভালো কথা—তাকে যে মজু একদিন ডেকে পাঠিয়েছিল, গেল শনিবারে। তা আমি বলে পাঠালাম সে এ হপ্তাতে আসবে না লিখেচে। এই তো পরশু না কবে আবার জজবাবুর ছেলে এসে জিগগেস করে গেল তুই আসবি কি না।

নিধু বলিল—ও!

—তা একবার যাবি না কি?

—আজ এখন? সন্দেশ হয়ে গেল যে একেবারে। কাল সকালে বরং—

কথা শেষ না হইতেই বাহিরে মজুর ছোট ভাই নৃপেনের গলা শোনা গেল—ও নিধুবাবু, এসেচেন নাকি?

নিধু বাহিরে গিয়া দাঁড়াইতেই ছেলোট বলিল—আপনি এসেচেন? বেশ,

বেশ। আসুন আমাদের বাড়ি, মঞ্জুদিদি ডেকে পাঠিয়েছে। আমরা বললে—দেখে আসতে আপনি এসেচেন কিনা—যদি আসেন তবে ডেকে নিয়ে যেতে বলেচে।

—বীরেন কোথায়?

—মেজদা কাল কলকাতা চলে গেল।

নিধু ছেলেটির পিছু পিছু মঞ্জুদের বাড়ি গিয়া বাহিরের ঘর পার হইয়া ভিতরের বাড়ি ঢুকিল। সেদিনকার সেই ঘরের সামনে প্রথমেই তাহার চোখে পড়িল মঞ্জু দাঁড়াইয়া বাড়ির ঝিকে কি বলিতেছিল। তাহাকে দেখিয়া মঞ্জুর মুখ আনন্দে উজ্জ্বল হইয়া উঠিল। সে ছুটিয়া রোয়াক হইতে উঠানে নামিয়া বলিল—একি! নিধুদা যে! আসুন আসুন—ও মা—নিধুদা এসেচে—

মঞ্জুর মা রান্নাঘরের ভিতর হইতে বলিলেন—নিয়ে গিয়ে বস। দালানে—ঘাতি আমি—

নিধুর বৃকের ভিতর যেন ঢেঁকির পাড় পড়িতেছে। সে কি একটা বলিবার চেষ্টা করিয়া মঞ্জুর পিছু পিছু দালানে গিয়া বসিল।

মঞ্জু কাছেই একটা টুলের উপর বসিয়া বলিল—তারপর ও শনিবাবে এলেন না যে!

—বিশেষ কাজ ছিল একটা—

—আমি ডাকতে পাঠিয়েছিলাম আপনাকে, জানেন?

—হ্যাঁ শুনলাম।

—কেন জানেন না নিশ্চয়ই। আচ্ছা, চা খেয়ে নিন আগে তারপর—ও তার মধ্যে আপনি তো চা খান না আবার। জলযোগ করুন বলতে হবে আপনার বেলা। না?

—যা খুশি বলুন—

—সেদিন কেবলে দিলাম আমাকে ‘আপনি’ ‘আজ্ঞে’ করবেন না ? ভুলে
গেলেন এরি মধ্যে ?

—আচ্ছা বেশ, এখন থেকে তাই হবে ।

—বন্ধন আপনি, আমি আসছি—

একটু পরে মঞ্জু একটা রেকাবিতে লুচি, আলুভাজা ও হালুয়া লইয়া
আসিল । নিধুর হাতে দিয়া বলিল—খেয়ে নিন আগে—

নিধু রেকাবির দিকে তাকাইয়া বলিল—এত ?

—ও কিছু না । খান আগে—আমি জল আনি—

জলযোগের পাঠ চুকিয়া গেলে মঞ্জু বলিল—শুভুন । কাল রবিবার বাবার
জন্মদিন । বাবা জন্মদিনের অতুষ্ঠান করতে চান না, আমরা মাকে ধরেচি
বাবার জন্মদিন আমরা করবই । আপনি এসেচেন খুব ভালো হল । আপনি
অবিশ্রি আসবেন, জ্যাঠাইমাকেও কাল বলে আসব—আমরা একটা লেখা
পড়ব, সেটা একবার আপনি শুনে বলুন কেমন হয়েছে—এই জন্তেই
আমি ও-শনিবার থেকে—

নিধু হাসিয়া বলিল—বারে, আমি কি লেখক নাকি ? লেখার আমি
কি বুঝি ?

মঞ্জু বলিল—ইস ! আমি বুঝি জানিনে—আপনার ভাই রমেশ আপনার
একটা খাতা দেখিয়েচে আমাদের—তাতে আপনি কবিতা লিখেচেন
দেখলাম যে ! বেশ কবিতা, আমার খুব ভালো লেগেচে—মাও
শুনেচেন—নিধু লজ্জায় ও সঙ্কোচে অভিভূত হইয়া পড়িল । রমেশ
বীদরটার কি কাণ্ড ! ছেলেমানুষ আর কাকে বলে ! দাদাকে সব সিক
হইতে ভালো প্রতিপন্ন না করিতে পারিলে তাহার মনে যেন আর
স্বস্তি নাই । কি দরকার ছিল ইহাদের সে খাতা টানিয়া বাহির করিয়া
দেখাইবার ?

নিধু আমতা-আমতা করিয়া বলিল—সে আবার লেখা ! তাস্কে-সে সব—
রমেশের কথা বাদ—

—কেন সে কিছু অগ্রায় করেনি ।

—সে সব কবিতা স্থলে থাকতে লিখতাম—কাঁচা হাতের লেখা—

মঞ্জু প্রতিবাদের স্বরে বললে—কেন, আমাদের বেশ ভালো লেগেচে
কবিতাগুলো। খুকুকে উদ্দেশ করে যে সিরিজ, ওগুলো সত্যিই চমৎকার !
খুকু কে ?

নিধু লজ্জিতভাবে বললে—ও আমার ছোট বোন—ওর ডাক নাম নেবু।
তিনবছর বয়স ছিল তখন, এখন বছর আট-নয় বয়স। দেখেখনি তাকে ?

—না আমি দেখিনি। এখন তাকে ডাকতে পাঠাচ্ছি—আজ দেখতেই
হবে। কবির প্রেরণা যে যোগায়, সে বড় ভাগ্যবতী।

—সে তো এখানে নেই। মামারবাড়ি রয়েছে দিদিমার কাছে—দিদিমা
বড় ভালোবাসেন কিনা ! পুজোর সময় আসবে।

—তবে আর কি হবে ! আমাদেরই কপাল। দেখা অদৃষ্টে থাকলে তো !

এই সময়ে মঞ্জুর মা আসিয়া দাঁড়াইয়া বলিলেন—নিধু এসেচ বাবা ? মঞ্জু
তো কেবল তোমার কথা বলচে ক’দিন তোমার কবিতা পড়ে। ও নাকি
কি কাগজ বার করবে, তাতে তোমায় লিখতে হবে।

মঞ্জু কৃত্রিম ক্রোধের সহিত মায়ের দিকে চাহিয়া বলিল—মা সব কথা
ফাঁস করে ফেললে তো ! আমি সে কথা বুঝি এখনও বলেচি নিধুদাকে !
যেমন তোমার কাণ্ড !

নিধু বলিল—কেন, কাকীমা ঠিক বলেচেন। শুনতেই তো পেতাম
একটু পরেই—

মঞ্জু হাসিয়া বলিল—একখানা হাতের লেখা কাগজ বের করব ভাবচি,
তাতে আপনাকে লিখতে হবে কিন্তু।

মঞ্জুর মা কঙ্কর গুণাবলীর শ্রেষ্ঠত্ব প্রতিপন্ন করিতে ব্যগ্র হইয়া বলিলেন—
ও একখানা কাগজ আগেই বের করেছিল, ওঁর সঙ্গে কাজ করেন
বি. দাসগুপ্ত নাম শুনেচ তো? সবজজ—খুব পণ্ডিত লোক, তিনি দেখে
বলেছিলেন এমন লেখা—

মঞ্জু সলজ্জ প্রতিবাদের সুরে বলিল—আচ্ছা, মা—

—কেন আমায় বললি সব কথা, ফাঁস করে ফেলি যে? যখন করলাম
ফাঁস, তখন ভালো করেই ফাঁস করা ভালো।

মঞ্জু আবদারের সুরে বলিল—মা, নিধুদাকে রাস্তিরে এখানে খেতে বল
না? আমরা সব একসঙ্গে—

মঞ্জুর মা বলিলেন—আজ তো খাবার তেমন কিছু ভালো নেই—কি
খাওয়াবি নিধুদাকে? তার চেয়ে কাল দুপুরে ওঁর জন্মদিনে পোলাও
মাংস হবে, ভালো খাওয়া-দাওয়া আছে, কাল নিধু এখানে তো থাকবেই—

—না মা, মাংস দরকার নেই শুভদিনে, তোমার পায়ে পড়ি মা। বাবাকে
আমি বলব এখন—আর আমি বলি শোনো মা। নিধুদা ঘরের ছেলে,
আজও থাকে ভাল ভাত—কাল যা থাকে তা তো থাকবেই—

তাহাকে লইয়া মাতাপুত্রীর এত কথা হওয়াতে প্রথমটা নিধু কেমন
অস্বস্তি বোধ করিতেছিল। কিন্তু ইহারা এত সহজ ভাবে সে কথা
বলিতেছে যে নিধুর ক্রমশ বোধ হইতে লাগিল যে এই পরিবারের সঙ্গে
তাহার বহুদিনের পরিচয়—সত্যিই সে যেন তাহাদের ঘরের ছেলেই।
এখানে আজ রাত্রে খাইতে কিন্তু নিধুর যে আপত্তি ছিল—তাহা অগ্ন
কারণে। সে বাড়ি ফিরিয়াই বিকালে দেখিয়াছে তাহার জন্ম মা বসিয়া
বসিয়া কচুর শাক কুটিতেছেন। কোনো কিছুর বিনিময়েই সে মা'র রান্না
কচুর শাককে উপেক্ষা করিয়া মা'র প্রাণে কষ্ট দিতে পারিবে না।
কথাটা সে অগ্ন ভাবে ঘুরাইয়া মঞ্জুকে বলিল।

মঞ্জু ইহা লইয়া বেশি নির্বন্ধাতিশয়া দেখাইল না, নিধু সেজ্ঞা শুই বুদ্ধিমতী মেয়েটিকে মনে মনে প্রশংসা না করিয়া পারিল না।

আরও ঘণ্টাখানেক পরে নিধু চলিয়া আসিবার সময় মঞ্জু বলিল—কাল সকালে উঠেই এখানে আসবেন কিন্তু। আপনার পরামর্শ নিয়ে আমরা সব সাজাব—অল্পটান কি রকম হবে না হবে সব তাতেই আপনার সাহায্য না পেলে—

—সে জ্ঞা ভাবনা নেই। আমি আসব এখন—

—শুধু আপনি নন নিধুদা—আপনাদের বাড়ি শুধু সব কাল নেমস্তন্ন। মা বলে দিলেন আপনাকে বলতে—কাল সকালে আমি গিয়ে নেমস্তন্ন করে আসব।

রাত্রে বাড়ি ফিরিয়া আহালাদি করিয়া শুইয়া পড়িতেই নিধুর মা আসিয়া জিজ্ঞাসা করিলেন—কি বললে ওরা? কাল ওদের বাড়ি কি রে নিধু, রমেশ বলছিল—

—জজবাবুর জন্মদিন।

—ওমা, ওই বুড়োর আবার জন্মদিন!

—পয়সা থাকলে সব হয় মা—তোমার পয়সা থাকত তোমারও জন্মদিন হত।

—আমার জন্মদিন মাথায় থাকুক বাবা—পয়সার অভাবে তোর, রমেশের, পুঁটুর জন্মদিন কখনো করতে পারিনি। এ দেশে ওর চলনই নেই। থাকবে কি, অবস্থা সব সমান।

নিধু কি সব বলিয়া গেল খানিকক্ষণ ধরিয়া ইহার উত্তরে—কিন্তু নিধুর মা কি যেন ভাবিতেছিলেন—তাঁহার কানে সম্ভবত কোনো কথাই ঢোকে নাই। নিধুর কথা শেষ হইলে তিনি অগ্রমনস্কভাবে বলিলেন—আচ্ছা, তোর জন্মদিন কবে মনে আছে তোর? আশ্বিন মাসে তো জানি—কিন্তু তারিখটা—

মায়ের কথা শুনিয়া নিধুর হাসি পাইল। বলিল—কেন মা ? জন্মদিন
করবে নাকি ?

—না, তাই বলচি—বলিয়াই নিধুর মা ঘর হইতে চলিয়া গেলেন। যাইতে
যাইতে আবার ফিরিয়া আসিয়া বলিলেন—জল আছে ঘরে ? এক মাস
জলে হবে তো রে ? আমি যাই ?

পরদিন সকালে প্রায় সাড়ে-আটটার সময় মঞ্জুই তাহার ভাইয়ের সঙ্গে
নিধুদের বাড়ি আসিল। নিধুর মা তাহাদের দেখিয়া সসবাস্ত হইয়া
উঠিলেন—কোথায় বসান, কি করেন যেন ভাবিয়া পান না এমন অবস্থা।
তাড়াতাড়ি একখানা আসন পাতিয়া দিয়া বলিলেন—এস মা বস। এস
বাবা—বড় ভাগ্যি যে তোমরা এলে—

মঞ্জু কুণ্ঠিত ভাবে বলিল—আপনাকে ব্যস্ত হতে হবে না জ্যাঠাইমা।
নিধুদা কোথায় ?

—সে এইমাত্র যে কোথায় বেরুল—এখুনি আসবে, বস মা।

—আপনারা সবাই পায়ের ধুলো দেবেন আমাদের বাড়ি মা বলে দিলেন।
ওখানেই ছুপুরে খাবেন সবাই কিন্তু—জ্যাঠাবাবুকে বলবেন।

নিধুর মা চোখমুখ ও কথার ভাবে বিনয় ও সৌজন্ম প্রকাশ করিতে গিয়া
যেন গলিয়া পড়িলেন।

মঞ্জু খানিক বসিয়া চলিয়া যাইবার সময় বার বার করিয়া বলিয়া গেল,
নিধুদা আসিলেই যেন সে তাহাদের বাড়ি যায়।

বেলা সাড়ে-ন’টার সময় নিধু মঞ্জুদের বাড়ি গেল। এই সময় হইতে সন্ধ্যা
পর্যন্ত সমস্ত দিনটা যে বিচিত্র অন্তর্ধান, আমোদ ও পান-ভোজনের ভিতর
দিয়া কাটিয়া গেল—নিধু বা তাহাদের বাড়ির কেহই জীবনে ওরকম কিছু
কখনো দেখে নাই। মঞ্জুর বিশেষ অনুরোধে নিধু ছোট একটি কবিতাও
লিখিয়া দিল মঞ্জুর বাবার জন্মদিন উপলক্ষে। তাহাতে তাঁহাকে ইন্দ্র,

চন্দ্র, বায়ু, বরুণের সঙ্গে তুলনা করা হইল, যুগপ্রবর্তক ঋষদেবের সঙ্গে তুলনা করা হইল, মহামানব বলা হইল—বলিবার বিশেষ কিছু বাদ রহিল না। মঞ্জু নিজের একটি ক্ষুদ্র রচনা পাঠ করিল, কয়েকটি গান গাহিল, একটি কবিতা আবৃত্তি করিল। সে যেন এই অমুষ্ঠানের প্রাণ, সে যেখানে থাকে তাহাই মাধুর্যে ও সৌন্দর্যে ভরিয়া তোলে—সে যেখানে নাই—তাহা হইয়া উঠে প্রাণহীন—অন্তত নিধুর তাহাই মনে হইল।

মঞ্জুর বাবাকে মঞ্জু নিজের হাতে স্নান করাইয়া শুভ্র গরদ পরাইয়া পিঁড়িতে বসাইল। গলায় নিজের হাতে তৈরি ফুলের মালা দিয়া কপালে নিজের হাতে চন্দন লেপন করিল। তাহার পর যাহা কিছু অমুষ্ঠান হইল, সবই তাঁহাকে ঘিরিয়া।

নিধুর মা এমন ধরনের উৎসব কখনো দেখেন নাই—দেখিয়া-শুনিয়া তাঁহার মুখে কথা সরে না এমন অবস্থা। মধ্যাহ্ন-ভোজনের পর নিমস্ত্রিতের দল চলিয়া গেল—নিধুকে কিন্তু মঞ্জু ঘাইতে দিল না। বৈকালে তাহারা ছোট একটি মুক অভিনয় করিবে, নিধুর বসিয়া এখনই দেখিতে হইবে তাহাদের তালিম দেওয়া। কোথায় কি খুঁত হইতেছে তাহা দেখিবার ভার পড়িল নিধুর উপর।

মঞ্জুর অভিনয় দেখিয়া নিধু মুগ্ধ হইয়া গেল। স্মৃষ্টাম দেহযষ্টির কি লীলা, হাত-পা নাড়ার কি সুললিত ভঙ্গি, হাসির কি মাধুর্য—সামান্য একটি তত্ত্বপোষ ও দড়ির গায়ে ঝুলানো কয়েকখানি রঙিন শাড়ি ও ফুলের মালার সাহায্যে যে এমন মায়া সৃষ্টি করা যায় দর্শকদের সামনে—তা নিধু এই প্রথম দেখিল। অবশ্য অভিনয়ের সময় নিধুর মা উপস্থিত ছিলেন।

সন্ধ্যার পূর্বে নিধু মঞ্জুকে বলিল—যাই তাহলে এখন—

—এখনই কেন ?

—সারাদিন তো আছি—

—আরও থাকতে যদি বলি ?

—থাকতে হবে তাহলে—কাল সকালেই তো আবার—

—কাল ছুটি নেই ?

—কিসের ছুটি কাল ?—না।

—সামনের শনিবার আসবেন তো ?

—তা ঠিক বলা যায় না—সব শনিবার তো—

—শুধু নিধুদা—ওসব শুনচিনে। আসতেই হবে শনিবার—আমাদের
হাতের লেখা কাগজের ওই দিন একটা উৎসব করব ভাবচি।

—বেশ তাহলে আসব—

—আজ রাত্রে এখানে কেন খেয়ে যান না ?

—দুপুরে ওই বিরাট খাওয়ার পরে রাত্রে কিছু চলবে না, মজু, ও
অনুরোধ কোবো না—

—সে হবে না। মাকে বলি—

—লক্ষ্মীটি, ছেলেমানুষি কোরো না—বলি শোনো—

—তাহলে এখন যাবেন না বলুন—

নিধুও বোধ হয় মনে মনে তাহাই চাহিয়াছিল। সে কেবল বলিল—থাকতে
পাবি, কিন্তু তোমার মুক অভিনয়টি আর একবার দেখাতে হবে—

মজু উৎসাহের সঙ্গে বলিল—বেশ দেখাব। ভালো লেগেচে আপনার ?

—চমৎকার।

—সত্যি বলচেন নিধুদা ?

—মন থেকে বলচি বিশ্বাস কর—

—তা যখন বললেন—তখন ওর চেয়েও ভালো একটা করি আমি।

স্বলে প্রাইজ পেয়েছিলাম করে—সেটা করব এখন।

—তাহলে রইলাম আমি। না দেখে যাচ্চিনে—

সন্ধ্যার কিছু পরে 'কচ ও দেবধানী'র মুক অভিনয় মঞ্জুর করিল। ছোট ভাইকে কচের ভূমিকায় সহযোগী করিয়াছিল। নিধুর মনে হইল মঞ্জুর ভাই জিনিসটাকে নষ্ট করিল—মঞ্জুর অভিনয় সর্বান্বল্পের হইত যদি সে ছোট ভাইয়ের কাছে বাধার পরিবর্তে সাহায্য পাইত।

অনেক রাত্রে নিধু যখন মঞ্জুরের বাড়ি হইতে ফিরিল—তখন মাথার মধ্যে ঝিমঝিম করিতেছে—কিসের নেশা যেন তাহাকে মাতাল করিয়া দিয়াছে, কত ধরনের চিন্তা ও অল্পভূতির জটিল স্রোত তখন তাহার মনকে আচ্ছন্ন করিয়া ফেলিয়াছে, কোনো কিছু ভালোভাবে ভাবিয়া ও বুঝিয়া দেখিবার অবসর ও ক্ষমতা নাই তখন।

নিধুর মা বলিলেন—এলি বাবা? কেমন হল বল দিকি? একেই বলে বড়লোক। বড়লোক যে হয়, তাদের সব ভালো না হয়ে পারে না। জন্মদিন যে আবার ওভাবে করা যায়—তা তুমি-আমি জানি?

নিধু হাসিয়া বলিল—জানব কোথেকে মা? পরস্যা আছে?

—আর কি চমৎকার মঞ্জু মেয়েটা! কেমন পালা গাইলে হাত পা নেড়ে? মুখে কিছু না বললেও সব বোঝা গেল।


—সব বুঝেছিলে মা?

—ওমা, ঠাকুর-দেবতার কথা কেন বুঝ না?

—কোনটা ঠাকুর-দেবতার কথা হল মা? তুমি কিছুই বোঝনি। ও আমাদের ঠাকুর-দেবতার নয় তুমি যা ভাবচ। বুদ্ধ নাম শুনেচ? ও সেই বুদ্ধদেবের—

—জা যাক গে, দেবতা তো, তাহলেই হল। কিন্তু যাই বল, মঞ্জু চমৎকার মেয়ে। না! কি স্নন্দর দেখতে?

মঞ্জুর কথায় নিধু বিশেষ কোনো উৎসাহ দেখাইল না। একবার সমর্থনসূচক ঘাড় নাড়িয়া ঘরের মধ্যে চলিয়া গেল।



পরদিন সকালে উঠিয়া নিধু মনের মধ্যে কেমন যেন একটা বেদনা অনুভব করিল। কিসের বেদনা ভালো করিয়া বোঝাও যায় না ; অথচ মনে হয় যেন সারা দুনিয়া শূণ্য হইয়া গিয়াছে ; অথ কোথাও গেলে কিছু নাই কোথাও। আছে কেবল এখানে মঞ্জুদের বাড়ি।

মঞ্জুদের বাড়ি ছাড়িয়া বিশ্বের কোথাও গিয়া স্থখ নাই।

বাড়ি হইতে বিদায় লইয়া নিধু উদাস মনে পথ চলিতে লাগিল। ভাদ্রমাসের মাঝামাঝি, পথের ধারে ঝোপে বনকলসী ফুটিয়াছে—বাঁশ-ঝাড়ের ও বড় বড় বিলিতি চটকা গাছের মাথায় সকালের নীল আকাশ, পূজার আর বেশি ঘেরি নাই, স্থলে, জলে, আকাশে, বাতাসে আসন্ন পূজার আভাস যেন। পাড়ারগায়ের ছেলে নিধুর তাহাই মনে হইল।

কৃষকেরা পাট কাটিতে শুরু করিয়াছে, পথের ধারে যেখানে ঘত খানা জোবা—তাহাতেই পচালো পাটের আঁটি। দুর্গন্ধে এখন হইতেই পথ চলা দায়। নিধু অল্পমনস্কভাবে চলিতে চলিতে প্রায় নোনাখালির বাঁওড়ের কাছে আসিয়া পড়িল। এখান হইতে টাউন আর মাইল দুই—নিধু বাঁওড়ের ধারে ঘাসের উপর বসিল। আজ এখনো সকাল আছে। তাড়াতাড়ি কোঁটে হাজির হইয়া কি হইবে ? মক্কেলের তো বড় ভিড় !

মহকুমা টাউনে তাহার কেহ নাই। একেবারে আত্মীয়স্বজন শূণ্য মরুভূমি এটা। জগতে যাহা কিছু সে চায়, তাহার প্রিয়, তাহার কাম্য—পিছনে ফেলিয়া আসিয়াছে। তাহাদের গ্রামে। মনের মধ্যে দারুণ শূণ্যতা—তা কে পূরণ করিবে ? যত্ন-মোক্তার না তার মুহুরী বিনোদ ?

নিধু বুদ্ধিমান লোক, সে কথাটা ভালো করিয়া ভাবিল। মঞ্জুর প্রতি তাহার মনোভাব এমন হওয়ার হেতু কি? মঞ্জু সুন্দরী মেয়ে, কিন্তু সুন্দরী সে একেবারে দেখে নাই তাহা তো নয়, সেজ্ঞে সে আকৃষ্ট হয় নাই। তাহাকে আকৃষ্ট করিয়াছে—তাহার প্রতি মঞ্জুর সদয় ও মধুর ব্যবহার, মঞ্জুর আদর, সৌজ্ঞ্য—অত বড়লোকের মেয়ে সে, শিক্ষিতা ও রূপসী, তাহার উপর এত দরদ কেন তার?

এ এমন একটা জিনিস—নিধুর জীবনে যাহা আর কখনো ঘটে নাই, একেবারে প্রথম। তাই মঞ্জুর কথা ভাবিলেই, তাহার মুখ মনে করিলেই নিধুর মন মাতিয়া ওঠে—তাহাকে উদাস ও অশ্রুমনস্ক করিয়া তোলে—সব কিছু তুচ্ছ, অকিঞ্চিৎকর মনে হয়।

অথচ ইহার পরিণাম কি? শুধু কষ্ট ছাড়া?

বুদ্ধিমান নিধু সে কথাও ভাবিয়া দেখিয়াছে।

মঞ্জুকে সে চায় কিন্তু মঞ্জুর বাবা কি কখনো তাহার সহিত মঞ্জুর বিবাহ দিবেন? মঞ্জুকে পাইবার কোনো উপায় নাই তাহার। মঞ্জুকে আশা করিয়া তাহার পক্ষে বামন হইয়া চাঁদে হাত দিবার সমান।

কেন এমন হইল তাহার মনের অবস্থা?

অত্যন্ত ইচ্ছা হয়, মঞ্জুর মনের ভাব কি জানিতে। মঞ্জুও কি তাহাকে এমন করিয়া ভাবিতেছে? একথা কিন্তু মনে-প্রাণে বিশ্বাস করা শক্ত। কি তাহার আছে, না রূপ, না গুণ, না অর্থ—মঞ্জু তাহার কথা কেন ভাবিবে? সে গরিবের ছেলে, মোক্তারী করিতে আসিয়া পাঁচটাকা মরতাদা দিয়া নিজে ছুটি রাঁধিয়া খাইয়া মক্কেল শিখাইয়া, ষড়-মোক্তারের দ্বায় জামিননামা সই করিয়া গড়ে মাসে আঠারো-উনিশ টাকা রোজগার করে—কোনো সম্ভ্রান্ত ঘরের শিক্ষিতা মেয়ে যে তাহার মতো লোকের দিকে চাহিয়া দেখিতেও পারে—ইহা বিশ্বাস করা শক্ত।

নিধু বাসায় লুপ্তি দেখিল বিনোদ-মুহুরী তাহার অপেক্ষায় বারান্দার
বেঞ্চিতে বসিয়া আছে। তাহাকে দেখিয়া বিনোদ-মুহুরী বলিল—বাবু
এলেন? বড্ড দেরি করে ফেললেন যে!

—কেন বল তো?

—ছোটো মকেল এসেচে—চুরির কেস। আমি ধরে রেখে দিয়েছি কত
চালাকি খেলে। তারা হরিহর নন্দীর কাছে কি মোজাহর হোসেনের কাছে
যাবেই। আজই এজাহার করাতে হবে—বলেছি বাবু আসচেন, বস—এই
এলেন বলে। ধরে কি রাখা যায়?

—আসামী না ফরিয়াদী—

—ফরিয়াদী, বাবু। আসামী গিয়েচে য়হুবাবুর কাছে। এদের অনেক করে
ধরে রেখেছি, বাবু। খেতে গিয়েচে হোটেল।

নিধু নির্বোধ নয়, বিনোদ-মুহুরীর চালাকি বুঝিতে পারিল। বিনোদ-মুহুরী
টাউটগিরি করিয়া কিছু কমিশন আদায় করিবে, এই তাহার আসল
উদ্দেশ্য। নতুবা আসামী পক্ষ যখনই য়হু-মোস্তাজার কাছে গিয়াছে,
অপরপক্ষ নিধুর কাছে আসিবেই—তাহাই আসিতেছে আজ দুমাস ধরিয়া।
বিনোদের টাউটগিরি না করিলেও তাহারা এখানে আসিত। বিনোদের
খোশামোদ করা ইত্যাদি সব বাজে কথা।

নিধু বলিল—টাকার কথা কিছু বলেছিলে?

বিনোদ বিশ্বাসের ভান করিয়া বলিল—না বাবু, আপনি এসে যা বলবেন
ওদের বলুন—আমি টাকার কথা বলবার কে?

আচ্ছা, আমি কোর্টে চললাম। তুমি ওদের নিয়ে এস—

—বাবু, ওদের এজাহারটা একটু শিখিয়ে নেবেন কখন?

—কোর্টেই নিয়ে এস যা হয় হবে।

বার-লাইব্রেরীতে ঢুকিতেই প্রথমে সাধন-মোস্তাজার সঙ্গে দেখা। সাধন

তাহাকে দেখিয়া লাফাইয়া উঠিয়া বলিলেন—আরে এঁহঁ ষে! আমি ভাবচি, আজ কি আর এলেন না?—দেরি হচ্ছে যখন, তখন বোধ হয়—শরীর বেশ ভালো? বাড়ির সব ভালো?

তাহার স্বাস্থ্য ও তাহার পরিবারের কুশল সম্বন্ধে সাধন-মোক্তারের এ অকারণ ঔৎসুক্য নিধুকে বিরক্ত করিয়াই তুলিল। সে বিরস মুখে বলিল—আজ্ঞে হ্যাঁ, সব মন্দ নয়।

সাধন ভট্টাচার্য বলিলেন—ভালো কথা, একটা জামিননামায় সই করতে হবে তোমায়। মক্কেল পাঠিয়ে দেব এখন—

নিধু ইহার ভিতর সাধন ভট্টাচার্যের স্বার্থসিদ্ধির গন্ধ পাইয়া আরও বিরক্ত হইয়া উঠিল—কিন্তু বিরক্ত হইলে ব্যবসা চলে না—অন্তত একটা টাকা তো ফি পাওয়া যাইবে জামিননামায় স্বতরাং সে বিনীতভাবে বলিল—দেবেন পাঠিয়ে।

—আজ একবার নতুন সবডেপুটির কোর্টে তোমায় নিয়ে যাই চল—আলাপ হয়নি বুঝি?

—না, উনি তো শুক্রবারে এসেছেন, সেদিন আমার কেস ছিল না, ঠুকে চক্ষেও দেখিনি—

—হাকিমদের সঙ্গে আলাপ রাখা ভালো। চল যাই—

নবাগত সবডেপুটির নাম সুনীল বন্দ্যোপাধ্যায়, বয়স বেশি নয়। লম্বা ধরনের গড়ন, চোখে চশমা, গায়ের রঙ বেশ ফর্স।। এজলাসে কোনো কাজ ছিল না, সুনীলবাবু একা বসিয়া নথির পাতা উল্টাইতেছিলেন, সাধন ভট্টাচার্য ঘরে ঢুকিয়া হাসিমুখে বলিলেন—হজুরের এজলাস যে আজ ফাঁকা?

—আম্মন সাধনবাবু, আম্মন। এ মহকুমায় দেখি কেস বড় কম—ভাবচি দাবা খেলা শিখব না ছবি আঁকা শিখব—সময় কাটা তো চাই? ইনি কে?

—হজুরের সঙ্গে আলাপ করিয়ে দেব বলে নিয়ে এলাম, এঁর নাম নিধিরাম রায় চৌধুরী—মোস্তার। এই সব মাস দুই হল—

—বেশ বেশ। বহন নিধিরামবাবু, কেস নেই, বসে একটু গল্পগুজব করা যাক—

নিধিরাম নমস্কার করিয়া বসিল। এজলাসে হাকিমদের সামনে বসিতে এখনো যেন তাহার ভয় ভয় করে। কথা বলিতে তো পারেই না।

হুসীলবাবু বলিলেন—নিধিরামবাবুর বাড়ি কি এই সবডিভিসনেই ?

নিধিরাম গলা ঝাড়িয়া লইয়া সসম্মানে বলিল—আজ্ঞে ইয়া—এখান থেকে ছ' ক্রোশ, কুড়ুলগাছি—

হুসীলবাবু চোখ কড়িকাঠের দিকে তুলিয়া কথা মনে আনিবার ভঙ্গি করিয়া বলিলেন—কুড়ুলগাছি ? কুড়ুলগাছি ? আচ্ছা, আপনাদের গ্রামেই কি লালবিহারীবাবুর বাড়ি ?

—আজ্ঞে ইয়া।

—উনি বুকি আজকাল কণ্টাইয়ের মুন্সেফ—না ?

—কণ্টাই থেকে বদলি হয়েছেন মেদিনীপুর সদরে। দেশে এসেছেন তিন মাসের ছুটি নিয়ে—

—ছুটিতে আছেন ? কেন অস্থবিস্থ নাকি ?

—না শরীর বেশ ভালোই। বাড়িতে এবার পুজো করবেন শুনচি— আর বোধহয় বাড়ি ঘর সারাবেন—

—তাই নাকি ? বেশ বেশ। আমার বাবার সঙ্গে গুঁর খুব বন্ধুত্ব কিনা ? কলকাতায় আমাদের বাড়ির পাশেই গুঁর শওরবাড়ি। সিমলে ষ্ট্রাটে— আমাদের সঙ্গে খুব আনাশোনা—গুঁরা ভালো আছেন সব ?

—আজ্ঞে ইয়া—ভালোই দেখে এসেছি।

—আমার নাম করবেন তো লালবিহারীবাবুর কাছে ?

—নিশ্চয়ই করব—এ শনিবারে গিয়েই করব—

—বলবেন একবার সময় পেলে আমি যাব—কি গাঁয়ের নামটা বললেন ?
কুড়ুলগাছি—হ্যাঁ কুড়ুলগাছিতে ।

—সে তো আমাদের সৌভাগ্য, হজুরের মতো লোক যাবেন আমাদের
গ্রামে ।

নিধুর বিনয়ে সুনীলবাবু পরম আপ্যায়িত হইয়াছেন বলিয়া মনে হইল
তাহার মুখ দেখিয়া । নিধুর দিকে চাহিয়া খুশির স্বরে বলিলেন—আজ
আসবেন আমার ওখানে ? আসুন না—একটু চা খাবেন বিকেলে ?
সাধনবাবু আপনিও আসুন না ?

নিধু মুগ্ধ হইয়া গেল হাকিমের শিষ্টতায় ও সৌজন্তে । সাধনবাবুর তো মুখ
দিয়া কথা বাহির হইল না । তিনি বিনয়ে ও সম্মানে বিগলিত হইয়া
বলিলেন—আজ্ঞে নিশ্চয়ই যাব হজুর যখন বলচেন—নিশ্চয়ই যাব—

—হ্যাঁ আসুন—এই ধরুন—ছ'টার সময়—

এই সময়ে হরিবাবু মোক্তার ছুজন মকেল লইয়া ঘরে ঢুকিয়া বলিলেন
—হজুর, কি ব্যস্ত আছেন ? একটা এজাহার করতে হবে আমার
মকেলের—

নিধু ও সাধন ভট্টাচার্য নমস্কার করিয়া বিদায় লইতে উদ্যত হইলে সবড়েপুটি
বাবু বলিলেন—তা হলে মনে থাকে যেন নিধুবাবু—

—আজ্ঞে হ্যাঁ, নিশ্চয়ই ।

বাহিরে আসিয়া সাধন ভট্টাচার্য বলিলেন—সব হজুরের সঙ্গে আমার
খাতির বুঝলে ? তোমায় সব এজলাসে একে একে নিয়ে যাব । তবে কি
জানো—এস. ডি. ও.—আর সবড়েপুটি—এঁদের নিয়েই আমাদের
কারবার । দেওয়ানী কোর্টে আমাদের তত যেতে তো হয় না ? ফৌজদারী
হাকিমদের সঙ্গে ভাব রাখলেই কাজ চলে যায়—

বার-লাইত্রেয়ীতে আসিবার পূর্বে সাধন ভট্টাচার্য নিম্ন স্বরে বলিলেন—
ভালো কথা, আমার সেই প্রস্তাবটার কি হল হে ?

নিধুর গা জলিয়া গেল। সে একক্ষণ ইহারই অপেক্ষা করিতেছিল। ইতস্তত
করিয়া বলিল—এখনো তো ভেবে দেখিনি—

—বাড়িতে কিছু বলনি ?

—আজ্ঞে না—

—তোমার মেয়ে পছন্দ হয়েছে কি না বলো—আসল কথা ঘেঁটা।

নিধু ভদ্রতার খাতিরে বলিল—আজ্ঞে না, মেয়ে ভালোই।

—তোমার সঙ্গে সামনের শনিবারে তোমাদের বাড়ি যাই না কেন ?

—আপনি যাবেন আমার বাড়িতে সে তো ভাগ্যের কথা। তবে
আমি বলছি কি এ শনিবারে না হয় আমি একবার জিগগেস করেই
আসি বাবাকে—

—খুব ভালো। তাই কোরে।। সোমবারে যেন আমি নিশ্চয়ই
জানতে পারি—

বিকালে সুনীলবাবুর বাসায় নিধু গিয়া দেখিল সাধন ভট্টাচার্য পূর্ব হইতেই
সেখানে বসিয়া আছেন। সুনীলবাবু তখনো কাজ শেষ করিয়া বাসায়
ফেরেন নাই। চাকরে তাহাকে অভ্যর্থনা করাইয়া বসাইল।

সাধন বলিলেন—এস. ডি. ও. নেই কিনা—সুনীলবাবু ট্রেজারির কাজ
শেষ করে আসবেন বোধ হয়।

আঁরও ঘণ্টাখানেক বসিবার পরে সুনীলবাবুকে ব্যস্তসমস্ত ভাবে আসিতে
দেখা গেল।

উহাদের বাহিরের ঘরে বসিয়া থাকিতে দেখিয়া বলিলেন—বড় দেরি হয়ে
গেল—শো সরি! আজ আবার বড় কর্তা নেই—টুরে বেরিয়েচেন
মফস্বলে—ট্রেজারির কাজ দেখে আসতে হল কিনা ? বহুন—আসচি—

বাইরের ঘরটিতে দুখানা বেতের কোচ, দুখানা টেবিল, খান চার পাঁচ চেয়ার পাতা। একটা ছোট আলমারিতে অনেকগুলি বাংলা ও ইংরাজি বই—দেওয়ালে কয়েকখানি ফটো, কয়েকখানি ছবি। তাহার মধ্যে একখানি ছবি নিধুর বেশ ভালো লাগিল। একটা গাছের তলায় দুটি হরিণ ক্রীড়ারত—দূরে কোনো স্রোতস্বিনী, অপরপারে কাননভূমি, আকাশে মেঘের ফাঁকে চাঁদ উকি মারিতেছে।

সে সাধন ভট্টাচার্যকে ছবিখানি আঙুল দিয়া দেখাইয়া বলিল—দেখুন, কি চমৎকার না ?

সাধন ভট্টাচার্য মোক্তারী করিয়া ও মস্কেল শিখাইয়া বহুকাল অতিবাহিত করিয়াছেন, কিন্তু কোন জিনিস দেখিতে ভালো, কোনটা মন্দ, ইহা লইয়া কখনো মাথা ঘামান নাই। সুতরাং তিনি অনাসক্ত ও উদাসীন দৃষ্টিতে দেওয়ালের দিকে চোখ তুলিয়া চাহিয়া বলিলেন—কোনটি ? ও-খানা ? ইয়া, তা বেশ।

এমন সময় সুনীলবাবু একটা সিগারেটের টিন লইয়া ঘরে ঢুকিয়া নিধুর সামনের টেবিলে টিনটি রাখিয়া বলিলেন—খান—

নিধু তো এমনি কখনো ধূমপান করে না, সাধন ভট্টাচার্য করেন বটে কিন্তু হাকিমের সামনে কি করিয়া সিগারেট টানিবেন ? সে ভরসা তাঁহার হয় না। সুতরাং যেখানকার সিগারেটের টিন, সেখানেই পড়িয়া রহিল।

সাধন ভট্টাচার্য কৃত্রিম খুশির ভাব মুখে আনিয়া বলিলেন—চমৎকার ছবিগুলো আপনার ঘরে—

সুনীলবাবু বলিলেন—এখানে ভালো ছবি কিছু আনিনি। হয়েছে কি, ভালো ছবি কিনবার রেওয়াজ আমাদের বাঙালীর মধ্যে নেই বললেই হয়। আমরা ছবির ভালোমন্দ প্রায়ই বুঝিনে। অনেক সময় নিকৃষ্ট বিলিতি ওলিওগ্রাফ কিনে এনে বৈঠকখানায় জাঁক করে বাঁধিয়ে রাখি—সাধনবাবু

যেখানা দেখালেন, ওখানা সত্যিই ভালো ছবি। নন্দলাল বসুর আঁকা
একখানা ছবির প্রিন্ট। নন্দলাল বসুর নাম নিশ্চয়ই—

কে নন্দলাল বসু, সাধন ভট্টাচার্য জীবনে কখনো শোনেননি, চাক্ষু-
খুশি করিবার জন্য সজোরে ঘাড় নাড়িয়া বলিলেন—হ্যাঁ, হ্যাঁ, খুব—খুব—

—আমাদের বাড়ির মা-বাবা সবাই নন্দলাল বসুর ছবির ভক্ত—

—আজ্ঞে তা হবেই তো! কত বড় শিক্ষিত বংশ আপনাদের—

নিধু আলমারির বই দেখিতেছে দেখিয়া সুনীলবাবু বলিলেন—বই প্রায়
সব এখানে পাবেন, আজকাল যা যা বেরুচ্ছে—বই পড়তে ভালোবাসেন
দেখি আপনি—

নিধু বলিল—বই ভালোবাসি, কিন্তু এসব জায়গায় ভালো বই মেলেই না।

—কেন আপনাদের বার-লাইব্রেরীতে?

—মোক্তার বারে দু-দশখানা বাঁধানো ল' রিপোর্ট আর উইক্লি নোটস্
ছাড়া আর তো বই দেখিনে।

—আপনি আমার কাছ থেকে বই নিয়ে যাবেন, আবার পড়া হলে ফেরত
দিয়ে নতুন বই নিয়ে যাবেন।

—তাহলে তো বেঁচে যাই—

—আচ্ছা, কুড়ুলগাছি এখান থেকে ক'মাইল হবে বললেন?

—ছ'কোশী রাস্তা হবে—

—যাবার কি উপায় আছে?

—গরুরগাড়ি করে যাওয়া যায়—নয় তো হেঁটে—

—সাইকেলে যাওয়া যায় তো? আমাকে নিয়ে যাবেন?

—সে তো আমাদের ভাগ্য, কবে যাবেন বলুন?

—লালবিহারীবাবুদের সঙ্গে আমাদের ক্যামিলির খুব জানাওনো—আমি
এখানে নতুন এসেছি, উনি জানেন না, জানলে এতদিন ডেকে নিয়ে যেতেন।

—বেশ, বেশ। আমি গিয়ে বলব এ শনিবারেই।

এই সময় ভৃত্য চা ও খাবার আনিয়া সামনের টেবিলে রাখিয়া দিল।

সুনীলবাবু বলিলেন—আসুন, চা খেয়ে নিন—চাকরে-বাকরে যা করে, তেমন কিছু ভালো হয়নি। বাসায় আমি একা, মেয়েমাহুষ কেউ নেই তো। সাধন ভট্টাচার্য সম্বন্ধে স্মরণে জিজ্ঞাসা করিলেন—হজুর কি আপাতত এখানে একা আছেন?

—একাই থাকি বই কি।

—কেন আপনার স্ত্রীকে বুঝি নিয়ে আসেননি?

সুনীলবাবু হাসিয়া বলিলেন—মাথা নেই তার মাথা বাথা! স্ত্রী কোথায়? এথনো বিয়ে করিনি—

সাধন ভট্টাচার্য অপ্রতিভের স্মরে বলিলেন—ও, তা তো বুঝতে পারিনি! তা হজুরের আর বয়স কি? আপনি তো ছেলেমাহুষ—করে ফেলুন এইবার বিয়ে। এই আমাদের এখানে থাকতে থাকতেই—

—ভালোই তো। দিন না একটা যোগাড় করে—

সাধন ভট্টাচার্য ব্যস্ত হইয়া বলিলেন—যোগাড় করার ভাবনা? হজুরের মুখ থেকে কথা বেরুলে একটা ছেড়ে দশটা পাত্রী কালই যোগাড় করে দেব।

—নিধিরামবাবু আপনি বিবাহিত?

নিধু সলজ্জভাবে বলিল—আজ্ঞে না, এথনো করিনি—

—আপনি তো আমার চেয়েও বয়সে ছোট—আপনার যথেষ্ট সময় আছে এথনো।

সাধন ভট্টাচার্য ব্যগ্রভাবে নিধুর মুখের কথা কাড়িয়া লইয়া বলিলেন—আর হজুরেরই কি সময় গিয়েচে নাকি! বলুন তো দেখি চেষ্টা কাল থেকেই—


সুনীলবাবু হাসিয়া বলিলেন—হবে, হবে, ঠিক সময়ে বলব বই কি।

লঘু হান্ত-পরিহাসের মধ্য দিয়া চা-মজলিস শেষ হইলে উভয়ে সুনীল-বাবুর বাসা হইতে বিদায় লইয়া চলিয়া আসিলেন। পথে সাধন ভট্টাচার্যকে একটু অগ্রমনস্ক মনে হইল। নিধুর কথার উপরে সাধন দু-একটা অসংলগ্ন উত্তর দিলেন। নিধুর বাসার কাছে আসিয়া সাধন একবার মাত্র বলিলেন—তাহলে নিধু তুমি এ শনিবার বাড়ি যাচ্ছ নাকি?

নিধু বলিল—আজ্ঞে হ্যাঁ—যাব বই কি—

—আচ্ছা তা হলে সোমবার দেখা হবে। আসি আজ—

নিধু মনে মনে হাসিল। সাধন-মোস্তারকে সে ইতিমধ্যে বেশ চিনিয়া ফেলিয়াছে। স্বার্থ ছাড়া তিনি এক পাও চলেন না। আশ্চর্য! ওই মেয়েকে সাবডেপুটি সুনীলবাবুর হাতে গছাইবার ছুরাশা সাধনের মনে স্থান পাইল কি করিয়া? যাক পরের কথায় থাকিবার তাহার দরকার নাই। সে নিজে আপাতত সাধন-মোস্তারের তাগিদের দায় হইতে রেহাই পাইয়াছে—ইহাই যথেষ্ট।



ভাদ্রমাসের দিন ছোট হইয়া আসিতেছে ক্রমশ—নিধুর সকল ব্যস্ততাকে ব্যর্থ করিয়া দিয়া কামারগাছির দীঘির পাড়ে আসিতেই সন্ধ্যা হইয়া গেল। বাড়ি পৌছিল সে সন্ধ্যার প্রায় আধঘণ্টা পরে। আজ মঞ্জুর সঙ্গে দেখা হওয়ার আর কোনো উপায় নাই। এত রাত্রে সে কোন ছুতায় মঞ্জুরের বাড়ি যাইবে ?

বাড়িতে সে পা দিতেই তাহার মা বলিলেন—তুই এলি ? জজবাবু ছেলে তোকে বিকেল থেকে তিনবার খোঁজ করে গিয়েচে। এই তো খানিক আগেও এসেছিল—বলে গিয়েচে এলেই পাঠিয়ে দিতে—মঞ্জু কি দরকারে তোর খোঁজ করেচে—

নিধু উদাসীন ভাবে বলিল—ও ! আচ্ছা দেখি—আবার বাত হয়ে গেল এদিকে—

—রাত তাই কি ! মঞ্জুর ভাই বলে গেল, যত রাত হয় জ্যাঠাইমা, নিধুদা এলে পাঠিয়ে দেবেনই—

—বেশ যাব এখন। হাত মুখ ধুই—

ঘরে ছোট্ট একখানা আশি ছিল। নিজের মুখ তাহাতে দেখিয়া নিধু বিশেষ খুশি হইল না। পথশ্রমে ও ধূলায় মুখের চেহারা—নাঃ, হোপলেস ! ভদ্রমহিলাদের সামনে এ চেহারা লইয়া দাঁড়ানো অসম্ভব।

কিছুক্ষণ পরে নিধুর মা ছেলেকে গামছা কাঁধে ভিজা কাপড়ে পুকুরের ঘাট হইতে আসিতে দেখিয়া বিস্ময়ের সুরে বলিলেন—হ্যারে, ওকি, তুই নেয়ে এলি নাকি এই সন্দেরবেলা ?

—হ্যাঁ মা, ঝড় ধুলো আর গরম—তাই নেয়ে সাবান দিয়ে ঠাণ্ডা হয়ে
এলাম—

—অস্থখ-বিস্থক না করলে বাঁচি এখন ! ককনো তো সন্মবেলা নাইতে
মেখিনি তোকে—কাপড় ছেড়ে এসে জল খেয়ে নে । চা খাবি ?

নিধু জানে মা চা করিতে জানে না । তাছাড়া ভালো চা বাড়িতে
নাইও, কারণ তাহাদের বাড়িতে কখনো কালে ভদ্রে কেহ শখ করিয়া
হয়তো চা খায়—তাহাও ঔষধ হিসাবে ; সর্দি-টর্দি লাগিলে তবে ।

সে বলিল—না মা চা থাক—তুমি খাবার দাও বরং—

নিধুর মা ছেলেকে বেকাবিতে করিয়া তালের ফুলুরি ও গুড় আনিয়া
দিলেন । নিধু খাইতে ভালোবাসে বলিয়া দ্বিপ্রহরের রন্ধন সারিয়া এগুলি
নিজ হস্তে করিয়া রাখিয়াছেন । বলিলেন—খা তুই—আর লাগে আরও
দেব, আছে ।

এমন এক সময় আসে জীবনে, আসল মাতৃস্নেহও মনকে তৃপ্তি দিতে
পারে না, বরং উতাক্ত করিয়া তোলে । নিধুর জীবনে সেই সময় সমাগত ।
সে এতগুলি তেলে-ভাজা তালের বড়া এখন বসিয়া বসিয়া খাইতে রাজী
নয় । তাহাতে প্রথমত তো সময় যাইবে, তারপর যদি মজুরা জলখাবার
খাইবার জন্ত বলে—কিছুই খাওয়া যাইবে না ।

গোত্রাসে কতক বড়া খাইয়া কতক বা ফেলিয়া নিধু তাড়াতাড়ি উঠিয়া
পড়িয়া মুখ ধুইয়া বাহিরে যাইতে উত্তত হইল ।

নিধুর মা ডাকিয়া বলিলেন—হ্যারে, ওমা একি করে খেলি তুই ? সবই
যে ফেলে গেলি ? ভালোবাসিস বলে বসে বসে করলাম, তা পান
খাবি নে ?

উত্তরে দরজার বাহির হইতে নিধু কি যে বলিল—ভালো বোঝা গেল না ।
মজুদের বাড়ির বাহির দরজাতে পা দিতেই নূপেনের সঙ্গে দেখা ।

—ও দিদি, নিধুদা এসেচে—এই যে—ওমা—বলিতে বলিতে সে তাহার হাত ধরিয়া টানিতে টানিতেই বাড়ির মধ্যে লইয়া গেল।

মঞ্জু হাসিমুখে ঘর হইতে রোয়াকে আসিয়া দাঁড়াইয়া বলিল—এই যে আসুন নিধুদা, আমি আজ তিনবার নূপেনকে পাঠিয়েছি আপনার খোজে। এই মাস্তুর বলছিলাম ওকে আর একবার গিয়ে দেখে আসতে এলেন কি না। কতক্ষণ এসেছেন?

—এই ঘণ্টাখানেক। সন্দের পর এসেছি—এসে নেয়ে এলাম পুকুরে—

—আসুন বসুন। কিছু মুখে দিন—

—ওসব সেরে এসেছি বাড়ি থেকে—

—এটাও তো বাড়ি নিধুদা। সেরে এসেছেন বলে কি রেহাই পাবেন?
বসুন—

মঞ্জুকে নিধুর আজ বড় ভালো লাগিল। সে একখানা ফিকে ধূসর বড়ের জরির কাজ করা ঢাকাই শাড়ি ও ঘন বেগুনি বড়ের সাটিনের ব্লাউজ পরিয়াছে, পিঠে লম্বা চুলের বিহুনির অগ্রভাগে বড় বড় ট্যাসেল দোলানো, খালি পায়ে আলতা, সুন্দর ফর্সা মুখে ঝঁঝ পাউডারের আমেজ—বড় বড় চোখে প্রসন্ন বস্তুত্বের হাসি।

নূপেন বলিল—কাল আপনি আছেন তো? আমাদের আয়ত্তি প্রতিযোগিতা জানেন না?

নিধু বিশ্বয়ের স্বরে বলিল—কোথায় কে করবে—

—বাবা এখানকার পাঠশালার ছেলেদের আর মেয়েদের মেডেল দিচ্ছেন। অ্যুবিশ্বি যে ফাস্ট হবে তাকে দেবেন। বাবা সভাপতি, স্কুল সবইনস্পেক্টার বিচার করবেন। বাবা মেডেল দেবেন, বাবা তো বিচার করবেন।
পারেন না?

—কাল কখন হবে?

—এই বেড়া দুটো থেকে আরম্ভ হবে, আমাদের বাড়ির বৈঠকখানাতেই হবে। বেশি তো ছেলে নয়, ত্রিশ না বত্রিশটি ছেলেতে মেয়েতে—

এই সময় মঞ্জু খাবারের প্লেট হাতে ঘরে ঢুকিতে ঢুকিতে বলিল—অমনি সব ফাঁস করে দেওয়া হচ্ছে! কোথায় আমি ভাবচি খাবার খাইয়ে স্বস্থ করে নিধুদাকে সব বলব—না উনি অমনি—

নূপেন অভিমানের সুরে বলিল—বাঃ, তুমি কি আমায় বারণ করে দিয়েছিলে? তাছাড়া আসল কথাটা তো এখনো বলিনি, সেটা তুমিই বল।

নিধু মঞ্জুর দিকে জিজ্ঞাসু দৃষ্টিতে চাহিল।

মঞ্জু হাসিয়া বলিল—অণু কিছু নয়, আপনাকেও একজন জজ হতে হবে, বাবাকে আমি বলেচি বিশেষ করে। আপনাকে নিতেই হবে। কেমন রাজী?

নিধু বিশ্বয়ের সুরে বলিল—তুমি কি যে বল মঞ্জু! আমি ভালো আবৃত্তি করেচি কোনো কালে যে জজ হও যাব! সব বাজে।

—ওসব বললে আমি শুনচিনে—হতেই হবে আপনাকে!

—কি রকম কি করতে হবে তাই জানিনে!

—সব বলে দেব তা হলেই হল তো?

মঞ্জুদের বাড়ি আসিলেই তাহার ভালো লাগে। সপ্তাহের সমস্ত পরিশ্রম, যত্ন-মোক্তারের পেছনে পেছনে জামিননামার উমেদারী করা, মক্কেলদের মিথ্যে কথা শেখানো—সব শ্রমের সার্থকতা হয় এখানে। সারা সপ্তাহের দুঃখ, একঘেষেয় কাটিয়া যায় যেন। ইহাদের বাড়িতে সব সময় যেন একটা আনন্দের শ্রোত বহিতেছে—যে আনন্দের স্বাদ সে সারাজীবনে কোনোদিন পায় নাই—এখানে আসিয়াই তাহার প্রথম সন্ধান সে পাইল। কিন্তু মঞ্জু আছে বলিয়াই এই বাড়িটি সজীব হইয়া আছে, মঞ্জু যেন ইহার অধিষ্ঠাত্রী দেবী।

নিধু বলিল—কি কবিতা আবৃত্তি হবে শুনি ?

—রবীন্দ্রনাথের ‘দুইবিঘা জমি’ আর মাইকেল মধুসূদনের ‘রসাল ও স্বর্ণলতিকা’—

—আমি নিজে কখনোই ও দুটো ভালো করে আবৃত্তি করতে পারিনে—

—তাহলেই তো আপনি সব চেয়ে ভালো জজ হতে পারবেন—

—আমি কেন তবে ? আমাদের গাঁয়ের হরি কলুকে জজ কর না কেন তবে ?

মঞ্জু হি-হি করিয়া হাসিয়া উঠিল। নিধুর মনে হয় এমন বীণার ঝঙ্কারের মতো স্মৃতিষ্ট হাসি সে কখনো শোনে নাই।

নূপেন বলিল—নিধুনা, দিদিকে একবার বলুন না ও দুটো আবৃত্তি করতে ?

নিধু বলিল—কর না মঞ্জু, কখনো শুনি নি তোমার মুখে—

মঞ্জুর একটা গুণ, বেশিক্ষণ ধরিয়া তাহাকে কোনো বিষয়ের জুড়ি সাধিতে হয় না—যদি তাহার অভ্যাস থাকে, সেটা সে তখনি করে। মঞ্জুর চরিত্রের এ দিকটা নিধুর সব চেয়ে ভালো লাগে—এমন সপ্রতিভ মেয়ে সে কখনো দেখে নাই।

মঞ্জু দুটি কবিতাই আবৃত্তি করিল। নিধু মুগ্ধ হইয়া শুনিল—এমন গলার স্বর, এমন হাত নাড়িবার সুকুমার ভঙ্গি এসব পল্লী অঞ্চলে মেয়েদের মধ্যে কল্পনা করাও কঠিন।

মঞ্জু বলিল—নিধুনা, আমরা একটা অভিনয় করব সেদিন বলেছিলাম—থাকবেন আপনি ?

—নিশ্চয়ই থাকব—

—কি বই প্লে করা যায় বলুন না ?

—আমি কি বইয়ের কথা বলব বল ? আমি কখনো কিছু দেখিনি—

নিধুর এই সরলতা মঞ্জুর বড় ভালো লাগে। চাল-দেওয়া ছোকরা সে তাহার

মামারবাড়ির আশে-পাশে অনেক দেখিল, কিন্তু নিধুদার মধ্যে বাজে চাল
এতটুকু নাই, মঞ্জু ভাবে।

নূপেন বলিল—রবীন্দ্রনাথের একটা বই করা যাক—ধর ‘মুক্তধারা’—
মঞ্জু বলিল—বড় শক্ত হবে—সে আমাদের স্থলে মেয়েরা করেছিল সেবার—
অনেক লোক দরকার—বড় শক্ত। নিধুদা একটা লিখুন—

নিধু এ ধরনের কথায় বড় লজ্জা পায়। তাহাকে ইহারা ভাবিয়াছে কি ?
কোন কালে সে বাংলা লিখিল ?

সে সঙ্কোচের সহিত বলিল—আম'কে কেন মিথ্যে বলা ? আমি
লিখতে জানি ?

মঞ্জু বলিল—আপনার কবিতা তো দেখেচি—দেখিনি ?

—সে ঝাঁকের মাথায় লেখা বাজে কবিতা—তাকে লেখা বলে না।

—তাই আমাদের লিখে দিন, সেই বাজে বইই আমরা প্রে করব।

—তার চেয়ে তুমি কেন লেখ না মঞ্জু ?

—আমি ! তাহলেই হয়েচে ! আমি এইবার কলম ধরে অম্লরূপা দেবী হব
আর কি !

—ভালো কথা, মঞ্জু, আমি বই পড়তে পাইনে—আমায় খানদুই বই
দিয়ে—এবার ঘাবার সময় নিয়ে যাব।

—এতদিন বলেননি কেন ? বই অনেক আছে। দিয়ে দিতাম—যখন যা
দরকার হবে নিয়ে যাবেন।

—কি কি বই আছে ?

—অনেক, অনেক—কত নাম করব ? রবীন্দ্রনাথের কাব্যগ্রন্থ বারো ভল্যুম
আছে—মাইকেল আছে—

—কবিতা নয়, উপক্ৰাস আছে ?

—তাও আছে। মা'র কাছ থেকে চাবি আনব ? দেখবেন ?

—না এখন থাক, রাত হয়ে গিয়েচে। কাল সকালে আসব—

—আচ্ছা, নিধুদা আপনি কেন ছুটি দিন না কতক ?

নিধু বিশ্বয়ের স্বরে বলিল—কেন বল তো ?

—আপনি থাকলে বেশ লাগে। এই অজ পাড়াগাঁয়ে মিশবার লোক নেই আর কেউ। আপনি আসেন তবু দুদিন বেশ আনন্দে কাটে।

—আমার আবার ছুটি কি ? আমি তো কারো চাকুরি করি না ?

—তবে ভালোই তো। এ হুণ্ডায় আর যাবেন না—কেমন ?

—না গেলে পসার নষ্ট হয়ে যাবে যে ! নতুন প্র্যাকটিসে বসে কামাই করা চলে না।

সেদিন রাত্রে বাড়ি আসিয়া নিধুর আর ঘুমই হয় না।

মঞ্জু তাহাকে থাকিবার জগ্গ অমরোধ করিয়াছে। সে থাকিলে নাকি মঞ্জুর ভালো লাগে—মঞ্জুর মুখে এ কথা সে কোনোদিন শুনিবে ইহা বহুদূর নীল সমুদ্রের পারে স্বপ্নরূপের মতো অবিশ্বাস্য ও অবাস্তব। তবুও সে নিজের কানে শুনিয়াছে মঞ্জুই একথা বলিয়াছে। ভোবে উঠিয়া সে বাড়িতে থাকিতে পারিল না। গ্রামের পথে পথে কিছুক্ষণ ঘুরিয়া বেড়াইল। তাহার পর বাড়ি ফিরিয়া পুকুরে স্নান করিয়া আসিল।

নিধুর মা বলিলেন—না খেয়ে বেরিও না যেন—

—মা, ধোপার-বাড়ি থেকে কাপড় এসেচে ?

—কই না বাবা, বিষ্টির জন্তে ধোপা তো আসেনি এদিন।

—আমার ফর্গা কাপড় তোমার বাক্সে আছে ?

—ছেলের আমার সব বিদ্যুটে। কাপড় সব নিয়ে গেলি রামনগরের বাসায়। আমার বাক্সে তোর কাপড় থাকবে কোথা থেকে ? তোর কিছু খোয়াল যদি থাকে ! নিজের কাপড়-চোপড়ের পর্যন্ত খোয়াল নেই। একটি বোমা বাড়িতে না আনলে—

নিধু ঘরের মধ্যে পালাইবার উপক্রম করিতে মা বলিলেন—দাঁড়া, যাগনে কোথাও যেন। একটু মিছরি ভিজিয়ে রেখেচি, আর শশা কেটে—
ঘরের মধ্যে ঢুকিয়া নিধু দেখিল তাহার ফর্সা কাপড় মিজের কাছেও কিছু নাই। আজ সভায় জঙ্গগিরি করিবে কি করিয়া তবে? মাকে সেকথা জানাইল। নিধুর মা বলিলেন—তা আমি এখন কি করি বাপু! এ যে অগ্নায় কথা হল! কর্তার একটা সেকলে পাঞ্জাবী আছে—সেটা তোর গায়ে হয়?

—তা বোধ হয় হতে পারে। বাবা তো মোটামুহু নন, আমারই মতো—
দেখি কেমন?

কিন্তু শেষে দেখা গেল সে পাঞ্জাবীর গলার কাছে পোকায় কাটিয়া ফেলিয়াছে অনেকখানি। তাহা পরিয়া কোথাও যাওয়া চলে না।

নিধুর মা স্মৃতিবিস্মল দৃষ্টিতে পাঞ্জাবীটার দিকে চাহিয়া বলিলেন—উনি তৈরি করেছিলেন তখন এই ষ্টিন-চার মাস আমাদের বিয়ে হয়েছে। তখন কি চেহারা ছিল কর্তার! চুয়োডাঙায় জমিদারী সেরেস্তায় চাকুরি করতেন। তোর মতো শনিবার শনিবার বাড়ি আসতেন—

মায়ের চোখে এমন অতীতের স্বপ্নভরা দৃষ্টি নিধু আরও দু-একবার দেখিয়াছে। তখন সে নিজের চূপ করিয়া থাকে, কোনো কথা বলে না। তাহার মন কেমন করে মায়ের জন্ত। বড় ভালোমুহু। সৎমা বলিয়া নিধু বাল্যকাল হইতেই কখনো ভাবে নাই—তিনিও সৎছেলে বলিয়া দেখেন নাই। নিজের মায়ের কথা নিধুর মনেই হয় না। মা বলিতে সে ইহাকেই বোঝে।

—চাকুর জামা তোর গায়ে হয় না? দেখি গিয়ে না হয় চাকুর মা'র কাছে চেয়ে?

—খাক মা, তোমায় এখানে-ওখানে বেড়াতে হবে না জামার জন্তে।

আমি যা আছে তাই গায়ে দিয়ে যাব এখন। কি খেতে দেবে দাও—
হঠাৎ মা ও ছেলে যেন কি দেখিয়া যুগপৎ আড়ষ্ট হইয়া গেল। ভূত নয়
অবিশিষ্ট—সকালবেলা। মঞ্জু সদর দরজা পার হইয়া উঠানে পা দিয়াছে—
সঙ্গে কেহ নাই। সত্ত্ব জ্ঞান করিয়া ভিজ্ঞে চুল পিঠে এলাইয়া দিয়াছে, চওড়া
অরিপাড় ফিকে নীল রঙের শাড়ি পরনে, তার সঙ্গে ঘোর বেগুনি রঙের
ব্লাউজ, খালি পা, হাতে খানকতক বই, মুখে হাসি।

—এস মা-মণি এস, এস—

—কই সকালে এলুম জ্যাঠাই মা, খাবার কই! খিদে পেয়েচে—নিধুদা
কোথায়?

—এই তো এখানে—বোধ হয় ঘরের মধ্যে—বস মা বস।

—নিধুদা কাল বই পড়তে চেয়েছিলেন তাই নিয়ে এলাম।

—তুমি আমাদের লক্ষ্মীমা-টি। বস আমি আসচি—

ইতিমধ্যে নিধু চুল আঁচড়াইয়া ফিটফিট হইয়া ঘর হইতে বাহির হইল।
তাহার পালানোর কারণ তাহার অসংস্কৃত কেশ। বলিল—এই যে মঞ্জু!
কখন এলে? ওগুলো কি?

—এগুলো আপনার জগে এনেচি—বই—

—দেখি কি কি বই—

—এখন থাক। আপনি জজ হবেন আর্ভিট্র কমপিটিশনে, তা গাঁ শুদ্ধ
সবাই জেনে গিয়েচে জানেন?

—কি রকম?

—বাবার কাছে সব এসে জিগগেস করছিল যে আজ সকালে।

নিধুর মা এই সময় এক বাটি মুড়ি মাখিয়া আনিয়া মঞ্জুর হাতে দিয়া
বলিলেন—খেতে চাইলে কিন্তু তোমার গরিব জ্যাঠাইমার আর কিছু
দেওয়ার—

মজু কথা শেষ করিতে না দিয়াই প্রতিবাদের সুরে বলিল—অমন যদি বলবেন জ্যাঠাইমা, তাহলে আপনাদের বাড়ি ক'কনো আসব না—তাহলে ভাবব পর ভাবেন তাই ভদ্রতা করচেন। বাড়ির মেয়ের সঙ্গে আবার ভদ্রতা কেন? সে যা জুটবে তাই থাকে—কি বলেন নিধুদা? কই নিধুদার কই?

—এই যে ওকেও দিই—মিছরীর জলটা আগে—

—খেয়ে নিধুদা চলুন আমাদের বাড়ি—আবুস্তির কবিতাগুলো একবার পড়ে নেবেন তো?

—হ্যাঁ ভালোই তো, চল।

নিধুর মা বলিলেন—যাবে এখন মা, এখানে একটু বস। ও পুঁটি, মজুকে জল দিয়ে যা মা। পান থাকে?

—না জ্যাঠাইমা—পান খেলেও আমি সকালবেলা খাইনে। একটা পান খাই দুপুরে খাওয়ার পর, আর একেলে একটা। রাত্রে খাইনে—আমার বড় মামীমার দাঁত খারাপ হয়ে গিয়েচে অতিরিক্ত পান দোস্তা খাওয়ার দরুন। আমি দেখে-শুনে ভয়ে ছেড়ে দিয়েচি।

মজু আরও আধঘণ্টা বসিয়া নিধুর মা ও বাড়ির ছেলে-মেয়েদের সঙ্গে গল্পগুজব করিল। সে যে নিধুকে দুপুরে নিমন্ত্রণ করিতে আসিয়াছে, সে কথা প্রকাশ করিল উঠবার কিছু পূর্বে।

মজু চলিয়া গেলে নিধুর মা বলিলেন—সামনের রবিবারে ওদের দুই ভাই-বোনকে খাওয়াতে হবে নেমস্তন্ন করে। রোজ রোজ ওদের বাড়ি খাওয়া হচ্ছে—মান থাকে না নইলে—

—বেশ তো মা, তাই কোরো। আমি আসবার সময় রামনগর থেকে কিছু ভালো সন্দেশ আর রসগোল্লা নিয়ে আসব—কি বল?

—তাই আনিস বাবা। যা ভালো বুঝিস।

সূরাদিন হৈ-হৈ করিয়া কোথা দিয়া কাটিয়া গেল। নিমন্ত্রণ খাওয়া, মঞ্জুর হাসি, আলাপ, আবৃত্তি-প্রতিযোগিতায় সমগ্র গ্রামবাসীর ঈর্ষা প্রশংসা মিশ্রিত দৃষ্টির সম্মুখে মঞ্জুর বাবার ও স্কুল ইনস্পেক্টরের পাশে চেয়ারে বসিয়া আবৃত্তির ভালোমন্দ বিচার করা, আবার সন্ধ্যায় মঞ্জুরের বাড়ি জলখাবার খাওয়া, আবার আড্ডা, গল্প, মঞ্জুর গান, মঞ্জুর হাসি, মঞ্জুর স্নেহবর্ষা-দৃষ্টির প্রসঙ্গ আলো।

নিধুর মা রাত্রে বলিলেন—হ্যারে তুই নাকি জজবাবুর পাশে বসে কি করেছিলি স্কুলে ?

—কে বললে ?

—পালিতদের বাড়ি শুনে এলাম। তোর বড় সখ্যাতি করছিল সেখানে সবাই। বললে—হীরেব টুকরো ছেলে হয়েছে নিধু, অত বড় বড় লোকের পাশে বসে ওটুকু ছেলে—

—তা তোমার ছেলে কম কেন হবে বল না ?

—আমার বুকখানা শুনে বাবা দশ হাত হল।

নিধুর বাবা বাড়িতে থাকিয়াও বড় কাহারো একটা খোজ-খবর রাখেন না। তিনি পরিস্ফুট ডাকিয়া নিধুকে জিজ্ঞাসাবাদ করিলেন সভা সম্বন্ধে।

তিনি লোকের মুখে শুনিয়াছেন, সভায় যান নাই—কোথাও বড় যান না।

সোমবার সকাল। সপ্তাহে এমন দিন কেন আসে ?

অত ভোরে মঞ্জুর সঙ্গে দেখা হওয়ার কোনোই সম্ভাবনা ছিল না। নিধুর মা রাত্রি থাকিতে উঠিয়া ভাত চড়াইয়াছিলেন। স্নান করিয়া ছুটি ভাত মুখে দিয়া নিধু পথে বাহির হইল।

কি আশ্চর্য ! চোখকে বিশ্বাস করা শক্ত। অত সকালে গ্রামের বাহিরের পাকা রাস্তা দিয়া নূপেন, বীরেন ও মঞ্জু বেড়াইয়া ফিরিতেছে।

নিধু বলিল—বীরেন যে ! কখন এলে ?

—কাল অনেক রাত্রে। রাত দশটায় ট্রেনে স্টেশনে নেমে বাড়ি পৌঁছতে একটা হয়ে গেল।

—তারপর মঞ্জু যে বড় বেড়াতে বেরিয়েচ ? কখনো তো—

—বেড়াতে বেরুইনি। মেজলা কাল রাত্রে পথে ফাউন্টেন পেন হারিয়ে এসেচে—তাই ভোরে কেউ উঠবার আগে আমরা তিনজনে খুঁজতে বেরিয়েছিলাম। পাওয়া গেল না।

—স্টেশন পর্যন্ত সারা পথ না খুঁজলে—

বীরেন বলিল—তা নয়, পূব-পাড়ার শাম বাগ্‌দীর বাড়ি পর্যন্ত ফাউন্টেন পেন পকেটে ছিল। শাম বাগ্‌দী রামনগরের হাটে গিয়েছিল, তার গাড়ি ফিরছিল—সেই গাড়িতে এলাম। তাকে পয়সা দিতে গিয়ে দেখেছি পেনটা তখনও পকেটে আছে। বাড়ি এসে আর দেখলাম না।

মঞ্জু বলিল—চলো মেজলা, নিধুদাকে একটু এগিয়ে দিই।

নিধু সুরুতঙ্গ দৃষ্টিতে মঞ্জুব দিকে চাহিল। মঞ্জু বলিল—খেয়ে যাবেন নিধুদা ?

—মা কি না খাইয়ে ছেড়েছেন ? সেটি হবার ঘো নেই তাঁর কাছে। সেই কোন ভোরে উঠে—

—চমৎকার মানুষ বটে জ্যাঠাইমা। সামনের শনিবারে আসা চাই নিধুদা।

—আসব বই কি—

—পুজো তো এসে গেল, পুজোর সময় আমরা সবাই মিলে একটা ছোটখাটো প্লে করব—আপনি আসুন, সামনের রবিবারে তার পরামর্শ করা যাবে। মেজলা এসেচে, বড়দাও সামনের হুণ্ডায় আসবে।^১ বেশ মজা হবে।

—কে অরুণবাবু ? তাঁকে কখনো দেখিনি।

—দেখবেন এখন সামনের রবিবারে।

—তোমরা যাও মঞ্জু, আর আসতে হবে না।

—আর একটু যাই—ওই সাঁকোটা পর্যন্ত—ভারি ভালো লাগে শরতের সকালে বেড়াতে। কি সবুজ গাছপালা! চোখ জুড়িয়ে যায়। আমার ক্লাছে এসব নতুন।”

—তুমি এর আগে পাড়ারগাঁ দেখনি বুঝি মঞ্জু?

—মধুপুর দেখেছি, দুমকা দেখেছি। বাংলাদেশের পাড়ারগাঁয়ে এই প্রথম—সাঁকোর কাছে গিয়া সকলে সাঁকোর উপর কিছুক্ষণ বসিল। বীরেন বলিল—মঞ্জু একটা গান কর তো? বেশ লাগচে সকালটা। নিধুও সে অমুরোধে যোগ দিল। মঞ্জু দু-তিনটি গান গাহিল। ক্রমে বেলা উঠিয়া গেল। দুধারের গাছপালাব মাথায় শরতের রৌদ্র বলমল করিতে লাগিল। নিধু উহাদের কাছে বিনায় লইয়া জোরপায়ে পথ হাঁটিতে লাগিল।

সেদিন এজলাসে ঢুকিতেই সাবডেপুটি সুনীলবাবু জিজ্ঞাসা করিলেন—
কি নিধিরামবাবু, লালবিহারীবাবুকে আমার খবরটা দিয়েছিলেন তো?
সর্বনাশ! নিধু তাহা একেবারে ভুলিয়া গিয়াছে! সে কথা একেবারেই তাহার মনে ছিল না! মঞ্জুর সঙ্গে দেখা হইলে তাহার কোনো কথাই ছাই মনে থাকে না।

সে আমতা আমতা করিয়া বলিল—হজুর—না খবরটা দেওয়া হয়নি।
আমার বাড়িতে অসুখবিসুখ—উনিও স্থলে কি সব কাজে বড ব্যস্ত—
বড়ই দুঃখিত—

—না না সেজ্ঞে কি? সেজ্ঞে কিছু মনে করবেন না। দেখি যদি সুবিধে পাই—সামনের রবিবারে আমি নিজেই সাইকেল করে যাব। সামনের শনিবারে আপনি শুধু জানিয়ে দেবেন দয়া করে যে আমি রবিবারে যেতেও পারি। তাহলেই হল।

সাধন-মোক্তার ফৌজদারী কোর্টের বটতলা হইতে নিধুকে দেখিতে পাইয়া

তাহার দিকে আসিতেছিলেন, সবডেপুটির এজলাসের বাহির হইবার সঙ্গে সঙ্গে নিধু একেবারে সাধনের সামনে গিয়া পড়িল।

আরে এই যে নিধিরাম, আজ এলে সকালে? বেশ, বেশ। চল একটা জামিননামা আছে, যত্না তোমায় খুঁজছিলেন যে, দেখা হয়েছে?

—আজ্ঞে না—এই তো। আমি পা দিয়েছি কোর্টে। কারো সঙ্গে এখনো—
—স্বনীরের এজলাসে কি কেস ছিল?

সাধন-মোক্তার প্রবীণ লোক—সবডেপুটির সামনাসামনি যদিও কখনো ‘জুজুর’ ছাড়া সম্বোধন করেন না কিন্তু সেই সবডেপুটি বা অণু জুনিয়ার হাকিমদের প্রথম পুরুষে উল্লেখ করিবার সময় তাহাদের নামের শেষে ‘বাবু’ পর্যন্ত যোগ করেন না—ইহাতে সাধন ভাবেন তাঁহার চরিত্রের নির্ভীকতা প্রকাশ পায়।

নিধু তাঁহার প্রশ্নের জবাব দিয়া যত্ন-মোক্তারের খোঁজে গেল। বার-লাইব্রেরীতে যত্ন বাড়ুঘো, ধরণী পাল ও হরিবাবু বসিয়া কি লইয়া তর্কবিতর্ক করিতেছেন—এমন সময় নিধুকে ঢুকিতে দেখিয়া যত্ন বলিলেন—আরে নিধিরাম যে এস! সেদিনের রূপনারাণপুরের মারামারির কেসের রায় আজ বেরুবে—আসামী দুজন এখনো এসে পৌছল না। ওদের টাকা আগে হাত করতে হবে—নয় তো কিছু দেবে না—তুমি এখানে বসে থাক। তুমিও তো কেসে ছিলে, তোমারও পাওনা আছে। ওরা এলে কোর্টমুখো যেন না হয়।

—কেন?

—আসামী সব বেকসুর খালাস হয়েছে রায়ে। আমি খবর নিয়েছি।

—এ তো ভালো কথা। তবে তারা এলে—বা টাকা বাকি আছে—

ধরণী ও হরি-মোক্তার নিধুর কথা শুনিয়া হাসিলেন। যত্ন বাড়ুঘো মুখে হতাশার ভাব আনিয়া বলিলেন—জুনিয়ার মোক্তার কিনা, এখনো

গায়ে স্থূল-কলেজের বেঞ্চির গন্ধ। বুঝতে তোমার এখুনো অনেক
দেয়ি, বাবা।

নিধু জিনিসটা এখনো ভালো করিয়া বুঝিতে পারে নাই দেখিয়া প্রবীণ
হরি-মোক্তার বলিলেন—নিধিরাম বাবু, বুঝলেন না? আসামী যদি
ঘুণাকরেও জানতে পারে সে খালাস পাবে, তবে সে আপনাকে বা
যহুদাকে আর সিকি পয়সাও ঠ্যাকাবে না। কোর্টের ওদিকে গেলে ওই
পেস্কার-টেস্কার পয়সা আদায় করবার জন্তে খবরটা শুনিযে দেবে—কারণ
সবাই তো ওং পেতে আছে পরের ঘাড় ভাঙবার—

—আজ্ঞে বুঝেচি হরিদা—এই যে এরা এসেচে। রূপনারায়ণপুরের সেই
মকেল দুজন—

যহুবাবু অমনি তাহাদের উপর যেন ছোঁ মারিয়া পাড়িয়া বলিলেন—এই যে,
এলে? এস বস বাবা। খবর তো বড় খারাপ।

আগন্তুক মকেল দুটি পল্লীগ্রামের লোক, পরনে হাঁটু পর্যন্ত তোলা ময়লা
কাপড়, পায়ে কাদা, গায়ে ময়লা আকার-প্রকার-হীন পিরাণ বা ফতুয়ার
উপর গামছা ফেলা—বগলে ছোট পুঁটুলি। ইহাদের মধ্যে একজনের
চেহারা খুব লম্বা-চওড়া, একমুখ দাড়ি, গোল গোল ভাঁটার মতো চোখ—
দেখিলে মনে হয় বেশ বলবান, তবে নিরীহ ও নির্বোধ ধরনের।

দুজনেই উৎসুক ভাবে বলিল—কি খবর বাবু?

—খবর খারাপ। হাকিম খুব চটেছেন—

—কার ওপর চটলেন বাবু?

—তোমাদের দুজনের ওপর। জেলে যেতে হবে। রায়ের গতিক ভালো
নয়। আজ একবার হৃদমুন্দ শেষ চেষ্টা করে দেখি যদি খালাস করতে
পারি—কিন্তু—

এই সময় যহু বাঁড়ুয্যে নিধুর হাতে একটা স্লিপে কি লিখিয়া দিলেন।

নিধু স্লিপটা পড়িয়া বলিল—বাবু আজ বিশেষ চেষ্টা করবেন তোমাদের
জন্তে, তিন টাকা তেরো আনা ‘ন’ পাই প্রত্যেকের খরচ চাই—

—বাবু, টাকা তো অত মোরা আনিনি ? মোরা জানি রায় বেরুবে—

যহু বাঁড়ুয্যে মুখ খিঁচাইয়া বলিলেন—রায় বেরুবে ? রায়ে তোমাকে
একেবারে বেকসুর খালাস দিয়ে দেবে যে ! যাও গিয়ে এখন দুটি বছর
ধরে ঘানি টানো গে যাও জেলে—তবে তোমাদের চৈতন্য হবে। সেদিন
কি বলে দিয়েছিলাম ?

—তা বাবু, বলে তো দেলেন—কিন্তু ইদিকে যে মোদের দিন চলে না
এমনভা হয়েছে। এই মোকদ্দমায় এপর্যন্ত বাইশ-তেইশ টাকা উকীল-
মোক্তারের দেনা, আর পুলিশ—

—ওসব প্যানপ্যাননি রাখ গে যা তুলে। টাকা না আনিস, এক পা নড়ব
না এখান থেকে—দেখি কি হয়—ক’বছর ঘানি টানতে হয় দেখি
একবার—

—না বাবু আপনি একবার চেষ্টা করে দেখুন—আমি টাকার সন্ধান করে
আনচি—বাজারের দিকি যাই—আমাদের গাঁয়ের দুটো লোক এয়েচে—
তাদের কাছে—

—তা যা শিগগির যা—আর শোন, একটা কথা—কাছে আয়—

তাহারা কাছে সরিয়া আসিলে যহু-মোক্তার গলার সুর নিচু করিয়া বলিলেন
—খবরদার যেন কোর্টের দিকে যাবিনে—তোদের দেখলে হাকিমের রাগ
হবে—শেষকালে বাঁচাতে পারব না তোদের—টাকা এনে আমার হাতে
দিয়ে চুপটি করে এই বারলাইব্রেরীতে বারান্দায় বসে থাকবি বুঝি ?

—বেশ বাবু, যা বলবেন।

লোক দুটি চলিয়া গেলে হরি ও ধরগী-মোক্তার হো হো করিয়া হাসিয়া
ঘর ফাটাইবার উপক্রম করিলেন। হরি-মোক্তার বলিলেন—বাবা, পাকা

লোক যত্ন-দা! ঠুঁর কাছে মকেলের চালাকি? না কোর্টেবু আমলাদের
চালাকি?

যত্ন সগর্বে বলিলেন—আরে ভায়া, টাকা রয়েছে ওদের কাছে। দেবে না—
দিতে চায় না। এই কাজ করচি এই রামনগরের কোর্টে আজ চল্লিশ বছর
প্রায়। দেখে দেখে ঘুণ হয়ে গেলাম। এখুনি দেখ এসে টাকা দিয়ে যাবে।
বাইরে দুজনে পরামর্শ করতে গেল আর কাছা থেকে টাকা খুলতে গেল।
আমি জ্ঞান হয়ে অবধি এই দেখে আসচি—কত হাকিম এল, কত হাকিম
গেল! রমেশ দত্তকে এই কোর্টে দেখেছি—তখন তিনি জয়েন্ট ম্যাজিস্ট্রেট
—সিভিলিয়ান রমেশ দত্ত—আমি আজকের লোক নই! নিধুকে ডাকিয়া
যত্ন বাড়ুয়ে বলিলেন—তুমি বস এখানে। আমি এজলাসে যাব একবার।
কোথাও যেও না টাকা। আদায় না করে।

আজ বারো মাসের মোক্তারী জীবনে নিধু এরকম অনেক দেখিল। এক-
একবার তাহার মনে হয় এর চেয়ে স্কুল-মাস্টারি করা অনেক ভালো ছিল।
এ দুঃখের কথা—পলে পলে মনুষ্যত্বের এই মরণ—কাহার কাছে এসব
কথা ব্যক্ত করিবে সে?

একজন মাত্র মানুষ আছে। সে মঞ্জু। মঞ্জুর কাছে সামনের শনিবারে সব
সে খুলিয়া বলিবে। এ জীবন আর ভালো লাগে না।

কোর্টের কাজ সারিয়া বাহির হইতে প্রায় পাঁচটা বাজিল। সাধন-মোক্তার
তাহাকে বাসায় যাইবার পথে ধরিয়া বলিলেন—ওহে নিধিরাম শোনো
শোনো। আমার সে ব্যাপারটা—

—আজ্ঞে, বুঝেচি। সে এখন হবে না।

—কেন বল তো? জিগগেস করেছিলে বাড়িতে?

—বাড়িতে আর জিগগেস করব? এখন নিজেরই মন নেই। এই তো
রোজগারের দশা—দেখচেন তো সব।

—ওসব কথা কাজের নয় হে। তুমি ছেলেমানুষ এখনি কি যোজগাম করতে চাও ? দিন থাক, সিনিয়র মোক্তারগুলো আগে পটল তুলুক !

—ততদিনে আমাদেরও পটল তুলতে হবে দাদা।

—তুমি ভুল করচো ভায়া। ভেবে দেখ আগে ! তোমাকে এ কাজ করতেই হবে—বাড়িতে এরা তোমাকে পছন্দ—

নিধু বাসায় আসিয়া দোর খুলিল। এখানে নিজেরই রাঁধিতে হয়, একটা ছোকরা চাকর কাজকর্ম করে। ঘর-দোর বড় অপরিষ্কার দেখিয়া সে চারকটিকে ডাকিয়া ধমক দিল। বলিল—উহুনে ঝাঁচ দে, রান্না চড়িয়ে দেব। ভালো বিপদে ফেলিয়াছে সাধন-মোক্তার ! বাড়িতে পছন্দ করিয়াছে তো তাহার কি ? কাল সকালে স্পষ্ট জবাব দিয়া দিবে।

হাত মুখ ধুইয়া রান্না চাপাইবার উত্তোগ করিতেছে, এমন সময় সাবডেপুটির আরদালি আসিয়া একখানা পত্র তাহার হাতে দিল।

সুনীলবাবু তাহাকে একবার এখনি দেখা করিতে লিখিয়াছেন। সেখানেই সে চা খাইবে।

সন্ধ্যা তখনো হয় নাই। সুনীলবাবু বৈঠকখানায় বসিয়া মুন্সেফবাবুর সঙ্গে গল্প করিতেছেন।

—আসুন নিধিরাম বাবু, বসুন। আপনার জ্ঞান আমরা অপেক্ষা করছি, কেউ চা খাইনি—

—আজ্ঞে, আমি তো চা খাইনে—আপনারা খান। নমস্কার মুন্সেফবাবু, বেশ ভালো আছেন ?

মুন্সেফবাবুটি নবাগত। সুনীলবাবু নিধুর পরিচয় করাইয়া দিয়া বলিলেন—
এঁর কথাই বলছিলাম। বেশ প্রমিসিং মুকটিয়ার, যদিও এই সবে—

মুন্সেফবাবু বলিলেন—আপনার নাম শুনেছি এঁর মুখে নিধিরামবাবু। আপনার বাড়ি বুঝি লালবিহারীবাবুর স্বগ্রামে ?

—আজ্ঞে। আপনি তাঁকে চেনেন ?

—হ্যাঁ—আলাপ নেই—তবে একই সার্ভিসের লোক, যদিও তিনি আমাদের টের সিনিয়র। নাম খুব জানি। আচ্ছা, আপনাকে একটা কথা জিজ্ঞেস করব—

—আজ্ঞে বলুন—

—লালবিহারীবাবুর বড় ছেলে অরুণকে আপনি জানেন ?

—দেখিনি তবে নাম শুনেছি—তিনি এখানে আসেননি—তবে শুনছি সামনের রবিবার নাকি আসবেন।

সুনীলবাবু বলিলেন—তবে তো ভালো হল অমরবাবু, চলুন আপনিও সামনের শনিবারে গুঁদের ওখানে। অরুণবাবুকে দেখে আসবেন—কি বলেন নিধিরামবাবু ?

—আজ্ঞে এ তো খুব ভালো কথা।

মুন্সেফবাবু বলিলেন—আপনাকে বলি, আমার একটি ভাগ্যীর সঙ্গে অরুণবাবুর বিবাহের প্রস্তাব হয়েছে—মানে এখনোও ফরম্যালি করা হয়নি গুঁদের সঙ্গে—আমরা দেখে এসে—

—আজ্ঞে খুব ভালো কথা।

সুনীলবাবু বলিলেন—আমরা রবিবারে যাব হুজনে। আপনি দয়া করে শুধু লালবিহারীবাবুকে যদি জানিয়ে রাখেন—

—এ আর বেশি কথা কি বলুন—আমি নিশ্চয়ই বলব এখন। আজ্ঞে না—আমি তো চা খাইনে—এ কাপ নিয়ে যাও—

—আচ্ছা বাড়তি কাপ আমাদের এখানে দিয়ে যা, চা ফেলা যাবে না আমাদের কাছে—কি বলেন অমরবাবু ? আপনাকে কি ওভারলটিন দেবে ?

—আজ্ঞে না, আমি শুধু এই খাবার—একমাশ জল দিলেই—

—ওরে বাবুকে একমাশ জল—আর পান নিয়ে আয় তিন খিলি—

আরও আধকুটা কথাবার্তার পরে নিধিরাম ক্লান্ত লইয়া বাসায় আসিল। তাহার মনটা বেশ প্রফুল্ল। এত বড় বড় অফিসারের সঙ্গে বসিয়া চা খাইয়া আড্ডা দিবে—সে কখনো ভাবিয়াছিল? গ্রামে তাহারা অত্যন্ত গরিব—তাহার বাবা তো কোথাও মুখ পান না গরিব বলিয়া। কাছারীর নায়েব ছবেলা ডাকিয়া শাসন করে। আর আজ সে কি না মহকুমার দণ্ডমুণ্ডের কর্তাদের সঙ্গে সমানে সমানে বসিয়া জলখাবার খাইল, গল্পগুজব করিল। গ্রামে গিয়া একটা গল্প করিবার জিনিস হইয়াছে বটে। কিন্তু তাহার চেয়েও—এ সবেস চেয়েও গর্বের বিষয় তাহার জীবনে—মঞ্জুর সঙ্গে আলাপ, মঞ্জুর মতো শিক্ষিতা, স্বন্দরী, বড় দরের গভর্নমেন্ট অফিসারের মেয়ের সঙ্গে তাহার আলাপ, তাহার বন্ধুত্ব।

তাহার এ সৌভাগ্যের তুলনা হয়? ক'জনের ভাগ্যে এমন ঘটে? কিন্তু মুশকিল ঘটয়া গেল। সামনের রবিবারে যদি ইহার গিয়া উপস্থিত হন, তবে গোলমালে এমন সকলে ব্যস্ত হইয়া উঠিবে যে মঞ্জুর সহিত দেখা-শোনা হয়তো ঘটয়াই উঠিবে না। তাহাদের গ্রামে যখন ইহার যাইতেছেন—তখন তাহাকে ইহাদের লইয়াই ব্যস্ত থাকিতে হইবে—মঞ্জুর সহিত সে দেখা করিবে কখন? মঞ্জু যে বলিয়াছিল আগামী রবিবারে অভিনয়ের সম্বন্ধে পরামর্শ করিবে—সে সব গেল উল্টাইয়া। তাহার সময় কই? সামনের রবিবার একেবারে মাটি।

পরদিন যহু ঝড়ুয়ে কতকটা অবিশ্বাস, কতকটা আগ্রহের স্বরে তাহাকে জিজ্ঞাসা করিলেন—হ্যাঁ হে নিধু, সুনীলবাবু আর মুন্সেফবাবু নাকি সামনের হুণ্ডায় তোমাদের গাঁয়ে তোমাদের বাড়ি যান?

নিধু হাসিয়া বলিল—কে বললে?

—সব শুনে পাই হে, সব কানে আসে। পেঙ্গারবাবুর মুখে শুনলাম। সুনীলবাবুর চাপরালি বলেচে।

—আজ্ঞে ইয়া কাকা, তবে আমাদের বাড়ি তো নয়—আমাদের প্রতিবেশী লালবিহারীবাবু মুন্সেফ—তাদেরই বাড়ি।

—সে যাই হোক, তুমিও একটু তোমার বাড়িতে নিয়ে যেও, খাতির যত্ন কোরো হে। হাকিমদের বাড়ি যাতায়াত করলে বা হাকিম বাড়িতে যাতায়াত করলে মক্কেলের চোখে উকীল-মোক্তারের কদর বেড়ে যায়—ও একটা মন্ত খাতির হে!

যত্ন-মোক্তার যেন একটু ক্ষুণ্ণ হইয়াছেন মনে হইল।

তিনি এতকাল রামনগরে মোক্তারি করিতেছেন—তাহার এখানে শহরের বাগায় নিমন্ত্রণ উপলক্ষ্যে অনেকবার হাকিমদের পদধূলি যে না পড়িয়াছে তাহা নয়—কিন্তু কই, কোনো হাকিম তো তাহার পৈতৃক গ্রামের বাঁশ-বনের অন্ধকারে কখনো যান নাই? এ মান অনেক বড়, এর মূল্য অনেক বেশি। এই অর্বাচীন জুনিয়ার মোক্তারটার অদৃষ্টে কিনা শেষে এই সম্মান জুটিল!

শনিবার সুনীলবাবু নিধুকে এজলাসে বলিলেন—লালবিহারীবাবুর নামে চিঠি আর দিলাম না, বুঝলেন? যদি না যাওয়া হয়? আপনি মুখেই বলবেন—

বাড়ি যাইবার পথে নিধু কতবার ভাবিল—তাই যেন হয় হে ভগবান! ওদের যাওয়া যেন না ঘটে!

যত্ন-মোক্তারের বর্ণিত মান খাতির বা মক্কেলের চোখে মূল্যবৃদ্ধি সে চায় না বর্তমানে—শনি-রবিবারগুলি যেন এ ভাবে নষ্ট না হয়—ভগবানের কাছে এই তাহার প্রার্থনা। মক্কেলের মান খাতিরে কি হইবে?

বাড়ি পৌছিয়া বিপদের উপর বিপদ—তাহার এক বৃদ্ধ মেসোমশায় আসিয়াছেন, তাহার বকুনিরও বিরাম নাই, তামাক খাওয়ারও বিরাম নাই। নিধুকে দেখিয়া তিনি যেন তাহাকে আঁকড়াইয়া ধরিলেন, বাজে বকুনিতে

নিধুর কান ঝালাপালা হইয়া উঠিল। নিধুর মাকে দেখাইয়া বলিলেন—
 চিহ্ন তো কালকের মেয়ে। আমি যখন ওর জ্যাঠতুতো দিদিকে বিয়ে করি,
 তখন চিহ্নর বয়স কত—এতটুকু মেয়ে! রাঙা ছোট্ট শাড়ি পরে গুটগুট
 করে হাঁটত! বস হে নিধুবাবু, তোমরা হলে আমার নাতির বয়সী।
 সন্ধ্যা উত্তীর্ণ হইয়া প্রায় ঘণ্টাখানেক কাটিল। মেসোমশায় তাহাকে আর
 ছাড়েন না। তিনি কোন কালে চা-বাগানে কাজ করিতেন সেই আমলের
 সব গল্প। নিধুর মা তাহার পিতার বয়সী ভগ্নীপতির ঘন ঘন তদারক
 করিতেছেন—বাড়িশুদ্ধ সরগরম। আজ কি মঞ্জুও একবার খোঁজ
 লইল না?

নিধুর মন রীতিমতো দমিয়া গেল।

সন্ধ্যার প্রায় ঘণ্টা দুই পরে নিধু একবার বাড়ির বাহির হইল। লালবিহারী-
 বাবুর বাড়িতে যাইবার খুব ভালো ওজুহাত তাহার রহিয়াছে। হাকিম-
 বাবুদেব আসিবার সংবাদটা দেওয়া। সে চাহিয়া দেখিল উহাদের
 বৈঠকখানায় তাহার বাবা বসিয়া আছেন—পাড়ার আরও দু'একটি বৃদ্ধ
 সেখানে উপস্থিত। দাবা খেলা চলিতেছে।

নিধু ঘরে ঢুকিতেই লালবিহারীবাবু বলিলেন—আরে নিধু যে! এখন
 এলে? এস এস—

—আজ্ঞে কাকাবাবু, একটা কথা বলতে এলাম। আমাদের সাবডেপুটি
 সুনীলবাবু আর মুন্সেফ অমরবাবু কাল আপনার বাড়ি বেড়াতে আসবেন
 বলে দিয়েছেন—

ও! সুনীল। সিমলে তাঁতিপাড়ার সুনীল—বুঝেছি! জগৎতাগণের ছেলে
 সুনীল।—তবে অমরবাবুকে তো আমি ঠিক চিনি। নাম শুনেছি বটে।
 ছোকরা মতো—না? ই্যা তাই হবে—আমাদের সার্ভিসের সিনিয়র
 লোকদের অনেককেই জানি কিনা! অমরবাবু ছোকরাই হবে—

—আজ্ঞে হ্যাঁ, বয়েস বেশি নয়—নতুনও খুব নয়, পাঁচ-ছ'বছরের সার্ভিস।

—ওই হল—আমাদের সার্ভিসে ওসব জুনিয়ারের দল। তা তুমি একবার
বাড়ির মধ্যে গিয়ে তোমার কাকীমাকে কথাটা বোলো হে—

নিধু দ্রুত দ্রুত বক্ষে বাড়ির মধ্যে ঢুকিল। রান্নাঘরের দাওয়ায় ঝি বসিয়া কি
করিতেছে, দু-একটা চাকর ঘুরিতেছে—আর কেহ নাই। নিধু ঝিকে
বলিল—কাকীমা কোথায় ?

—এই তো এখানে ছিলেন—দেখুন বোধ হয় ঘরের মধ্যে কি দোতলায়—

—ও কাকীমা—

দোতলার জানালায় মুখ বাড়াইয়া মঞ্জুই জিজ্ঞাসা করিল—কে ?

নিধুর বৃকে কিসের ঢেউ হঠাৎ যেন উদ্বেল হইয়া উঠিল—বৃক হইতে গলা
পর্যন্ত যেন অবশ হইয়া গেল। সে দিশাহারা ভাবে উত্তর দিতে গেল—
এই যে আমি—আমি নিধু—

—নিধুদা ? বেশ, বেশ লোক যা হোক—দাঁড়ান যাকি—

মঞ্জু জানালা হইতে মুখ সরাইয়া লইল। চক্ষের পলকে সে একেবারে নিচের
বারান্দার দোরের কাছে আসিয়া হাসিমুখে বলিল—বা রে, আপনি কেমন
লোক বলুন তো নিধুদা ? কখন এলেন বাড়ি ?

—সন্দের আগে এসেছি তো—

—এতক্ষণ কোথায় ছিলেন ? আমি আপনার জন্তে কতক্ষণ বসে। নিজে
চা করলাম বাবা খেতে চেয়েছিলেন বলে—আপনার জন্তে রেখে বসে বসে
এই আসেন, এই আসেন—ও মা, একেবারে রাত ন'টার সময় এলেন ?

নিধু অভিমানের স্বরে বলিল—তা তুমিও তো খোজ করনি মঞ্জু ?

—আমি ছবার নূপেনকে পাঠিয়েছি যে—কেন জ্যাঠাইমা বলেননি ?

—কৈ, না তো ?

—বাঃ সন্দের আগে বিকেলের দিকে ছবার নূপেন গিয়েচে—আপনাদের
১০০

বাড়ি কে এক ডব্রলোক এসেচেন, তিনি ওকে ডেকে গল্প করলেন—
কাছে বসালেন—ও বলছিল আমায়—তাহলে জ্যাঠাইমা বলতে তুলে
গিয়েচেন। বাস্তব আছেন কিনা অতিথি নিয়ে। আস্থন-বস্থন—দালানের
মধ্যে বসবেন না রোয়াকে ? আজ বড্ড গরম—ভাত্র মাসের গুমট—
—রোয়াকেই বসি বেশ হাওয়া আছে—

মঞ্জু যেন খানিকটা আপন মনেই বলিল—দেখুন তো চপগুলো সব জুড়িয়ে
জল হয়ে গেল—এখন কি খেতে ভালো লাগে ? বিকেলে বেশ গরম
ছিল—খেয়ে কিন্তু নিন্দে করতে পারবেন না।

নিধু হাসিয়া বলিল—কেন, নিন্দেই তো করব, খারাপ হলেও ভালো
বলতে হবে ?

—খারাপ কখনো হয়নি। রান্নায় আমি স্থুলে সার্টিফিকেট পেয়েছি—
জানেন তা ? তবে জুড়িয়ে গেলে—আপনি বস্থন, আমি ওগুলো গরম করে
নিয়ে আসি—

আধঘণ্টা পরে মঞ্জু, নূপেন, বীরেন ও নিধু বসিয়া গল্প করিতেছিল। হঠাৎ
মঞ্জু বলিল—চলুন ছাদে যাই নিধুদা, বড্ড গরম এখানে—চল মেজদা—
সবাই মিলিয়া খোলা ছাদে সতরঞ্চি পাতিয়া আসর জমাইল। নানা কুতের
গল্প, শহরের গল্প, বীরেনের মুখে উৎসাহের সহিত বর্ণিত গত সপ্তাহে
কলিকাতায় ফুটবল খেলার গল্প ইত্যাদিতে আড্ডা মুখর হইয়া উঠিল।
ছাদের ওপারে হুইয়া পড়া বাঁশঝাড়ে রাতচরা কোনো পাখির ডানা
ঝটপটি। পরিকার শরতের আকাশে স্থম্পষ্ট জলজলে নক্ষত্ররাজি ও
টের্চা ছায়াপথ।

নিধু যেন নতুন মানুষ হইয়া গিয়াছে। জীবনে যেন সে এই প্রথম আনন্দ
কাহাকে বলে জানিয়াছে। এরা কত ভালো ভালো জায়গার গল্প বলিতেছে
—কখনো নিধু সে সব দেশে যায়ও নাই—কলিকাতায় গেলেও সেখানকার

শিক্ষিত বড়লোকদের সঙ্গে এদের মতো মেশেও নাই—ক্লজ-মুল্লেখের
বাড়িতে শিক্ষিত ছেলেমেয়েদের সঙ্গে এত রাত্রি পর্যন্ত বসিয়া গল্পগুজব
করিবে—আর বছর এমন সময় সে-ই কি সে কথা ভাবিতে পারিত ?

হঠাৎ তাহার মনে পড়িল—যেজ্ঞ সে বাড়ির ভিতর আসিয়াছিল—সুনীলবাবু
ও মুন্সেফবাবুর আসার কথা বলিতে—সেকথা এখনো বলা হয় নাই।
মঞ্জুকে দেখিয়া সে সব ভুলিয়া গিয়াছে। কথাটা সে এ আসরেই বলিল।
বীরেন বলিল—ও ! সুনীলবাবু এখানে এসেছেন নাকি সাবডেপুটি হয়ে ?
তা তো জানিনে !

—তঁার সঙ্গে আলাপ আছে বুঝি ?

—খুব। সিমলেতে আমাদের মামারবাড়ির পাশের বাড়িতেই—

মঞ্জু বলিল—ওঁর বোন ভাষু আমার সঙ্গে এক ক্লাসে পড়ত— গত বছর
বিয়ে হয়ে গেল। খুব জাঁকের বিয়ে। সুনীলবাবুর বাবা বেশ বড়লোক—
তিনিও রিটার্ডার্ড সবজ্ঞ—

—কাল এলে কখন আসবেন ?

—বোধহয় সকালের দিকেই— কাকীমাকে বোলো বীরেন। আমি বলতে
ভুলেই গিয়েছি—

রাত্রে নিধুর মা জিজ্ঞাসা করিলেন—ইয়ারে কাল বলব নাকি খেতে মঞ্জুদের ?
বীরেনও যে এসেচে—তাকেও বলতে হয়।

—কিন্তু মা, কাল একটু গোলমাল আছে। সাবডেপুটি আর মুন্সেফ-বাবু
আসবেন বেড়াতে ওদের বাড়ি। কাল দরকার নেই—সেই সব নিয়ে ওরা
কাল ব্যস্ত থাকবে।

সকালে উঠিয়া নিধু রামনগরের পাকা রাস্তার উপর পায়চারি করিল
বেলা আটটা পর্যন্ত। তখনো পর্যন্ত কাহাকেও আসিতে দেখা গেল
না। না আসিলেই ভালো। দিনটা একেবারে মাটি হইয়া যাইবে
১০২

উহারা আসিলে। এত বেলা যখন হইয়া গেল—হয়তো আর আসিবে না।
সাড়ে-আটটা পর্যন্ত রাস্তার উপর অপেক্ষা করিয়া নিধু বাড়ি ফিরিতেছে—
পথে নৃপেনের সঙ্গে দেখা। সে বলিল—বারে, কোথায় গিয়েছিলেন
বেড়াতে? আপনার বাড়ি বসে বসে—

—কেন?

—দিদি সেই সাড়ে-সাতটার সময় আপনাকে ডাকতে পাঠিয়েচে— জল-
খাবার খাবেন বলে খাবার সাজিয়ে বসে আছে—

—আচ্ছা, তুমি যাও নৃপেন। আমি নেয়ে নিই পুকুরে—তারপর যাকি—

আন সারিয়া ফিটফাট হইয়া মঞ্জুরের বাড়ি যাইতে ন'টা বাজিয়া গেল।

বাড়ির ভিতর পা না দিতেই মঞ্জু রান্নাঘরের দাওয়া হইতে বলিল—আজকাল
আপনার হয়েছে কি? লুচি জুড়িয়ে জল হয়ে গেল। কখন ডাকতে
পাঠিয়েচি নৃপেনকে—বেশ লোক যা হোক!

মঞ্জুর মা বসিয়া নিজের হাতেই ওল কুটিতেছেন, তিনিও বলিলেন—এস
বাবা। মঞ্জু এখনো খায়নি, বলে—অতিথিকে না খাইয়ে আগে খেতে
নেই। আমি বললাম, ও তো ঘরের ছেলে, ও আবার অতিথি কোথায় মা,
তুই খেয়ে নে। মেয়ের সবই বাড়াবাড়ি।

নিধু অপ্রতিভ হইল। সঙ্গে সঙ্গে এক অপূর্ব উত্তেজনা ও আনন্দে তাহার
সারা শরীর যেন কিম্বিকিম্বিক করিয়া উঠিল। মঞ্জু না খাইয়া আছে সে খায়
নাই বলিয়া—কেন? কই, কোনো মেয়ে তো এ পর্যন্ত তাহার না খাওয়ার
জন্ত নিজেকে অভুক্ত রাখে নাই! অন্তত কোনো শিক্ষিতা তরুণী বড়লোকের
মেয়ে তো নয়ই। নিজের সৌভাগ্যকে সে যেন বিশ্বাস করিতে পারে না।

মঞ্জু তাহাকে ভিতরের ঘরের বারান্দায় খাইতে দিবা কাছে দাঁড়াইয়া রহিল।
বলিল—আজ যে সেই প্রে সিলেক্ট করার দিন—তাও আপনি ভুলে বসে
আছেন নিধুদা?

—কেন ভুলব ? তবে আজ অল্পবাবুর আসবার কথা ছিল না ?

—বড়দা বেলা বারোটোর কমে কি পৌঁছবেন এখানে ? যদি আসেন তো ওবেলা সবাই মিলে বসে—

—আচ্ছা, মঞ্জু একটা কথা বলব ?

—কি ?

—তুমি না খেয়ে রইলে কেন এত বেলা পর্যন্ত ? অত্যাশ্চর্য নয় তোমার ? কাকীমা কি ভাবলেন ?

—মা আবার কি ভাববেন—বারে !

নিধুর একটু ছুঁছুঁমি বুদ্ধি আসিয়া জুটিল—কেউ কোনো দিকে নাই দেখিয়া সে স্বর নামাইয়া বলিল—ভাবচেন কি শুনবে ? ভাবচেন মঞ্জুর সঙ্গে নিধুর খুব ভাবসাব হয়েছে কি না, তাই ও না খেলে মেয়েও খায় না—

মঞ্জু চোখ পাকাইয়া বলিল—ভদ্রলোকের বাড়িতে বসে ভদ্রলোকের মেয়েদের সম্বন্ধে এ সব কি কথাবার্তা হচ্ছে ?

নিধু হাসিমুখে বলিল—বেশ করচি যাও। কাকীমা ভাবতে পারেন কি না বল ?

—পাড়াগাঁয়ের ভূত কি আর সাধে বলে ?

—আর তোমার পৈতৃক ভিটেও তো এই পাড়াগাঁয়েই—বিলেত থেকে তো আসনি ?

—না এসেচি তো না এসেচি—যান্—কি হবে তার ?

—পাড়াগাঁয়ের ভূত বলে তাহলে আমায় গালাগাল দেওয়াটা কি ভালো তবে ?

এই সময় হঠাৎ বীরেন ও নৃপেন এক সঙ্গে বাস্তবসম্মত ভাবে ঘরে ঢুকিয়া বলিল—ও নিধুদা, ও দিদি—ওঁরা সব এসেচেন—মুন্সেফ অমরবাবু আর সাবডেপুটি—বাইরের ঘরে বাবার সঙ্গে—আমুন শিগগির—


—আমার কথা ঠরা জিগগেস করলেন নাকি ?

—না তা কিছু বলেননি। তবে বলছিলেন আপনাকে দিয়ে খবর দেওয়া ছিল—

মধু বলিল—অত তাড়াতাড়ি গোত্রাসে গিলতে হবে না। এমন তো লার্টসায়েব কেউ আসেনি—ও লুচি দুখানা খেয়ে নিয়েই—একটু পরেই না হয়—আপনাকে তো তাঁরা ডেকে পাঠাননি—

কিন্তু নিধুর পক্ষে ধীরে স্বস্থে বসিয়া বসিয়া লুচি খাওয়া আর সম্ভব নয়।
যাহারা আসিয়াছেন—তাঁহারা তাহার পক্ষে লার্টসায়েবই বটে। এ অবস্থায়
আর থাকা চলে না।

নিধু একপ্রকার ছুটিতে ছুটিতে বাহিরে আসিল।



বৈঠকখানায় অনেক লোক। লালবিহারীবাবু, নিধুর বাবা, সাবডেপুটি ও মুন্সেফবাবু, উপেন হালদার ও স্থানীয় স্কুলের পণ্ডিত উমাপদ ভট্টাচার্য সকলে মিলিয়া বসিয়া পল্লীগ্রামের বর্তমান দুর্দশার কথা আলোচনা করিতেছেন।

স্বনীলবাবু নিধুকে দেখিয়া বলিয়া উঠিলেন—আরে এই যে নিধিরামবাবু! মশাই, রাস্তা বড় ভয়ানক, জায়গায়-জায়গায় এমন কাদা যে সাইকেল চলে না—কাঁধে তুলে আনতে হয়েছে—বসুন।

মুন্সেফবাবু বলিলেন—আপনাদের বাড়িটা কোন দিকে? আমরা সেখানেও যাব—

নিধুর বাবা রামতারণ বিনয়ে ভাঙিয়া পড়িয়া বলিলেন—যাবেন বই কি! গরিবের কুঁড়েতে আপনাদের মতো মহৎ লোকের পায়ের ধুলো পড়বে এ আমরা আশা করতে পারিনে—লালবিহারী ভায়া আমাদের গ্রামের চূড়ো—উনি আজ এসেচেন বলেই আপনাদের মতো লোকের—

সকলে মিলিয়া গ্রাম দেখিতে বাহির হইল। গ্রামে দ্রষ্টব্য স্থানের মধ্যে একটা ভাঙ্গা শিবমন্দির ছাড়া অণু কিছুই নাই। উমাপদ পণ্ডিত সেটির মধ্যে নিজে ঢুকিয়া সকলকে ভিতরে আসিতে বলিলেন। সাপের ভয়ে কেহই ভিতরে গেল না—কবার্টহীন দরজার কাছে দাঁড়াইয়া উকি মারিয়া দেখিল।

নিধুর বাড়ির বাহিরের ঘরেও সকলে একবার আসিয়া বসিলেন। নিধু চা ও খাবারের ব্যবস্থা পূর্ব হইতেই করিয়া রাখিয়াছিল—সকলকে রেকাবি
১০৬

করিয়া খান্নার দেওয়া হইল—সুনীলবাবু ও মুন্সেফবাবু ছাড়া আর কেহ
খাইতে চাহিলেন না। কারণ বাকি সকলে বৃদ্ধ—উহারা সন্ধ্যাস্থিক না
করিয়া খাইবেন না। সকলে মিলিয়া আবার মঞ্জুদের বাড়ি ফিরিল।
সুনীলবাবুকে মঞ্জুর মা বাড়ির ভিতরে ডাকিয়া পাঠাইলেন। বীরেন
তাঁহাকে লইয়া গেল। নিধু সঙ্গেই দাঁড়াইয়াছিল—কিন্তু তাহাকে বীরেন
যেন দেখিতেই পাইল না আজ।

নিধু বাড়ি ফিরিয়া আসিতেই তাহার মা বলিলেন—হ্যারে, মোহনভোগ
খারাপ হয়নি তো ?

—কেন খারাপ হবে ? বেশ হয়েছিল—

—ওরা খেয়েছিলেন তো ? হাকিমবাবুরা ?

—সবটা খেয়েছিল। ভালো হলে খাবে না কেন ?

—হ্যারে তুই-এখানে খাবি না জজবাবুদের বাড়ি খেতে বলেচে ?

এ ধরনের সোজা প্রশ্নের উত্তরে নিধু প্রথমটা কি বলিবে ঠিক করিতে
পারিল না। পরে বলিল—না—বাড়িতেই খাব। ওরা খেতে বলেছিল,
কিন্তু আমার লজ্জা করে মা রোজ রোজ ওদের বাড়ি—

নিধুর মা ক্ষুণ্ণস্বরে বলিলেন—তা আজকের দিনটা কেন খেলিনে—ভালোটা-
মন্দটা হত—বড় বড় বাবুরা এসেছে বাড়িতে—

—তা হোক মা—ফি রবিবারেই তো ওখানে খাচ্ছি। তোমার হাতের
রান্না খাওয়া বরং হয়েই ওঠে না আজকাল।

নিধুর মা মনে মনে খুশি হইলেন। ছেলের মতো ছেলে নিধু। এখন বাঁচিয়া
খাকিলে হয়। আজ তাহার দৌলতেই তো তাঁহাদের খড়ের ঘরে হাকিম-
জকুমের পায়ে ধুলা পড়িল ! বংশের মুখ উজ্জ্বল-করা ছেলে বটে।

ছপুরের পরেই তিনি পুকুরের ঘাটে বাসন মাজিতে গিয়া বুঝিলেন কথটা
সারা গ্রামে রাষ্ট্র হইয়াছে।

ভিসুর মা বড় রায়গিন্নি বলিলেন—হ্যারে ও নতুন বো, তোদের বাড়ি নাকি রামনগর থেকে ডিপ্টিবাবু আর মন্সবাবু এসেছিল ?

—হ্যাঁ দিদি—কার মুখে শুনলে ?

—ওমা এই দক্ষ পিসি বললে—জগোঠাকরণ তাকে বলেছে। সকলেই তো বলেছে। তা বেশ ভালো ভালো।

—জজবাবুদের বাড়ি এসেছিলেন। তা নিধুকে খুব ভালোবাসেন কিনা তাই এখানেও এলেন। বড় ভালো লোক—

ইতিমধ্যে আরও দু-তিনটি পাড়ার ঝি-বো পুকুরের ঘাটে বাসন হাতে আসিলেন। সকলের মুখেই ওই এক প্রশ্ন। হাকিমদের বয়স কত ? নিধুর মা কি খাইতে দিল তাহাদের ?

বড় রায়গিন্নি বলিলেন—তা বেঁচে থাক নিধু। ওকে সবাই ভালোবাসে—অমন ছেলে গাঁয়ে নেই—

—তাই এখন বল দিদি—তোমাদের আশীর্বাদে, তোমাদের মা-বাপের আশীর্বাদে নিধু এখন—

নিধুকে কিন্তু সারাদিনের মধ্যে ও-বাড়ি হইতে কেহই ডাকিতে আসিল না। বৈকালের দিকে সে নিজেই একবার মঞ্জুদের বৈঠকখানায় গিয়া খোঁজ লইয়া জানিল সুনীলবাবু ও মন্সেফবাবু বাড়ির মধ্যে জলযোগ করিতেছেন—এখনি রামনগরে ফিরিবেন। লালবিহারীবাবুকেও বাহিরে দেখা গেল না—সম্ভবত সন্তঃপুরে অতিথিদের আদর-আপ্যায়নে নিযুক্ত আছেন।

কিছু ভালো লাগিল না। পৃথিবীটা হঠাৎ যেন ফাঁকা হইয়া গিয়াছে।

রামনগরের পাকা রাস্তার উপরে খানিকটা উদভ্রান্ত ভাবে প্যায়চারি করিতে করিতে সে একটা সাঁকোর উপরে আসিয়া বসিল। হঠাৎ সে দেখিল দূরে দুখানি সাইকেলে সুনীলবাবু ও মন্সেফবাবু আসিতেছেন। তাঁহারাও

তাহাকে দেখিয়াছেন মনে করিয়া সে উঠিয়া দাঁড়াইল—নতুবা হয়তো গাছের আড়ালে লুকাইয়া পড়িত।

সুনীলবাবু কাছে আসিয়া বলিলেন—নিধিরামবাবু বেড়াতে বেরিয়েছেন বুঝি? খুঁজলাম আপনাকে আসবার সময়, পেলাম না। আপনি কাল সকালে যাবেন?

দুজনই সাইকেল হইতে নামিয়াছিলেন। নিধু কিছুদূর পর্যন্ত তাঁহাদের সঙ্গে হাঁটিয়া আগাইয়া দিয়া আসিল।

সন্ধ্যার পরে সে বাড়ি ফিরিল। নিধুর মা বলিলেন—বিকেলবেলা কিছু খেলিলে—জজবাবুর বাড়ি খাবার খেয়েছিল বুঝি?

—হ্যাঁ।

—সে আমি তখনই বুঝেছি—তাকে না খাইয়ে কি ওরা ছাড়ে কখনো? হাকিমবাবুরা চলে গেল বুঝি?

—গেল।

এমন সময় একটা লণ্ঠনের আলো তাহাদের উঠানে পড়িল—এবং আলোর পিছনে লণ্ঠন ধরিয়া যে দুজন মেটে পাঁচিলের ছোট্ট দরজা দিয়া বাড়ির ভিতরে ঢুকিল—তাহাদের দেখিয়া নিধু বিস্ময়ে আড়ষ্ট হইয়া দাঁড়াইয়া রহিল।

মঞ্জু আগাইয়া আসিয়া বলিল—ও জ্যাঠাইমা, কি করছেন? নিধুদা কোথায়? ওমা এই যে নিধুদা!

হতভম্ব নিধু কিছু জবাব দিবার পূর্বেই মঞ্জু বলিল—বড়দা এসেছেন, আপনাকে খুঁজছেন কখন থেকে। জ্যাঠাইমা, নিধুদা আজ রাত্রে ওখানে থাকে কিন্তু—চলুন নিধুদা—আসুন—বলিয়াই নিধুকে বিশেষ কিছু বলিবার সুযোগ না দিয়াই মঞ্জু ও নূপেন তাহাকে লইয়া বাড়ির বাহির হইয়া গেল। নূপেন আগে, মঞ্জু ও নিধু পিছনে। পথে মঞ্জু বলিল—কি হয়েছে আপনার? সারাদিন দেখিনি কেন? ছিলেন কোথায়?

—বাড়িতেই ছিলাম—যাব আবার কোথায় ?

—আমাদের ওখানে যাননি যে বড় ?

—সব সময়েই যে যেতে হবে তার মানে কি ?

মঞ্জু নিধুর উত্তর শুনিয়া অবাক হইয়া তাহার দিকে অলক্ষণ চাহিয়া থাকিয়া বলিল—কি হয়েছে আপনার ?

—কিছুই না । আমরা গরিব মানুষ, আমাদের আবার হবে কি ?

—কেন রাগ হল কেন হঠাৎ শুনি ? কি হয়েছে ।

—কিছুই না । কি আবার হবে ?

—রাগ হয়েছে তা বুঝতে আমার বাকি নেই । কিন্তু আমি কি কবব নিধুদা

—বাড়িতে আজ সবাই ঠুঁদের নিষে ব্যস্ত । আমি ঠুঁদের সামনে ক'বার বেরিয়েছি ? ডাকবার সুবিধে থাকলে ডাকতাম ।

নিধুর রাগ নিবিয়া জ্বল হইয়া গেল ! বেচারী মঞ্জু ! সে কি করিবে ?

বাড়ি ঢুকিয়া মঞ্জু মাকে ডাকিয়া বলিল—নিধুদা, রাত্রে আমাদের এখানে থাকে বলে এসেছি মা—আজ সারাদিন আমাদের বাড়িতে আসেনি মা—

—এখন গিয়ে ধরে আনলাম—আসুন বডদা'র সঙ্গে দেখা করিয়ে দিই—

পাশের ঘরে মঞ্জুর বডদা অরুণের সঙ্গে আলাপ হইল । অরুণকে নিধুর তেমন ভালো লাগিল না । কথার মধ্যে বেশিভ ভাগ ঝাঁক সুরে ইংরাজি বলে, ঘনঘন সিগারেট খায়—একটু নাক সিঁটকানো গর্বের ভাব কথাবার্তার মধ্যে । অরুণের প্রতি কথায় পাড়াগাঁয়েব সব কিছুর উপর একটা ঘৃণা ও তাক্কিল্যের ভাব বেশ স্পষ্ট ।

—উঃ, কাল কি সোজা কষ্ট গিয়েচে এখানে পৌঁছতে ! বাবারও যেমন কাণ্ড । বলেছিলুম দেশে পূজো করে কি হবে ? ছুটি নিয়ে এই অজ পাড়াগাঁয়ে বসে আছেন—তারপর যখন ম্যালেরিয়াতে ধরবে তখন বুঝবেন ! বাব্বাঃ—এই জঙ্কলে মানুষ থাকে ?

—তা বটে ! আমরা উপায় নেই বলে পড়ে আছি—

—আপনি বুঝি রামনগরে প্র্যাকটিস করেন ? ফিল্ড কি রকম ?

—আগে ভালোই ছিল। এখন দেশে নেই পয়সা—আপনিও তো লম্বা পড়ছেন শুনলাম—

—আমি যদি বসি, আলিপুরে বেরুব। এসব জায়গায় লাইফটা নষ্ট করে কোনো লাভ নেই। পয়সা পেলেও না—

—না, আপনাদের মতো লোক কেন এখানে থাকতে যাবেন ?

আর আধঘণ্টা পরে মঞ্জুকে সে কিছুক্ষণের জন্ত এঁকা পাইল।

মঞ্জু বলিল—বড়দা'র সঙ্গে আলাপ হল ? বেশ লোক বড়দা। কাল সকালে যাবেন নাকি আপনি ?

—যাব না তো কি ? এখানে থাকলে তো চলবে না—

—এখনো আপনার রাগ যায়নি নিধুদা—

—আমরা গরিব মানুষ, আমাদের দ্বারার রাগ—

—ও রকম বলবেন না নিধুদা—আমার মনে কষ্ট হয় না ওতে ?

—হলে কি সারাদিন না ডেকে থাকতে পারতে ?

—কিছু লাভ ছিল না ডেকে। সামনে বেরুতে পারতাম না তো ?

—কেন ?

—গুঁরা সব সময় ঘরের মধ্যে। অমরবাবুর সামনে আমি বেরুইনি—গুঁর সঙ্গে আলাপ নেই আমার।

—আমি ভাললুম আমাকে ওদের সামনে কি করে বার করবে ভেবে আর ডাকলে না—

—ছষ্টু বুদ্ধি আপনার হাড়ে হাড়ে। কুটিল মন কিনা ?

—সে তো জানোই—পাড়াগাঁয়ে'র মানুষের মন কখনো সরল হয় ?

—হয়ই না তো। সেটা মিথ্যে কথা নাকি ?

—তার প্রমাণ পেয়েই গেলে। হাতে হাতেই পেলে—

—এমন আড়ি দেব আপনার সঙ্গে যে আর কখনো কথা বলব না—

—না তা কোরো না লক্ষ্মীটি—তাহলে থাকতে পারব না—

—তবে! তবে ও রকম করেন কেন? এখন বলুন, আর ওসব কথা বলবেন না—

—কক্ষনো না।

—পুজোর সময় প্লে করার কি হবে?

—ঠিক করে ফেল—অরুণবাবু তো আছেন—

—বড়দা বলছিলেন রবি ঠাকুরের ‘ফাস্তুনী’ প্লে করতে—কলকাতায় সম্ভ্রতি হয়েছে—উনি দেখে এসেচেন—

—উনি যা বলেন। বইখানা আনতে বোলো—

—আপনি কি বলেন?

—আমি ওসবের কি জানি? আমরা জানি যাত্রার প্লে—রামনগরে উকীল-মোক্তারের একটা থিয়েটার আছে—তারা পুজোর সময় গিরিশ ঘোষের ‘জনা’ করবে। আমাকে পার্ট নিতে বলেচে—

—কি পার্ট নেবেন?

—তা এখনো ঠিক হয়নি—

—ভালো পার্ট করতে পারেন?

—কখনো করিনি কি করে বলি? তবে চেষ্টা করলে মন্দ হবে না—

—আমার মনে হয় খুব ভালোই হবে।

—তুমি পার্ট করবে তো?

—আমি তো স্থলে পার্ট করে এসেছি ফি বছর। আমার অভ্যাস আছে।

গান যাতে আছে এমন পার্ট আমায় দিত।

—এখানেও তাই নিতে হবে তোমায়, গান তুমি ছাড়া কে গাইবে?

—আচ্ছা, একটা কথা। পাড়ারগায়ে কেউ কিছু বলবে না তো ?

—তোমরা করলে কেউ বলবে না। কাকাবাবুর নামে সবাই তটস্থ, অল্প কেউ হলে রক্ষে রাখত না—

—সে আমি জানি। আচ্ছা, গাঁয়ের আর কোনো মেয়ে পার্ট নিতে পারে ?

—আমার তো মনে হয় না—তবে ভুবন গাঙ্গুলির এক মেয়ে এসেচে বাপের বাড়ি। বিয়ে হয়ে গিয়েচে, জামাই রেলের অফিসে ভালো চাকরি করে—
তুমি ডাকিয়ে জিগগেস করো—ও বিয়ের আগে গোয়াড়ী গার্লস স্কুলে পড়ত মামারবাড়ি থেকে—সেখানে পার্ট করত—

—কি নাম ? আমি তো জানিনে—কালই আলাপ করব—

—নাম হৈমবতী। এখন শুনিচি নাম হয়েছে হেমপ্রভা—ও চিরকাল মামারবাড়িতে মানুষ, এখানে বড় একটা আসত না। তা ছাড়া ওর বাবাও নাকি এখানে থাকত না। যাক—সে কথা বাদ দাও মঞ্জু। ডেকে নিয়ে আসতে পার তো এস—

তারপর সেই কাগজ বার করার কথা মনে আছে তো ?

—সে তো পুজোর পর ?

—না, পুজোর সময় প্রথম সংখ্যা বার করব।

—যা তোমার ইচ্ছে। তুমি যা বলবে আমি তাই করব—

—মনের কথা বলচেন নিধুদা ?

—মনের কথা নিশ্চয়ই। বিশ্বাস কর মঞ্জু।

রাত্রে আহালাদির পরে নিধু চলিয়া আসিল।

আসিবার সময় মঞ্জু দরজার দাঁড়াইয়া বলিল—সামনের শনিবারে আসবেন তো ?

—কেন আসব না ?

—না এলে আপনার সঙ্গে আড়ি দেব—

—দেখ আসি কিনা।

সারা সপ্তাহ ধরিয়া নিধু একটি পয়সা রোজগার করিতে পারিল না। মক্কেলের যেন দুর্ভিক্ষ লাগিয়া গিয়াছে—সকাল হইতে তীর্থের কাকের মতন বাসায় বসিয়া ঘন ঘন হাই তুলিয়া ও বাহিরের দিকে সতৃষ্ণ নয়নে চাহিয়া থাকিয়া নিধুর মোক্তারী ব্যবসাতার উপরই অশ্রদ্ধা ধরিয়া গেল।

নিধুর মুহুরী বলে—বাবু, এ হপ্তাটায় হল কি? মক্কেলের যেন আকাল পড়েছে দেখচি—

—চল কোর্টে আসতে পারে।

কিন্তু কোর্টেও কেহ আসে না। যত্ন-মোক্তার একদিন বলিলেন—ওহে সুনীলবাবুর কোর্টে তো তোমার খাতির আছে—এই জামিনের জগ্নে মৃত্ করে জামিনটা করিয়ে দেও না?

নিধু কেস শুনিয়া বুঝিল এ ক্ষেত্রে জামিন হওয়া অসম্ভব। বাড়িতে চোরাই মাল পাওয়া গিয়াছে—পুলিশ যে রিপোর্ট দাখিল করিয়াছে—তাহার গতকও খুব খারাপ। যত্ন-মোক্তার নিজের নাম খারাপ করিতে রাজী নন, তিনি খুব ভালোই জানেন কোর্ট জামিন দিতে রাজি হইবে না। খাতিরে পড়িয়া যদি সুনীলবাবু জামিন মঞ্জুর করেন—ইহাই যত্নবাবুর ভরসা।

সে বলিল—কাকাবাবু, এ আমার দ্বারা হুবিধে হবে না—

—কেন হবে না? যাও না একবার—

—মাপ করুন কাকাবাবু, সুনীলবাবু কি মনে করবেন?

—চেষ্টা করতে দোষ কি? যাও একবার—

যত্নবাবুর অনুরোধ এড়াইতে না পারিয়া নিধু গিয়া জামিনের দরখাস্ত দিয়া জামিনের প্রার্থনা করিল।

সুনীলবাবু জামিন মঞ্জুর করিলেন।

মক্কেল নিধুকে দুইটি টাকা দিল। নিধু সে দুটি টাকা লইয়া গিয়া যত্নবাবুর

হাতে দিতে তিনি কোনো কথা না বলিয়া তাহা পকেটস্থ করিলেন—কায়ণ মক্কেল আসলে তাঁহার। অবশ্য জামিনামার টাকাটা নিধু পাইল।

বাসায় আসিয়া সে দেখিল সাধন-মোক্তার তাহার জন্ত রোয়াকে বসিয়া অপেক্ষা করিতেছেন। তাহাকে দেখিয়া সাধন বলিলেন—তোমার জন্তে বসে আছি হে নিধিরাম—

—আজ্ঞে, বসুন বসুন। বড় কষ্ট হয়েছে ?

—কিছু কষ্ট নয়। তুমি জামা কাপড় ছেড়ে স্বস্থ হও—আমি একটা বিশেষ দরকারে এসেছি। ওবেলা তোমার কেসটা বেশ ভালো হয়েছে—কিন্তু যত্ন-দা নাকি তোমায় টাকা দেননি ?

—কে বললে আপনাকে ?

—আমি সব জানি হে—আমার কাছে কি লুকোনো থাকে কিছু ? তাই কিনা ?

—আজ্ঞে না, তা নয়। তবে ঠাঁই মক্কেল—

—কিসে ঠাঁই মক্কেল ? তুমি জামিনের দরখাস্ত দিয়ে জামিন মুক্ত করে জিতলে—তবে ঠাঁই মক্কেল হল কি করে ? মক্কেলের গায়ে লেখা আছে নাকি কার মক্কেল ?

—আজ্ঞে ঠাঁই কাছেই প্রথম তারা গিয়েছিল, আমার কাছে তো আসেনি ? তাই—

—তবেই ঠাঁই মক্কেল হয়ে গেল ? অত সূক্ষ্ম ওজ্ঞান জ্ঞান করে মোক্তারী ব্যবসা চলে না ভায়া। হরি আমায় বলছিল, যত্নদার আক্কেলটা দেখলে ? ছোকরা জামিন মঞ্জুর করিয়ে দিলে—আর যত্নদা দিব্যি টাকাটা গাপ করে ফেললে বেমালুম। ঘোর কলি ! আমার পরামর্শ শোনো আমি বলি—

—আজ্ঞে কি ?

—স্বনীলবাবুর কোর্টে তোমার খাতির হয়ে গিয়েচে সবাই জানে।

ইতিমধ্যে প্রচার হয়ে গিয়েচে। তুমি এখন যত্নদার হাত থেকে কেস পেলেও ফি-এর টাকা তাঁকে দিও না। যত্না চিরকাল ওই করে এলেন—মার সঙ্গে যার খাতির, তাকে দিয়ে কাজ করিয়ে নিয়ে নাম কেনেন নিজে—নিধিরাম দেখিল সাধন-মোক্তারের কথায় সামান্য মাত্র সায় দিলেও আর রক্ষা নাই—ইনি গিয়া এ কথা অণু কোথাও গল্প করিবেন। সে ব্যক্তি যত্নবাবুর কানে কথা উঠাইলে তাহার উপর যত্নবাবু চট্টিয়া যাইবেন। তাহার ব্যবসার প্রথম দিকে তাঁহার মতো প্রধান মোক্তারের সাহায্য ও উপদেশ হইতে বঞ্চিত হইলে নিজের সমুহ ক্ষতি।

সে একটু বেশ জোরের সঙ্গেই বলিল—না সাধনবাবু—আমি তা মনে করি না। যত্নবাবু খুব বিচক্ষণ মোক্তার—সত্যিকার কাজের লোক। আমার তিনি পিতৃবন্ধু—আমায় ছেলের মতো দেখেন !

সাধন বিদ্রূপের সুরে বলিলেন—ছেলের মতন দেখেন—তা তো বেশ বোঝাই গেল। মুখে ছেলের মতন দেখি বললেই তো হয় না—সে রকম দেখাতে হয়—ছুটে টাকা লোভ ছাড়তে পারলেন না—ছেলের মতো দেখেন !

—যাক ও নিয়ে আর—

—তুমি আমার ছুটে মকেলের কেস কাল নাও না ? আমার প্রাপ্য টাকার অর্ধেক তোমায় দেব। করবে ?

—কেন করব না বলুন ! দেবেন আপনি—

নিধু একটু আশ্চর্য হইয়া গেল যে সাধন এবার তাহাকে বিবাহ সংক্রান্ত কোনো কথাই জিজ্ঞাসা করিলেন না।

হঠাৎ সাধন বলিলেন—হ্যাঁ হে সেদিন গুঁরা বুঝি তোমার বাড়িতে—

—আমার বাড়ি কোথায় ? লালবিহারীবাবু মুন্সেফ আছেন আমার প্রতিবেশী—তাঁর বাড়িতে গিয়েছিলেন।

—তুমি বাড়ি নিয়ে গিয়ে থাকতির করেছিলে তো?।

—হ্যাঁ তা অবিশিষ্ট সামান্য—আমার আর কি ক্ষমতা—

—বেশ! বেশ! সেই কথাই বলচি—ভালো কথাই তো। তোমার সঙ্গে সুনীলবাবুর বেশ আলাপ হয়ে গিয়েছে, একথা শুনে অনেকেরই খুব হিংসে তোমার ওপর জানো তো?

নিধু আশ্চর্য হইয়া বলিল—সে কি! এর জন্তে কিগের হিংসে?

—তুমি কেন হাকিমদের সঙ্গে আলাপ করবে, বাড়ি নিয়ে যাবে—যখন বারে এত প্রবীণ মোক্তার রয়েছে—কই 'আর কারো বাড়ি তো হাকিম যায়নি?

—এসব নিয়ে কথাবার্তা হয় নাকি?

—তুমি শুনলে অবাক হয়ে যাবে বারের প্রবীণ মোক্তারেরা পর্যন্ত এই নিয়ে বলাবলি করেছে। সবারই হিংসে।

—করুক গিয়ে। ভালোই তো আমার একটু পসার হবে হয়তো ওতে।

—না ভায়া—মক্কেল ভাঙিয়ে নিতেও পারোঁ। হিংসে করে যদি তোমার পেছনে সবাই লাগে—তবে তোমার মক্কেল পাওয়া মুশকিল হয়ে দাঁড়াবে। আমি তোমার হিতৈষী বলেই তোমায বলে গেলাম।

সাধন কি মতলবে আসিয়াছিল নিধু বুঝিতে পারিল না। কিন্তু তাহার মনে হইল সাধনের কথার মূলে হয়তো সত্য আছে। বার-লাইব্রেরী শুদ্ধ সব মোক্তার তাহার বিরুদ্ধে দাঁড়াইল নাকি? নতুবা সারা সপ্তাহে সে একটি পয়সা পাইল না কেন?

শনিবার দিন সকালে বাড়িওয়ালার লোক ও গোয়াল। আসিয়া তাগাদ। দিল। নিধু তাহাদের বুঝাইয়া দিল এ চাকুরি নয় যে মাসকাবারে মাহিনা হাতে আসে—টাকা দিতে দু-চার দিন বিলম্ব হইবে। কিন্তু বাড়িওয়ালার লোক যেন তাড়াইল—বাড়িতে আজ যাইবার সময় জিনিসপত্র সগুদ।

করিয়া লইয়া যাইতে হইবে—হাতে এদিকে একটি পয়সা নাই। তাহার
আয়ের উপরই আজকাল সংসার চলে—থরচ দিয়া না আসিলে পরবর্তী
সপ্তাহে সংসার অচল।

নিধুর মহরী এই সময় আসিয়া বলিল—বাবু, আজ বাড়ি যাবেন ?

—তাই ভাবচি। কি নিয়ে যাই, একটা পয়সা তো নেই হাতে—

—মোক্তারী ব্যবসার এই মজা। মাঝে মাঝে এমন হবেই বাবু। মক্কেল
কি সব সময়ে জোটে ? যত্নবাবুর কাছে একবার যান না ?

—কোথাও যাব না। ওতে আরও ছোট হয়ে যেতে হয়। না হয় আজ
বাড়ি যাব না, সেও ভালো।

শুধু সে শনিবার নয়, পরের শনিবারেও নিধুর বাড়ি যাওয়া হইল না।
মক্কেলের দেখা নাই আদৌ, মুদী ধারে জিনিসপত্র দেয়, তাই বাসাখবচ
একরূপ চলিল, কিন্তু অগাধ পাওনাদারের তাগাদায় নিধু অস্থির হইয়া
উঠিল। ইতিমধ্যে সে বাড়ি হইতে বাবার চিঠি পাইল—শনিবার বাড়ি
কেন আসে নাই—সংসারে খুব কষ্ট যাইতেছে—বাড়ি শুদ্ধ লোককে
অনাহারে থাকিতে হইবে যদি সে সামনের শনিবারে না আসে—আসিবার
সময় হেন হেন আনে তেন আনে—জিনিসপত্রের একটা লম্বা ফর্দ পত্রের
শেষে জুড়িয়া দেওয়া আছে। চিঠিখানা ছাড়া হইয়াছে শুক্রবার—রবিবার
সকালে সে চিঠি পাইল। সে সম্পূর্ণ নিরুপায়—হাতে পয়সা না আসিলে
বাড়ি গিয়া লাভ কি ?

সোমবার সে কি কাজে একবার সুনীলবাবুর কোর্টে গিয়াছিল, তাহাকে
দেখিয়া সুনীলবাবু বলিলেন—নিধিরামবাবু, আপনি এ শনিবারে বাড়ি
যাননি তো !

—না, একটু অল্প কাজে ব্যস্ত ছিলাম।

—আমি গিয়ে আপনাকে কত খুঁজলাম, তা সবাই বললে আপনি যাননি।

—ও ! আপনি গিয়েছিলেন বুঝি ?

—হ্যাঁ—আমি গিয়েছিলাম মানে যাবার জগ্রে বিশেষ করে পত্র দিয়ে-
ছিলেন পিসিমা—মানে লালবিহারীবাবুর স্ত্রী—আমাদের এক পাড়ার
মেয়ে কিনা ?

—ও ! আপনি একা গিয়েছিলেন ?

—এবার একাই। সেই জগ্রেই তো বিশেষ করে আপনার খোঁজ করলাম।
কার সঙ্গে বসে দুদণ্ড কথা বলি। লালবিহারীবাবু প্রবীণ লোক—তাঁর
সঙ্গে কতক্ষণ গল্প বলা যাবে—আপনি যে যাবেন না—আমার সে কথা
মনেই হয়নি। আপনিও তো গত সপ্তাহে আমার কোর্টে একদিনও
আসেননি কিনা।

নিধু মনে মনে ভাবিল—কেস থাকিলে তো কোর্টে আসিবে। মক্কেল নামক
জীব হঠাৎ পৃথিবীতে যে কত দুঃভ-দর্শন হইয়া উঠিয়াছে—তাহার খবর
হাকিমের চেয়ারে বসিয়া কি করিয়া রাখিবেন আপনি ?

মুখে বলিল—আজ্ঞে হ্যাঁ—আমিও যদি জানতাম আপনি যাচ্ছেন, তাহলে
নিশ্চয়ই যেতাম। তা তো জানি না—

সন্ধ্যার সময় সুনীলবাবুর আরদালি আসিয়া নিধুর হাতে একখানি চিঠি
দিল—বিশেষ দরকার, নিধিরামবাবু কি দয়া করিয়া একবার তাঁহার বাসার
দিকে আসিতে পারেন ?

নিধু গিয়া দেখিল বাহিরের ঘরে একা সুনীলবাবুই বসিয়া আছেন—
মুসেকবাবু এসময় এখানে বসিয়া আড্ডা দেন, আজ তিনি আসেন নাই।
নিধুকে দেখিয়া সুনীলবাবু চেয়ার ছাড়িয়া উঠিয়া বলিলেন—আসুন
আসুন—সেদিন আপনাদের বাড়ি গিয়ে আদর যত্নে বড় আনন্দ
পেয়েছিলাম। বসুন—

নিধু লজ্জিত মুখে বলিল—আমাদের আবার আদর যত্ন ! আপনাদের মতো লোককে কি আমরা উপযুক্ত আদর অভ্যর্থনা করতে পারি ? সামান্য অবস্থার মানুষ আমরা—

—ও সব বলবেন না নিধিরামবাবু। ওতে মনে কষ্ট পাই—বসুন, আমি দেখি চায়ের কি হল—আপনার সঙ্গে খাব বলে বসে আছি—আপনি চা খান না বুঝি আবার ? একটু মিষ্টি-মুখ করে—

চা ও জলযোগ পর্ব চুকিয়া গেলে সুনীলবাবু বলিলেন—আপনার সঙ্গে আমার একটা কথা আছে।

নিধু একটু বিস্মিত হইলেও মুখে তাহা প্রকাশ করিল না। তাহার মতো লোকের সঙ্গে কি কথা আছে একটা মহকুমার সেক্রেটারি, সে ভাবিয়াই পাইল না।

—লালবিহারীবাবুকে আপনি তো ভালো করেই জানেন ?

—আজ্ঞে হ্যাঁ, তা জানি বই কি ? এক গাঁয়ের লোক। তবে উনি এবার অনেকদিন পরে গাঁয়ে এলেন। একবার দেখেছিলাম ছেলেবেলায়—আর এই দেখলাম এবার—বাবার সঙ্গে খুব আলাপ—

—তা তো হবেই। আপনার বাবাকে এ রবিবারেও দেখলাম লালবিহারী-বাবুর বৈঠকখানাতেই। ওঁরা সমবয়সী প্রায়—

—ঠিক সমবয়সী নয়, বাবার বয়েস বেশি।

—আচ্ছা, আপনি লালবিহারীবাবুর মেয়ে মঞ্জরীকে দেখেছেন তো ?

নিধু প্রায় চমকাইয়া উঠিয়া সুনীলবাবুর মুখের দিকে চাহিয়া বলিল—মঞ্জরী ?—ও মঞ্জু ? আজ্ঞে হ্যাঁ, তাকে দেখেছি বই কি, তা—

সুনীলবাবু সম্ভবত নিধুর ভাবান্তর লক্ষ্য করিলেন না। তিনি সহজ স্বরেই বলিলেন—তাকে দেখেছেন তাহলে ?

—আজ্ঞে হ্যাঁ—দেখেছি বই কি। কেন বলুন তো ?

সুনীলবাবু ফুল হানিয়া বলিলেন—সেদিন লালবিহারীবাবু ওর সঙ্গে
বিবাহের প্রস্তাব করলেন কিনা? তাই বলচি।

—কার বিবাহ?

—মানে আমার সঙ্গেই।

—ও!

—আপনি কি রকম মনে করেন? মেয়েটি ভালোই, কি বলেন?
আপনাদের গাঁয়ের মেয়ে তাই জিগগেস কচ্চি।

—ইয়ে—হ্যাঁ—ভালো বই কি। বেশ ভালো।

—অবিশি আমার মতে হবে না। আমার বাবা কর্তা, তাঁকে জিগগেস
না করে কোনো কাজ হতে পারে না। তাঁরা মেয়েটি দেখেচেন কারণ
একই পাড়ায় ওর মামারবাড়ি, সেখানে থেকে স্থলে পড়ে। আমাদের
বাড়িও ওদের যাতায়াত আছে—তবে আমি কখনো দেখিনি—কারণ
আমি থাকি বিদেশে। কলকাতায় থাকি আর ক’দিন?

—কেন রবিবারে তাকে দেখলেন না?

—ঠিক মেয়ে দেখানো উদ্দেশ্য ছিল না। তা ছাড়া বাবা মেয়ে না দেখে
গেলে আমার দেখায় কিছু হবেও না। তবুও ঠুঁরা একবার মেয়েটিকে
দেখাতে চাইলেন তাই দেখলাম। দেখতে ভালোই অবিশি—সে আমি
আগেও শুনেছিলুম। কিন্তু শুধু বাইরে দেখে—

নিধুর মনের ভিতর হইতে কে যেন বলিল, একথার উত্তর তাহার দেওয়া
উচিত। মঞ্জুকে সে সব সময় সর্বত্র বড় করিয়াই রাখিতে চায়। কাহারও
মনে তাহার সম্বন্ধে ছোট ধারণা না হয়, এটা দেখা তাহার সর্বপ্রথম কর্তব্য।
স্বতরাং সে বলিল—আজ্ঞে না শুধু বাইরে নয়—মেয়েটি সত্যিই ভালো।

সুনীলবাবু একটু আগ্রহের স্বরে বলিলেন—আপনার তাই মনে হয়?

—আমার কেন শুধু, আমাদের গ্রামের সকলেরই তাই মত।

মতিহাই ওরকম মেয়ে আজকাল বড় একটা দেখা যায় না—
—বেশ, বেশ। আপনার মুখে একথা শুনে খুব খুশি হলাম। দেখুন মশাই,
কিছু মনে করবেন না—যার সঙ্গে সারা জীবন কাটাতে হবে—তাকে
অন্তত একটু যাচাই না করে নিয়ে—আমার অন্তত তাই মত। বাবা যা
দেখবেন, সে তো দেখবেনই।

নিধু একথায় বিশেষ কোনো জবাব করিল না।

নিধুর মনের মধ্যে কেমন এক প্রকার অব্যক্ত যন্ত্রণা। সুনীলবাবুর শেষ
কথাটা তাহার কানে যেন অনবরত বাজিতেছিল—সারাজীবন মঞ্জুর সঙ্গে
থাকিবেন কে? না সুনীলবাবু।

মঞ্জু সুনীলবাবুর জীবনসঙ্গিনী?

বাসায় ফিরিবার পথে সুনীলবাবু তাহার সহিত গল্প করিতে করিতে খানিক
দূর পথ আসিলেন। শুধু মঞ্জুর সম্বন্ধেই কথা। নানা ধরনের আগ্রহভরা প্রশ্ন
—কখনো খোলাখুলি, কখনো প্রশ্নের উদ্দেশ্য নিধুর কাছে ঠিক বোধগম্য
হইল না।

—আচ্ছা, নিধিরামবাবু, মঞ্জু কিরকম লেখাপড়া জানে বলে আপনার
মনে হয়?

—বেশ জানে। এবার তো ফার্স্ট ক্লাসে উঠবে—

—আমি তা বলছি নে—পড়াশুনোতে কেমন বলে মনে হয় আপনার?
বেশ কালচার্ড?

—নিশ্চয়ই। হাতের লেখা কাগজ বার করবে শিগগির। লেখাটেখার
ঝোঁক আছে, গান করে ভালো—

—গান শুনেচেন আপনি?

এখানে কি ভাবিয়া নিধু সত্যকথা বলিল না। তাহার সামনে বসিয়া মঞ্জু
গান গাহিয়াছে, এ কথা এখানে বলিবার আবশ্যক নাই, না বলাই ভালো।

সে বলিল—কেন শুনব না। দেখেচেন তো আমাদের বাড়ীর সামনেই
ওদের বাড়ি। মাঝে মাঝে গান করে ওদের বাড়িতে, আমাদের বাড়ি থেকে
শোনা যায় বই কি।

মোটের উপর নিধুর মনে হইল মঞ্জুকে দেখিয়া সুনীলবাবু মুগ্ধ হইয়াছেন।
মঞ্জুর চিন্তাই এখন তাঁহার ধ্যান জ্ঞান—ইহার প্রশ্নোত্তর ও কথাবার্তা সবই
এখন রূপমুগ্ধ তরুণ প্রেমিকের প্রলাপের পর্যায়ভুক্ত।

বাসায় আসিয়া নিধু মোটেই স্থির হইতে পারিল না। মনের সেই যন্ত্রণাটা
যেন বড় বাড়িয়াছে। মঞ্জু সুনীলবাবুর সারাজীবনের সাথী হইবে—একথা
যেন সে কিছুতেই সহজভাবে গ্রহণ করিতে পারিতেছিল না।

সেদিন আর সে রাঁধিল না। চাকরে জিজ্ঞাসা করিল—কি খাওয়ার ঘোণাড
করে দেব বাবু?

—তুই দুটো পয়সা নিয়ে গিয়ে বন* চিড়ে কিনে আন—তাই খাব এখন।
শরীরটা ভালো নয়, রান্না আজ পারব না।

—সে কি বাবু? চিড়ে খেয়ে কষ্ট পাবেন কেন? আমি সব বন্দোবস্ত
করে দিচ্ছি—

—না, না—তুই যা এখন। আমার শরীর ভালো না—আর কিছু খাব না।
আহারাদির পরে তিন ঘণ্টা কাটিয়া গেল। রাত প্রায় একটা। নিধু দেখিল
সে মাথামুণ্ড কি যে ভাবিতেছে! নান্না অদ্ভুত চিন্তা। জীবনে সে কখনো
এরকম ভাবে নাই।

গভীর রাত্রে ঠাণ্ডা হাওয়ার তাহার উত্তপ্ত মস্তিষ্ক একটু শীতল হইল।
আচ্ছা, সে এত রাত পর্যন্ত কি ভাবিয়া মরিতেছে? কেন তার চক্ষে ঘুম
নাই? মঞ্জু যাহারই জীবনের সাথী হউক—তাহার তাহাতে আসে
যায় কি?

আজ একটি সপ্তাহের মধ্যে যে একটি পয়সা আয় করিতে পারে নাই—

“তাহার পক্ষে মঞ্জুর চিন্তা করাও অত্যাশ্চর্য। কখনো কি সম্ভব হইবে মঞ্জুরকে তাহার জীবনসঙ্গিনী করিবার ?

আকাশ কুহুমের আশা ত্যাগ করাই ভালো।

মঞ্জুর বাপ-মা তাহার সঙ্গে কখনো কি মঞ্জুর বিবাহ দিবেন বলিয়া সে ভাবিয়াছিল ? সে নিজের মনের মধ্যে ডুবিয়া দেখিল এমন কোনো দুরাশা তাহার মনে কোনোদিনই জাগে নাই। তবে আজ কেন সে সুনীলবাবুর কথায় এত বিচলিত ও উত্তেজিত হইয়া উঠিয়াছে ? মঞ্জুর সঙ্গে মুখের আলাপ আছে মাত্র। ইহার অতিরিক্ত অণু কিছুই নয়।

অপর পক্ষে মঞ্জু বড়মানুষের মেয়ে—সে লালিত হইয়াছে সচ্ছলতার মধ্যে, প্রাচুর্যের মধ্যে, অণু ধরনের জীবনের মধ্যে। সুনীলবাবুর সঙ্গে বিবাহ হইলে মঞ্জু জল হইতে ডাঙায় পড়িবে না—নিজেদের শ্রেণীর মধ্যেই সে থাকিতে পারিবে। চিরায়ত্ত জীবনযাত্রায় জোর করিয়া পরিবর্তন নিতান্ত আবশ্যক হইয়া পড়িবে না।

সুনীলবাবুর ঘরে সে মঙ্গলময়ী গৃহলক্ষ্মী রূপে—

না, কথাটা ভাবিতে গেলে আবার যেন বৃকের মধ্যে কোথায় খচ করিয়া বাজে।

পরদিন সকালে জন দুই মক্কেল আসিল। ধানের জমি লইয়া মারপিটের মোকদ্দমা, তবে নিধুর মনে হইল ইহারা যাচাই করিয়া বেড়াইতেছে কোন মোক্তারের কত দর—শেষ পর্যন্ত যত্নবাবুর কাছে গিয়াই ভিড়িবে।

নিধু নিজের দর কিছুমাত্র কমাইল না—কিন্তু বিশ্বাসের সহিত দেখিল লোক দুটি তাহাকেই মোক্তার নিযুক্ত করিল। ঘণ্টাখানেক ধরিয়া তাহাদের লইয়া ব্যস্ত থাকিবার পর নিধু বলিল—তোমরা যাও বাজার থেকে খাওয়া-দাওয়া সেরে এস—প্রথম কাছারীতেই তোমাদের মোকদ্দমা রুজু করে দেব—আমার টাকা আর কোর্টের খরচটা দিয়ে যাও—

—কত ট্যাকা বাবু?

—এই যে বললাম সবশুদ্ধ চারটাকা সাড়ে ন' আনা—

—বাবু, ট্যাকা কাছারীতেই দেবাহু—

—না বাপু, ও সব দেবাহু-টেবাহু শুনচিনে—টাকা দিয়ে যাও—ডেমি কিনতে হবে, আর্জির স্ট্যাম্প কিনতে হবে—সে সব কে কিনবে ঘরের পয়সা দিয়ে?

—বাবু, এখন তো মোদের কাছে নেই—

—কাজে নেই তো মোকদ্দমা করতে এসেচ কেন মরতে? জানো না যে রামনগরে এলেই পয়সা সঙ্গে করে আনতে হয়?—

—তবে বাবু যদি আপনি একটা ঘণ্টা সময় দেন—প্রথম কাছারীতেই মোরা টাকা দেবাহু—ট্যাকা না পেলে আপনি মোদের মোকদ্দমা করবেন না—

ইহার চলিয়া কিছুদূর যাইবার পথেই আরও জন চারেক মজ্জেল আসিয়া হাজির হইল। তাহাদের সহিত কথা কহিয়া নিধু বৃষ্ণিল—ইহার পূর্বের মারপিটের মোকদ্দমারই ফরিয়াদি পক্ষ। ইহারাই মার খাইয়াছে। একজন প্রস্তুত ব্যক্তি মাথায় লাঠির দাগ সমেত আসিয়াছে।

ইহাদের মোড়ল বলিল—বাবু, আমাদের হক মোকদ্দমা—মাথায় এই দেখুন লাঠির দাগ—ট্যাকা যা লাগে আপনারে দেবাহু—এখনি এই পাঁচটা ট্যাকা রাখুন আপনি—মোকদ্দমার এজাহারটা করিয়ে দিন—

যদিও ইহাদের কথাবার্তা শুনিয়া নিধুর মনে হইল ইহারাই ঠিক কথা বলিতেছে—টাকাও দিতে এখনি প্রস্তুত—তবুও নিধু দুঃখিতচিত্তে বলিল

—বাপু, আমি অপর পক্ষের কেস নিয়ে ফেলেচি—তোমাদেরটা নিতে পারব না—

—বাবু, আপনি কা লাগে নেন মোদের কাছ থে। ক' ট্যাকা দিতে হবে

বলুন আপনারে মোরা দিয়ে যাই। মোদের গাঁয়ের একটা মোকর্দমায় আপনি জামিন করিয়ে 'দিয়েছিলেন—বড় সুখ্যাতি পড়ে গিয়েচে।

মোক্কার যদি দিতে হয় তবে আপনারেই দেব—

—না, সে হবে না। আমি তাদের কথা দিয়েচি—

নিধুর মুহুরী নিধুকে আড়ালে ডাকিয়া লইয়া বলিল—নিয়ে ফেলুন ওদের কেস বাবু, মনে হল পয়সা দেবে—পয়সা হাতে আছে এদের। অপরপক্ষ তো আপনাকে টাকা দেয়নি তবে কিসের বাধ্য-বাধকতা তাদের সঙ্গে ?

—না হে, যখন কথা দিয়ে ফেলেচি, কেস নেব বলেছি—তখন কি আর টাকার লোভে অগৃদিকে ঘুরে দাঁড়ানো চলে ?

—টাকা পেলে না হয় সে কথা বলতে পারতেন বাবু—কিন্তু টাকা তো আপনি হাত পেতে নেননি তাদের কাছে ?

—ও একটা কথা হে। মুখের কথা টাকার চেয়েও বড়—

—বাবু, এ মহকুমায় এমন কোনো উকীল-মোক্কার নেই যিনি এমনধারা করেন। মক্কেল টাকা দিলে না তো কিসের মক্কেল ?

—না, সে আমার দ্বারা হবে না। অপরে যা করেন, তাঁদের খুশি। আমি তা করতে পারব না—

অগত্যা ইহারা চলিয়া গেল। কিন্তু কোর্টে গিয়া নিধু সবিস্ময়ে শুনিল ধরণী-মোক্কার পূর্বপক্ষের মোকর্দমা রুজু করিতে সুনীল বাবুর কোর্টে ছুটিতেছেন।

নিধুর মুহুরীই বলিল—দেখলেন বাবু, বললাম তখন আপনাকে। ধরণী-বাবুকে ওরা মোক্কার দিয়েচে—আপনার কাছে যাচাই করতে এসেছিল—টাকার কথা বলতেই পিছিয়ে পড়েচে—

—এ তো ভারি অগ্ৰায় কথা ? ধরণীবাবুই বা আমার কেস নিতে গেলেন কেন ?

—ওরা তো ধরগীবাবুকে আপনার কথা কিছু বলেনি ? তিনি হয়তো কম টাকাতে রাজি হয়েছেন—

—ওদের একজনকে আমার কাছে ডেকে আনতে পার ?

—তারা বাবু আসবে না। আমি কত খোশামোদ করলাম ওদের। ধরগীবাবু মোক্তারনামায় সই করেছেন—তঁার মুহুরী ডেমি লিখে ফেলেচে—

—এ পক্ষ ?

—তারা যত্নবাবুকে মোক্তার দিয়েচে। যত্নবাবু সাবডেপুটি বাবুর এজলাসে দাঁড়িয়ে আছেন তাঁর মক্কেল নিয়ে—

—এ কিরকম ব্যাপার হল হে ?

—এই রকমই হয় এখানে। আপনি নতুন লোক, এসব জানবেন কোথা থেকে ? তাইতো তখন আপনাকে বললাম ওদের টাকা নিয়ে ফেলুন—

—টাকার জগ্রে একটা অণ্ডায় কাজ আমি তো করতে পারিনি ? তাহলেও ধরগীবাবুকে আমি একবার বলব—

—বলবেন না বাবু, তাতে উল্টে ধরগীবাবু ভাববেন মক্কেলের জগ্রে আমার সঙ্গে ঝগড়া করচে। সেটা বড় খারাপ দেখাবে। ধরগীবাবুর তো কোনো দোষ নেই—তিনি না জেনেই কেস নিয়েছেন। আমার কথাটা শুনবেন বাবু, এই কাজ করে করে আমার মাথার চুল পেকে গেল—এখানে মোক্তারে মোক্তারে কম্পিটিশন্—উকীলে উকীলে কম্পিটিশন্—যিনি যত কয় হাঁকবেন, টাকা বাকি রাখবেন, তাঁর কাছে তত মক্কেল যাবে।

—তাহলে তুমি কি ভাব না যে ধরগীবাবু আমার মক্কেল ভাঙিয়ে নিয়েছেন ?

—মোক্তারনামায় সই যখন করেননি, টাকা তারা যখন দেয়নি—শুধু মুখের কথায় কি কেউ কারো মক্কেল হয় বাবু ? আপনি মুখের কথার দাম দিলেন

—আর কেউ যদি না দেয় ? সবাই কি আপনার মতো ? সত্যি কথায়

এসব লাইনে কাজ হবে না বাবু সে আপনাকে আমি অটুগই বলেচি।
মফস্বলে সর্বত্রই এই অবস্থা দেখবেন।

বারের মধ্যে নিধুর বয়সী আর একজন ছোকরা মোক্তার ছিল। তাহার
নাম নিরঞ্জন বন্দ্যোপাধ্যায়—সেও নিধুর মতোই গরিব গৃহস্থ পরিবারের
ছেলে—নিধু তবুও কিছু কিছু উপার্জন করিত—সে বেচারীর অদৃষ্টে
তাহাও জুটিত না—বেচারী তাহার মাসীমার বাড়ি থাকিয়া মোক্তারী করে
বলিয়া আনাহারের কষ্টটা ভোগ করিতে হয় না—কিন্তু কিছু করিতে
পারিতেছে না বলিয়া তাহার মন বড় খারাপ। নিধুর কাছে মাঝে মাঝে
সে মনের কথা বলিত। নিধুর মনে খুব দুঃখ হইয়াছিল এই ব্যাপারে—সে
নিরঞ্জনের কাছে ঘটনাটি সব বলিল।

নিরঞ্জন হাসিয়া বলিল—তোমার মতো লোকের মোক্তারী করতে আসা
উচিত হয়নি নিধিরাম—

—কেন হে? কি দেখলে আমার অসুপযুক্ততা?

—এত সরল হলে এ ব্যবসা চলে? যে কোনো ঘুষ মোক্তার হলে কৌশলে
তার কাছে টাকা বার করে নিতো।

—আমি ভেবেচি যত্নাকাকে কথাটা বলব। তিনি কেন আমার মক্কেল
নিলেন?

—তোমার কথা শুনে আমার হাসি পাচ্ছে হে! ছেলেমানুষের মতো কথা
বলচ যে। একথার মানে হয়? মক্কেলের গায়ে কি নামের ছাপ আছে
নাকি? শোনো—আমার পরামর্শ। যত্নবাবু তোমার হিতাকাঙ্ক্ষী—তাকে
মিথ্যা চটিও না। তুমি তবুও কিছু কিছু পাও—আমার অবস্থাটা ভেবে
দেখ তো? মাসীমার বাড়ি না থাকলে না খেয়ে মরতে হত—

—আর ব্যবসা চলে না—অচল হয়েচে ভাই। এক পয়সা আয় নেই আজ
দু-হপ্তা—

—দু-হণ্ডা তু ভালা। আমি তোমার এক বছর আগে বসেচি, এ পর্যন্ত তেজিশ টাকা মোট উপার্জন হয়েছে। তবুও ভাবচি, ভবিষ্যতে হতে পারে—নইলে কোথায় যাব ?

—বুড়গুলো না ম'লে আমাদের কিছু হবে না। যহুবাবু, ধরণীবাবু, শিব ভট্টাচার্য, হরিহর নন্দী—এগুলো পলাশীর যুদ্ধের বছর জন্মে আজও বার জুড়ে বসে আছে। এরা সরলে তবে যদি আমাদের—তা সবাই অস্থখামার পরমায়ু নিয়ে এসেচে—

—সেই ভরসাতেই থাক—ওহে, একটা কথা শুনেছ ?

—কি ?

—সাধনবাবু নাকি গুর ভাইবির সঙ্গে সাবডেপুটিবাবুর বিয়ের চেষ্টা করচে—

নিধু আশ্চর্য হইয়া বলিল—সে কি !

নিরঞ্জন হি হি করিয়া হাসিয়া বলিল—সে বড় মজা। সাধন-মোক্তার আর তার মামা দুর্গাপদ ডাক্তার দুজনে গিয়ে আজ সকালে সুনীলবাবুর বাসায় খুব ধরাধরি করেচে—আজ ওবেলা বাড়িতে চায়ের নেমস্তন্ন করেচে—উদ্দেশ্য মেয়ে দেখানো।

—তুমি জানলে কি করে ?

—দুর্গাপদ ডাক্তারের ছেলে আমার ক্লাসফ্রেণ্ড, সে বলছিল—সে আবার একটু বোকা মতো, তার বিশ্বাস এ বিয়ে হয়ে যাবে। মেয়ে নাকি ভালো। নিধু আপন মনেই বলিল—ও তাই !

—তাই কি ?

—কিছু না এমনি বলচি—

—আমি একটা কথা বলি শোনো। সিরিয়াসলি বলচি। তুমি বার ছেড় না, তোমার হবে। তোমার মধ্যে ধর্মজ্ঞান আছে, তোমার ধরনের মোক্তার
৯(৬১)

বারে নেই। বৃড়ুগুলো সব বদমাইস, স্বার্থপর। তোমার অনেষ্টি আছে, বুদ্ধিও আছে, তুমি এরপরে নাম করবে, তোমার গুণ বেশিদিন চাপা থাকবে না।
—বই নেই যে?*

—বরাত ভাই, সব বরাত—নইলে সি. ডবলিউ. এন. আর. সি. এল. জে-র লাইব্রেরী নিয়ে বসে থাকলেও কিছু হয় না। যত্নবাবু বা হরিহর নন্দী এয়া ইংরিজি পড়ে বুঝতে পারে না—সেকালের ছাত্রবৃত্তি পাশ মোক্তার—ওদের হচ্ছে কি করে? তবে আমাকে বোধ হয় শিগগির ছাড়তে হবে—
—ছাড়বে কেন? বৃড়ুগুলো মরুক—অপেক্ষা কর—


—ততদিনে আমার বাড়ির সব না খেয়ে মরে যাবে—বিষয় সম্পত্তি বেচে চলচে এখন—

—যত্নাকাকে বলে তোমায় দুচারটে জামিননামা দেব—জামিনের ফি'টা পাবে এখন।

—তোমার নিজের পৈলে তাতে উপকার হবে—তুমি আমায় দেবে কেন?
—যদি আমি দিই—

—সেই জন্তেই তো বলচি। তোমার মতো অনেস্ট লোক বারে আসেনি—
অস্তুত রামনগরের বারে। তুমি অনেক দূর যাবে—

নিধু বাসায় আসিবার পথে সাধন-মোক্তারের কাণ্ডটা ভাবিয়া আপন মনেই হাসিল। তাই আজকাল তাহার সঙ্গে এতবার দেখা হওয়া সত্ত্বেও বিবাহের কথা একবারও মুখে আনে না—এমন বড় গাছে বাসা বাঁধিবার দুশাসয় তাহার মতো নগণ্য জুনিয়ার মোক্তারের কথা ভুলিয়াই গেল বেমালুম। ভালোই হইয়াছে—নতুবা একে পয়সার টানাটানি—তাহার উপর সাধন-বড়োর বিবাহের ঘটকালির উৎপীড়নে ও তাগাদায় তাহাকে রামনগর ছাড়িয়া পালাইতে হইত এতদিন। সম্বাহের বাকি দিনগুলিও ক্রমে কাটিয়া আসিল। একটি মক্কেলও আসিল না।



আখিন মাসের প্রথম সপ্তাহ। পূজা আসিয়া পড়িল। রামনগরের পূজা-কমিটি দুদিন মিটিং করিল, তাহার পাঁচ টাকা ঠান্ডা ধরিয়াছে—তাহার নামে চিঠিও আসিয়াছে। এদিকে বাড়িওয়ালা তাগাদার উপর তাগাদা করিয়া হয়রাণ হইয়া গেল—এখনও ভদ্রতা দেখাইয়া চলিতেছে বটে—কিন্তু পূজার ছুটিব আগেও যদি টাকা না দিতে পারে—তবে হয়তো বাড়ি ছাড়িবার নোটিশ আসিয়া হাজির হইবে একদিন।

শনিবার।

আগের দিন যত্ন-মোস্তারের অনুগ্রহে একটা জামিনের ফি পাওয়া গিয়াছে—আরও অস্তত দুটি টাকা, হইলে আজ বাড়ি যাওয়া চলে। নইলে শুধুহাতে বাড়ি গিয়া লাভ কি?

বার-লাইব্রেরীতে বসিয়া বসিয়া নিধু ফন্দি খাটিতেছে—কি উপায়ে তাহার মূহুরীর কাছে দুটি টাকা ধার লওয়া যায়—কারণ নিধুর অপেক্ষা তাহার মূহুরীর অবস্থা ভালো—বাড়িতে জায়গা জমি, চাষবাস—এখানেও তাহার দাদা স্ট্যাম্পভেঙারি করিয়া এই কোর্টের প্রাঙ্গণ হইতেই মাসে দেড়শো-দুশো টাকা রোজগার করে—দুটি টাকা দিতে তাহার কষ্ট হইবার কথা নয়—কিন্তু বাবু হইয়া ভৃত্যের কাছে সোজা-সুজি টাকা ধার করা চলিবে না—কোনো একটা কৌশল খাটাইতে হইবে।

এমন সময় সাধন-মোস্তার ঘরের মধ্যে ঢুকিয়া বলিলেন—এই যে নিধু বসে আছে! ওহে, একটা জামিনের দরখাস্ত মূড করবে? তিনটে টাকা পাবে যদি মঞ্জুর করে দিতে পার। মক্কেলের সঙ্গে আমি ঠিক করে ফেলেছি।

বুঝলে আসামী, বাপ টাকা দিয়ে কেস চালাচ্ছে, টাকা নির্ধাত আদায় হবে।
নিধু নিবোধ নয়—সাধন-মোক্তারের আসল উদ্দেশ্য সে বুঝিয়া ফেলিল।
বুঝিয়া জিজ্ঞাসা করিল—কার কোর্টের কেস?

—সাবডেপুটির কোর্টে।

এই কথাই নিধু ভাবিয়াছিল। শক্ত কেসের আসামী, জামিন সহজে মঞ্জুর
হইবার সম্ভাবনা কম, সুনীলবাবুর সঙ্গে আজকাল নিধুর খাতির জমিতেছে
একথা বারে রাষ্ট্র হইতে দেরি হয় নাই। তাহার খাতিরের চাপে যদি
জামিন মঞ্জুর হইয়া যায়—জামিননামা সহ করিয়া শতকরা সাড়ে
বারোটাকা জামিনের ফি মারিবেন সাধন-মোক্তার।

সে বলিল—কত টাকার জামিন হবে মনে হয়?

—যা মঞ্জুর করাতে পার—পাঁচশো টাকার কম হবে বলে মনে হয় না।

অনেকগুলি টাকা জামিনের ফি। সাধন-মোক্তার তাহাকে ভাগ দিবে না
বা তাহার চাওয়াও উচিত নয়—তবে সে যদি জামিন মঞ্জুর করাইতে
পারে—সে নিজেই জামিন দাঁড়াইবে না কেন? কথাটা সে বলিয়াই
ফেলিল। সাধন বিশ্বয়ের ভান করিয়া বলিলেন—তুমি জামিন দাঁড়াবে অত
টাকার? বড্ড রিস্ক। তারপর ধর যদি পালিয়ে-টালিয়ে যায়—বেলবও
বাজেয়াপ্ত হল অতগুলো টাকা গুনোগার দিতে হবে—

—তা সে তখন পরে দেখা যাবে—

—না হে না—আমি তোমার হিতাকাঙ্ক্ষী, আমি তোমায় সে রিস্কের
মধ্যে যেতে দিতে পারিনে—এ লোকটা বদমাইস, যদি পালিয়ে যায়
তোমাদের মতো জুনিয়ার মোক্তারের এখন এ সব বিপদের মধ্যে যাওয়া
ঠিক নয়।

নিধু আর বেশি কিছু বলিতে পারিল না—টাকার ভাগ লইয়া প্রবীণ
সাধন-মোক্তারের সঙ্গে ইতরের মতো তর্কাতর্কি করিতে তাহার প্রবৃত্তি

হইল না। সে শুধু বলিল—বেশ, তাই হবে। তবে জামিন মুক্ত করার ফি
আমায় আর কিছু বেশি করিয়ে দিন, তিন টাকায় পারব না—

সাধন নিধুব দিকে চাহিয়া বিশ্বয়ের স্বরে বলিলেন—বল কি হে? জুনিয়ার
মোক্তারেবা কেন, অনেক সিনিয়র মোক্তার দু-টাকায় এ কেস করবে—
তুমি বেশি পাচ্চ শুধু আমার বলা কওয়ায়, নইলে যত্না বা হরিবাবু
রয়েচেন কি জন্তে? তোমায় স্নেহ করি বলে আমি ওদের বুঝিয়ে-সুজিয়ে
তোমার কাছে নিয়ে আসছি—ভাবলাম—যদি পায়, তো আমাদের
আপনার লোকেই টাকাটা পাক—

নিধুর রাগ হইল। সাধন সবদিক হইতেই তাহাকে ফাঁকি দিতে
চাহিবেন—এ তাহার পক্ষে অসম্ভব। সে দৃঢ় কণ্ঠে বলিল—আজ্ঞে না, আমি
পাঁচ টাকার কমে পারব না—আপনি আসামীদের বলে দেবেন—

—সে কি হে! তুমি কি আবার ফি ডিকটেট করিতে আরম্ভ করলে নাকি?
—আজ্ঞে মাপ করবেন। আমি ওর কমে পারব না—আর একটা কথা,
ফিয়ার টাকা আগাম দিতে হবে—

—নাঃ, তোমাদের মতো ছোকরাদের নিয়ে দেখছি মহাবিপদ। তোমরা
বুঝলেও বুঝবে না। তা নিও, তাই নিও। কি আর করব? আপনার
লোকের মতো দেখি তোমাকে—

সুনীলবাবুর এজলাসে জামিন মঞ্জুর করাইতে বেলা তিনটা বাজিয়া গেল।
তাহাব সাফল্য দেখিয়া হয়তো বা কোনো কোনো প্রবীণ মোক্তার কিছু
ঈর্ষান্বিত হইয়া উঠিবেন ভাবিয়া নিধু এজলাসে উপস্থিত হরিহর নন্দীর
কাছে গিয়া বলিল—হরিবাবু, কোনো ভুল করিনি তো?

হরিহর মোক্তার বলিলেন—কেন ভুল করবে? চমৎকার সওয়াল জবাব—
নিধু বিনীতভাবে বলিল—আপনাদের কাছেই শিখেছি হরিদা।
আপনাদের দেখে দেখেই শেখা—এখন আশীর্বাদ করুন—

হরিহর নন্দী অতিমাত্রায় উৎফুল্ল হইয়া বলিলেন—না, না, আশীর্বাদ তোমায় কি করব—তুমি ব্রাহ্মণ, ওকথা বলতে নেই। তোমরা ছেলে-ছোকরা তাই বোঝ না। তোমরা আমাদের প্রণাম—তবে তোমার কল্যাণ কামনা করচি, উন্নতি তুমি একদিন করবে—

কোট হইতে চলিয়া আসিবার সময় সুনীলবাবু বলিলেন—নিধিরামবাবু, আজ দেশে যাবেন ?

—আজ্ঞে হ্যাঁ—

—আমার খাসকামরায় একবারটি আসেন যদি, একটা কথা আছে—
কোটে উপবিষ্ট অনেকগুলি তরুণ ও প্রবীণ মোস্তারের ঈর্ষান্বিত দৃষ্টির সম্মুখে নিধু ত্রস্তপদে সুনীলবাবুর খাসকামরায় প্রবেশ করিল।

সুনীলবাবু বলিলেন—আপনার সঙ্গে একটা চিঠি দেব।

—বেশ, দিন না—আমি দেব এখন।

—আর একটা কথা—আপনি সাধনবাবুকে কতটা জানেন ?

—ভালোই জানি। কেন বলুন তো স্ত্র ?

—উনি লোক কেমন ?

—লোক মন্দ নয়।

সুনীলবাবু একটু ভাবিয়া বলিলেন—তাই জিজ্ঞেস করচি। আচ্ছা, আপনি সেমবারে আসুন, একটা কথা বলব আপনাকে।

—বেশ, স্ত্র।

—লালবিহারীবাবুকে আমার প্রণাম জানাবেন—আর আপনি তো বাড়ির মধ্যে যান, পিসিমাকে বলবেন সামনের শনিবারে আমায় নেমস্তন্ন করেচেন, কিন্তু ডিষ্ট্রিক্ট ম্যাজিস্ট্রেট আসবেন সেদিন—হুদিন থাকবেন—সুতরাং কোথাও যাওয়া-আসা যাবে না। আপনারও যাওয়া হবে না—

—আমার ? কেন ?

—আপনার সঙ্গে ইন্টারভিউ করিয়ে দেব ম্যাজিস্ট্রেটের।

—আমার মতো লোকের সঙ্গে ইন্টারভিউ ?

—এসব ভালো। আপনার পসারের পক্ষে এগুলো বড় কাজের হবে।

—আপনার যা ইচ্ছে, স্তর।

শনিবারে কোর্ট বন্ধ হইতে চারিটা বাজিল। নিধু সঙ্গে সঙ্গে বাগায় আসিয়া কোর্টের পোশাক ছাড়িয়া সাধারণ পোশাক পরিয়া কিছু খাইয়া লইল। পরে বাসার চাবি চাকরের হাতে দিয়া কুড়ুলগাছি রওনা হইল।

এতদিন সে ভবিষ্যৎ অবসর পায় নাই। নানা গোলমালে দিন কাটিয়াছে।

জামিন মুক্ত করিবার ফি না পাইলে আজ বাড়ি যাওয়াই ঘটিয়া উঠিত না।

এতদূর রাস্তা হাঁটিয়া বাড়ি পৌছিতে সন্ধ্যা হইয়া যাইবে। তা হইলেই

বা কি ? মঞ্জুর সঙ্গে সে আর দেখা করিবে না। তাহার সঙ্গে মঞ্জুর আর

দেখাশোনা হওয়া ভুল। হুদিন পরে সে পরস্মী হইতে চলিয়াছে—এখন

তাহার সঙ্গে মেলামেশা করা মানে কষ্ট ডাকিয়া আনা। অতএব আর গিয়া

সে মঞ্জুর সহিত দেখা করিবে না। মিটিয়া গেল। কিন্তু সে যতই গ্রামের

নিকট আসিতেছিল—তাহার সঙ্কল্পের দৃঢ়তা সর্বদা নিজের মনেই সন্মোহ

জাগিল। মঞ্জুরে না দেখিয়া থাকিতে পারিবে তো ? কেন পারিবে না ?

কতদিনের বা আলাপ ? খুব পারিবে এখন। পারিতেই হইবে।

নিধুর মা বলিলেন—বাবা ! কি ছেলে তুমি ! এতদিন পরে মনে পড়ল ?

—কি করি বল। এক পয়সা রোজগার নেই, এসে কি করব ?

—নাই বা থাকল রোজগার। তোকে দেখতে ইচ্ছে করে না আমাদের ?

কালী, জল নিয়ে আয়।

নিধু হাত মুখ ধুইয়া খাবার খাইয়া মায়ের সঙ্গে রান্নাঘরের দাওয়ায় বসিয়া গল্প করিতে লাগিল। হঠাৎ নিধুর মা মনে পড়িয়া দাওয়ার হুঁরে বলিয়া

উঠিলেন—ভালো কথা ! তোকে যে মঞ্জু কতবার আজ ডেকে পাঠিয়েছিল !

আগের দু শনিবারও ঠিক সন্দের আগে লোক পাঠিয়েচে খোজ নিতে
তুই এসেচিস কিনা। একবার গিয়ে দেখা করিস সকালে। আজ বড় রাত
হয়ে গেল। কথা ভালো করিয়া শেষ হয় নাই, এমন সময় বাহির হইতে
নূপেনের কণ্ঠস্বর শোনা গেল—ও কালী, ও পুঁটি-দিদি, নিধুদা আসেনি ?
নিধু তাড়াতাড়ি বাহিরে গিয়া বলিল—এই তো এলাম। এস, এস, ভালো
আছ নূপেন ?

—আমি আসব না, আপনি আসুন নিধুদা। বাবা:, আপনাকে খুঁজে
খুঁজে—

—এতরাতে যাব ? ন'টা সাড়ে-ন'টা হবে যে।

—দিদি পাঠিয়ে দিলে দেখতে আপনি এসেচেন কিনা—

—কিন্তু নিয়ে যেতে তো বলেনি ? কাল সকালে যাব—

—আসুন আপনি—কিছু রাত হয়নি। আমাদের বাড়ির খাওয়া-দাওয়া
মিটেতে রাত বারোটো বাজে রোজ। এখন আমাদের সন্দে।

মঞ্জু অনেক অস্থযোগ করিল। এতদিন কি হইয়াছিল—গ্রামের কথা কি
এমন করিয়া ভুলিতে হয় ? কি হইয়াছিল তাহার ?

নিধু বলিল—পয়সার অভাব মঞ্জু। বাড়িভাড়া দিতে পারিনি বলে দুবেলা
তাগাদা সইচি। কি করে বাড়ি আসি বল। কথাটা ঝোঁকের মাথায় বলিয়া
ফেলিয়াই নিধু ভাবিল টাকা-পয়সা বা নিজের কষ্ট-দুঃখের কথা মঞ্জুর
কাছে বলা উচিত হয় নাই। কিন্তু নিধুর উক্তি মঞ্জুর মুখে কেমন এক
পরিবর্তন আনিল। সে সহানুভূতির স্বরে বলিল—সত্যি নিধুদা ?

—মিথ্যে বলব কেন ?

—আপনি চলে এলেন না কেন ? টাকা আমি দিতাম—আমায় বললেন না
কেন এসে, মঞ্জু আমার টাকার দরকার, দাও। সেখানে অল্প কেহ তখন
ছিল না—থাকিলে মঞ্জু একথা বলিতে পারিত না। নিধু বলিল—কেন
১০৬

তোমাকে অনর্থক বিরক্ত করব ? মঞ্জু তীব্রকণ্ঠে বলিল—অনর্থক বিরক্ত করা ভাবেন এতে নিধুদা ? বেশ তো আপনি ?

মঞ্জুর রাগ দেখিয়া নিধু অপ্রতিভ হইল—কিন্তু পরক্ষণেই তাহার কথার মধ্যে একটা অভিমানের স্বর আসিয়া পৌছিয়া গেল। সে বলিল—সে জন্তে না মঞ্জু। তোমার টাকা নেব—তারপর পুজোর পর এখান থেকে চলে যাবে তোমরা, টাকাটা শোধ দিতে হয়তো দেরি হবে—

—এ ধরনের কথা আপনি বললেন আমায় ! বলতে পারলেন আপনি ?

—কেন পারব না ? তোমার সঙ্গে আর দেখা করা উচিত না আমার—জানো মঞ্জু ?

মঞ্জু বিস্ময়ের স্বরে বলিল—কেন ?

—জানো না কেন ? আর দুদিন পরে তোমরা চলে যাবে এখান থেকে। আবার হয়তো আসবে না কতদিন। হয়তো দু-দশ বছর। আমরা সামান্য অবস্থার মানুষ—বিদেশে যাওয়ায় পয়সা নেই—দেখাই হবে না আর।

—ওঃ এই ! নিশ্চয়ই দেখা হবে। আমরা আসব মাঝে মাঝে।

—তাতে কি ? তোমার আর কতদিন ? দুদিন পরে পরের ঘরে চলে গেলেই ফুরিয়ে গেল।

—কেন, নিধুদা, এসব কথা আপনার মাথার মধ্যে আজ এল কেন শুনি ?

—কারণ না থাকলে কার্য হয় না। ভেবে ছাথ—

মঞ্জু ব্যস্তসমস্ত আগ্রহে বলিল—কি হয়েছে নিধুদা ? কি অগত্য করে ফেলেচি আমি ? এমন কি কথা—

—আমি কিছু বলতে চাইনে। তুমি বুদ্ধিমতী—বুঝে দেখ—

মঞ্জু অল্প কিছুক্ষণ ভাবিয়া বলিল—বুঝেচি নিধুদা।

—ঠিক বুঝেচ ?

—হ্যাঁ।

—তবেই ভেবে ছাখ তোমার সঙ্গে আর আমার দেখা হওয়া উচিত মঞ্জু ?
তুমি বড়লোকের মেয়ে—ভুলে যাবে। কিন্তু আমি গরিব জুনিয়ার
মোক্তার—আমার প্রথম জীবনে যদি উংসাহ ভেঙে যায়—উত্তম নষ্ট হয়ে
যায়—আর কিছু করতে পারব না বারে। সব ফিনিশ—

মঞ্জু নিরুত্তর রহিল। নিধু চাহিয়া দেখিল তাহার বড়-বড় চোখ দুটি জলে
টসটস করিয়া আসিতেছে—এখনি বুঝি বা গড়াইয়া পড়িবে।

নিধু বলিল—রাগ আমি করিনি, তোমার কোনো দোষ নেই তাও আমি
জানি। দোষ আমারই, আমারই বোঝা উচিত ছিল। ভুল আমার।

মঞ্জু এবারও কিছু বলিল না, নতমুখে সিমেন্টের মেজের দিকে চাহিয়া
রহিল। নিধু বলিল—ও কথা আর তুলব না, থাক গে। তোমাদের
প্রতিমা কই মঞ্জু ? পুজো তো এসে গেল।

মঞ্জু জলভরা চোখে নিধুর দিকে চাহিল। কোনো একটা অগায় কাজ
করিয়া ফেলিলে ছোট মেয়ে বকুনি খাইবাব ভয়ে যেমন ভাবে গুরুজনের
দিকে চায়—মঞ্জুর চোখে তেমনি মিনতি মাথানো ভয়ের দৃষ্টি। যেন সে
এখনি বলিয়া ফেলিবে—যা হয়ে গিয়েচে, হয়ে গিয়েচে—আমায় আর
বকো না তুমি।

নিধুর মন এক অপরূপ দয়া ও সহানুভূতিতে ভরিয়া উঠিল।

তাহার কপালে যাহাই থাক—এই সরলা করুণাময়ী বালিকাকে সকল
প্রকার বাথা ও লজ্জার হাত হইতে বাঁচাইয়া লইয়া চলাই যেন তাহার
জীবনের কাজ।

সে বলিল—বললে না প্রতিমা হচ্ছে না কেন ? পুজো হবে না ?

—প্রতিমা এখানে হচ্ছে না তো। দেউলে—সরাবপুরের কুমোরবাড়ি
ঠাকুর গড়া হচ্ছে—সেখান থেকে দিয়ে যাবে।

—তোমরা সেই প্নে করবে তো ?

—আপনি ঐ রকম বলেন—

মঞ্জু যেন হঠাৎ ভরসাহারা ও অসহায় হইয়া পড়িয়াছে। যে মঞ্জু চিরকাল হুকুম করিতে অভ্যস্ত, নিজের ইচ্ছার পথে কোনো বাধা যে কোনোদিন। পায় নাই, বাপ-মায়ের আদরের মেয়ে বলিয়াও বটে, সচ্ছল অবস্থার মধ্যে লালিত-পালিত বলিয়াও বটে—আজ যেন সে তাহার সমস্ত কাজের জন্তে নিধুর পরামর্শ খুঁজিতেছে। নিধু মঞ্জুর করিলে তবে যেন সে কাজে উৎসাহ পাইবে। একথা ভাবিতেই নিধুব মন আবার যেন সতেজ হইয়া উঠিল, মধোর দুঃখ ও অবসাদের ভাবটা কাটিয়া গেল।

—তা তুমি কর না মঞ্জু, আমি পেছনে আছি—

—পেছনে থাকলে চলবে না, আপনাকে পাট নিতে হবে—

—যদি বল, তাও নেব।

—আপনি পাট নেবেন না, প্লে'র মধ্যে থাকবেন না শুনলে আমার ওতে আর মন যায় না। উৎসাহ চলে যায়।

—কেন এরকম হল মঞ্জু? কোথায় তোমরা ছিলে, কোথায় আমরা ছিলাম ভাব তো!

সে তো সব জানি। কিন্তু তা বললে মন কি বোঝে নিধুনা? মনে যা হয়, তাই হয়। বোঝালে কি কিছু বোঝে?

—কি বই করবে ঠিক করলে?

—বড়দা বলে গিয়েচেন রবি ঠাকুরের 'ফাল্গুনী' করতে—ওঁদের কলেজে এবার করবে। উনি শিখিয়ে দেবেন। পড়েচেন আপনি?

—পাগল তুমি মঞ্জু? আমাদের বিজ্ঞেবুদ্ধি জানতে তোমার আর বাকি নেই। নাম শুনেচি, এই পর্যন্ত।

—কবিতা পড়েননি তাঁর?

—খুব কম।

•—আমার কাছে ‘চয়নিকা’ আছে—নিয়ে যাবেন। ভালো বই—

—সে তো জানি। তাই থেকে সেবার ‘কচ ও দেবদানী’ করেছিলে—
চমৎকার হয়েছিল, এখনো যেন দেখতে পাই চোখের সামনে।

—আর লজ্জা দেবেন না নিধুদা। ওকথা থাক। আপনাকে পাট নিতে
হবে—নেবেন তো ?

—তুমি বললেই নেব। কবে থেকে মহলা দেবে ?

—কি দেব ?

—তোমরা যাকে বল রিহার্গেল—কবে থেকে শুরু করবে ?

—আপনার কথা শুনে এমন হাসি পায় আমার নিধুদা ! হুঃখের মধ্যেও
হাসি পায়। আমার মনে হয় আপনি সব সময় আমাদের মধ্যে থাকুন—
আপনি যখন নিজের বাড়ি চলে যান জ্যাঠাইমার কাছে গেতে—আমি
তখন কতদিন মাকে বলেচি, নিধুদা এখানেই তো ছপূরবেলা পর্যন্ত থাকে,
বাড়ি যাবে কেন খেতে, তার চেয়ে এখানে কেন খেতে বললে না ? মা
বলতেন—দূর, রোজ রোজ ও যদি তোদের বাড়ি না যায় ? আমার কিন্তু
মনে হত, পরে, আমরা নিধুদার পর হলাম কি করে ? তা কেন লজ্জা
করবে নিধুদার ?

—আমিও তাই ভাবতাম কিন্তু। যদি যেতে না হয়, যদি সব সময়
তোমাদের বাড়ির আমোদ-আহ্লাদের মধ্যে থাকি—

—আচ্ছা, রামনগরে থাকবার সময়ে আমাদের বাড়ির কথা আপনার মনে
পড়ে না ?

—পড়ে।

—কার কার কথা মনে পড়ে ?

—কাকাবাবুর কথা, কাকীমার কথা, বীরেনের কথা, নুপেনের কথা, বুড়া
ঝিটার কথা, কুকুরটার কথা, বেড়ালটার কথা।

মঞ্জু মুখে আঁচল দিয়া ছেলেমাছের মতো খুশিতে খিল খিল করিয়া হাসিয়া-
উঠিল।

—উঃ, মোক্তারী আপনি করতে পারবেন বটে নিধুদা। কথার ঝড়ি
সাজিয়ে ফেললেন যে! এদের সকলের কথা মনে পড়ে—না?

—যা পড়ে, তাই বলেচি।

—ভালোই তো। আমি কি বলেচি আপনি তা না বলেচেন? আমি আর
কে, যে আমার কথা মনে পড়বে?

—তা, পড়লেই বা কি?


—আপনি মনে ব্যথা দিয়ে বড্ড কথা বলেন কিন্তু—সত্যি বলচি নিধুদা—
কেন গুরুত্ব করেন? আমার মন তো পাথরে তৈরি নয়?

মঞ্জু এইমাত্র হাসিবার সময় যে আঁচল মুখে দিয়াছিল—তাহাই তুলিয়া
চোখে দিল। নিধু দেখিল সত্যি তাহার চোখ জলে ভরিয়া আসিতেছে।
সেকেণ্ড ক্লাসে পড়ে, শিক্ষিতা মেয়ে—অথচ কি ছেলেমাছের মেয়ে মঞ্জু!
আর কি অদ্ভুত লীলাময়ী। হাসি অশ্রু একই সময়ে মুখে চোখে
বিরাজমান।

নিধু হাসিয়া বলিল—আচ্ছা, সত্যি মঞ্জু তুমি ভাবলে এসব সত্যি? আর
সকলের কথাই মনে পড়েচে—আর তোমার কথাই পড়ল না? এ তুমি
বিশ্বাস কর?

—দেখুন মন যা বলে, মাঝে মাঝে মাছের কাছ থেকে তার জন্তে উৎসাহ
পাওয়া চাই। তবেই মন খুশি হয়ে ওঠে। মুখে শোনা এজন্তে বড় দরকার।
বলুন এবার?

—না, যা বলেচি, তার বেশি আর কিছু শুনতে পাবে না আমার
কাছে, মঞ্জু।



নিধু সে রাত্রে বাড়ি আসিয়া একটি অদ্ভুত স্বপ্ন দেখিল।

কোথায় যেন সে একটা পথ বাহিয়া চলিয়াছে—তাহার সামনে একটা বড় পুকুর—পুকুরে এক রাশ পদ্মফুল ফুটিয়া আছে, পুকুরের পাড়ের ছোট্ট একটা কুঁড়েঘর হইতে হাশুমুখী মঞ্জু বাহির হইয়া আসিল, অথচ দুজনেই দুজনকে জানে ও চিনিতে পারিয়াছে। মঞ্জু যেন ছলেবাড়ির মেয়ে, ব্রাহ্মণের মেয়ে নয়, দুজনে অবাধ অসঙ্কেতে পুকুরপাড়ে বসিয়া জলে টিল ফেলিতেছে ও অনর্গল বকিয়া যাইতেছে—মঞ্জু জজের মেয়ে নয়, তাহার সঙ্গে মেশায় কোনো বাধা নাই যেন।

স্বপ্নের মধ্যেই নিধুর মন আনন্দে ভরিয়া উঠিয়াছে যখন, ঠিক সেই সময় শাঁখের আওয়াজে তাহার ঘুম ভাঙ্গিয়া গেল। বিছানার উপর উঠিয়া বসিয়া চোখ মুছিতে মুছিতে সে বাইরের রোয়াকে কালীকে দেখিয়া বলিল—
কি রে কালী, শাঁখ বাজে কোথায়?

—পুকুরঘাটে। আজ যে ওদের ঠাকুর-পুজোর ঘট পাতা হচ্ছে—মা গেল—

—কাদের ঘট পাতা হচ্ছে?

—জজবাবুদের বাড়ির দুর্গাপুজোর ঘট আজ পাততে হবে না? এয়োদ্বী মেয়ে চাই, তাই মা গিয়েচে অনেকক্ষণ—

—আর কে কে এসেচে?

—কাকীমা তো আছেন, ওপাড়া থেকে হৈম-দিদি এসেচে—

পুকুরঘাট হইতে শাঁখের আওয়াজ যখন আবার পথের দিকে আসিল, তখন
১৪২

নিধু কিসের টানে উঠিয়া জানালা দিয়া চাহিয়া দেখিল আগে আগে মঞ্জুর মা, তাহার পেছনে মঞ্জু, তাহার মা, হৈম, ভুবন গাঙ্গুলির স্ত্রী আরও পাড়ার ছ-চারজন ঝি-বৌ জল লইয়া ফিরিতেছে। মঞ্জুর পরনে লালপাড় শাদা শাড়ি, অনাড়ম্বর সাজগোজ—এতগুলি মেয়ের মধ্যে তাহার দিকে চোখ পড়ে আগে, কি চমৎকার গতিভঙ্গি, কি সুন্দর মুখশ্রী, সারাদেহের কি অনবগত লাবণ্য—

নিধুর মনটা হঠাৎ বড় থারাপ হইয়া গেল।

নিজেকে সে বুঝাইবার চেষ্টা করিল।

কেন এমন হয়? কোনোদিন কি সে ভাবিয়াছিল মুন্সেফবাবু তাহার সঙ্গে মেয়ের বিবাহ দিবেন? তাহার মতো জুনিয়ার মোক্তারের সঙ্গে? গ্রামের মধ্যে যাহারা সব চেয়ে দরিদ্র, যাহার বাবা সর্বদা মুন্সেফবাবুদের বৈঠকখানায় বসিয়া তোষামোদ বর্ষণ করিয়া বড়লোকের মন রাখিতে চেষ্টা করেন—যাহার মা জজগিন্নি বলিতে ভয়ে সঃঃঃঃ এতটুকু হইয়া যায়—মুখ তুলিয়া সমানে সমানে কথা বলিতে ভরসা পায় না—এই বাড়ি, এই ঘর চোখে দেখিয়াও উহারা সে বাড়ির ছেলের সঙ্গে অমন সুন্দরী, শিক্ষিতা মেয়ের বিবাহ দিবে—এ কি কখনো সে ভাবিয়াছিল?

যদি এ আশা সে না করিয়া থাকে, তবে আজ তাহার দুঃখ পাইবার কি কারণ আছে?

মঞ্জু হুদিনের জন্তে এ গ্রামে আসিয়াছে—বড়লোক পিতার খেয়াল এবার গ্রামে তিনি পূজা করিবেন, খেয়াল মিটিয়া গেলে হয়তো আর দশ বৎসর তিনি এদিক মাড়াইবেন না—ততদিনে মঞ্জু কোথায়? তাহার বিবাহ হইয়া ছেলেপুলে বড় হইয়া স্কুলে পড়িবে—মিথ্যা আশায় কুহক।

সে উঠিয়া হাতমুখ ধুইয়া কালীকে বলিল—কালী, একটু তেল দে, নেড়ে আগি পুকুর থেকে—

—এত সকালে দাদা ?

—তা হোক—দে তুই—

এমন সময় নিধুর মা বাড়ি ঢুকিয়া বলিলেন—নিধু, ওদের বাড়ি যা—তুজন ব্রাহ্মণকে জল খাইয়ে দিতে হয় দুর্গাপুজোর পিঁড়ি পাতবার পরে। জজগিনি তোকে এখনি যেতে বলে দিলেন।

নিধু স্নান সারিয়া আসিয়া ওবাড়ি গেল। মঞ্জুও ইতিমধ্যে স্নান সারিয়া খাবার সাজাইয়া বসিয়া আছে—একজন ব্রাহ্মণ সে, অপরা জন ভুবন গাঙ্গুলি।

ভুবন গাঙ্গুলি বলিলেন—এস বাবা, তোমার জন্তে বসে আছি—এঁরা ব্রাহ্মণকে না খাইয়ে কেউ জল খাবেন না কিনা ?

—কাকা বেশ ভালো আছেন ? হৈম এসেচে দেখলাম না ?

—হৈম তো এ বাড়িতেই আছে, বোধ হয়—

মঞ্জু বলিল—হৈমদি তো রান্নাঘরে, ডাকব নাকি ? কাকাবাবুকে বলছিলাম হৈমদি আমাদের থিয়েটারে পার্ট করবে—

ভুবন গাঙ্গুলি ঘাড় নাড়িয়া বলিলেন—করবে না কেন ? আমি তো বলেচি। লালবিহারীদাদার বাড়িতে মেয়েদের সঙ্গে থিয়েটার করবে, এ তো ওঁর ভাগ্যি। আমার কোনো আপত্তি নেই—ও হৈম, হৈম—

হৈম আসিয়া দোরের কাছে দাঁড়াইল। কুড়ি-একুশ বছর বয়েস, রঙ তত ফর্সা না হইলেও দেহের গড়ন ও মুখশ্রী ভালো। সে যে বেশ সচ্ছল ঘরে পড়িয়াছে—তাহার সিন্ধের শাড়ি, দুহাতে মোটা সোণার বালা ও বাহুতে আড়াই পৈচের তাগা দেখিলে তাহা বোকা যায়—এ ছাড়া আছে কানে ইয়ারিং, গলায় মোটা সিকলি হার।

নিধু বলিল—চিনতে পার হৈম ?

হৈম হাসিয়া বলিল—কেন পারব না ? এ গাঁয়ের মেয়ে নই ?

—কবে এলে?

—মাসখানেক হল এসেছি। তুমি ভালো আছ নিধুদা?

—হ্যাঁ, এক রকম মন্দ নয়।

মঞ্জু বলিল—আমি হৈমদিকে বলেছি আমাদের সঙ্গে থিয়েটার করতে।

হৈম হাসিয়া বলিল—তা করব না কেন? বাবা তো বলেছেনই। নিধুদা, বই ঠিক করেচ?

—সে করবে মঞ্জু।

মঞ্জু তাতাতাড়ি বলিল—আমি পারব না নিধুদা, আপনি ঠিক করে দিন না। রবি ঠাকুরের ‘ফাক্তনৌ’র কথা বড়দা বলেছিলেন—

হৈম দেখা গেল ‘ফাক্তনৌ’র নামও শোনে নাই, সে বলিল—সে কি ভালো বই?

—সে খুব ভালো বই। এবার কলকাতায় হৈ হৈ করে প্রে হয়ে গিয়েচে।

—তা তোমরা যেমন বল। নিধুদা আমাদের শিখিয়ে দেবেন—

—আমি আর ক’দিন আছি? কাল তো সকালেই—

—দুদিন কেন ছুটি নাও না?

মঞ্জুও সঙ্গে সঙ্গে বলিয়া উঠিল—তাই কেন করুন না নিধুদা?

—সে কি করে হয়? তোমরা বোঝ না। এ কি কারো চাকুরি যে ছুটি নিতে হবে? না গেলে আমারই লোকসান—

হৈম বলিল—তাহলে আজ ওবেলা বইটা দেখিয়ে একটু পড়ে দিয়ে যাও—

—মঞ্জু তো রয়েছে। ও সব পারে। ওর ‘কচ ও দেবযানী’ সেদিন শোনোনি হৈম, সে একটা শোনবার জিনিস!

মঞ্জু সলজ্জ স্বরে বলিল—ছাই! নিধুদার যেমন কথা! না ভাই হৈমদি—

ভুবন গাঙ্গুলি জলযোগান্তে উঠিয়া বিদায় লইলেন। হৈম বলিল—বাবা,

তুমি যাও—আমি এর পরে যাব। নিধুদা না হয় দিয়ে আসবে এখন।

মঞ্জু বলিল—হৈমদি, আমার ভাইয়েরা আর নিধুদা কিন্তু পাট নেবে—
হৈম চিন্তিত মুখে বলিল—তাই তো ভাই, এ ঙুনলে আমায় কি বাড়িতে
প্নে করতে দেবে ভাই ?

—কেন দেবে না ?

—পাড়াগাঁয়ের গতিক তো জানো না—কে কি বলবে সেই ভয়ে বাড়ির
লোক যদি আপত্তি করে তাই ভাবচি ।

নিধু বলিল—তাতে কি ? আমি না হয় নাই করলাম—

মঞ্জু বলিল—তবে হবে কি করে ? পুরুষমানুষের পাট মেয়েরা করতে
গেলে অত মেয়ে কোথায় পাব এখানে ?

—কেন, তোমাদের বাড়িতে তো অনেকে আসবেন পূজোর সময়—

—তাদের সকলকে দিয়ে এ কাজ হবে না—হু—একজনকে দিয়ে হতে
পারে । তাছাড়া রিহার্সাল দেওয়া না থাকলে তারা প্নে করে কি করে ?
এ তো ছেলেখেলা নয় ! তুমি ভাই হৈমদি, বাড়িতে বলে এস ওবেলা—
জিগগেস করে দেখ—

হৈম বলিল—এতে আমার ওপর যেন রাগ কোরো না নিধুদা, হয়তো
ভাববে—

—আমি কিছু ভাবব না হৈম—মঞ্জু শহরে থাকে, ও পাড়াগাঁয়ের অনেক
খবরই রাখে না—ওকে বরং বল—

মঞ্জু বলিল—চা হয়ে গিয়েচে—বস হৈমদি—নিয়ে আসি—

মঞ্জুর কথা শেষ হইতেই মঞ্জুর বিধবা খুড়ীমা ট্রে'র উপর চায়ের পেয়ালা
সাজাইয়া লইয়া ঘরে ঢুকিয়া বলিলেন—এই নে চা, ওদের দে—মঞ্জু—

—তিন পেয়ালা কেন কাকীমা, নিধুদা তো চা খায় না—

—নিধু তুমি চা খাওনা ? আমি তা জানিনে বাবা—গরম দুধ খাবে ?
এখন দুধ দিয়ে গেল—

—না কাকীরা—দুধ চুমুক দিয়ে খাব ছেলেমানুষ নাকি ? আমার দরকার নেই—বাস্ত হবেন না মিছিমিছি—

নূপেন আসিয়া বলিল—বাবা একবার নিধুদাকে বাইরে ডাকচেন দিদি—
বাহিরের বৈঠকখানায় লালবিহারীবাবু ও ভুবন গাঙ্গুলি বসিয়া।
লালবিহারীবাবু প্রকাণ্ড গড়গড়াতে তামাক টানিয়া বৈঠকখানা প্রায়
অন্ধকার করিয়া ফেলিয়াছেন। তিনি স্নানতন-পছী লোক—বাড়িতে ন’হাত
কাপড় পরিয়া থাকেন—গায়ে সব সময় জামা বা ফতুয়া থাকেও না।
কোনে প্রকার বড়লোকী চালচলন বা সাহেবিয়ানা এ গ্রামের লোক
দেখে নাই তাঁহাব। সাধারণ লোকের সঙ্গে গ্রামের পাঁচজনের মতোই
মেশেন।

নিধু বলিল—আমায় ডাকচেন কাকাবাবু ?

—ই্যা হে, সুনীল কি সামনের শনিবারে আসবে না ?

—আজ্ঞে না—চিঠি লিখেচেন তে, সেই বলেই বোধহয়—পরের শনিবারে
আসবার চেষ্টা করবেন—

—তুমি কি কাল যাচ্চ ?

—আজ্ঞে ই্যা—

—তাহলে একবার বিশেষ করে অনুরোধ করো ওকে ওখানে
আসবার জন্তে—

—নিশ্চয়ই বলব—

—তুমি সুনীলের সঙ্গে মেশো তো ?

—আজ্ঞে মিশি—তবে আমরা ইলাম জুনিয়ার মোক্তার—আর তিনি হলেন
আমাদের হাকিম—বুঝতেই তো পারেন—

—একথানা চিঠি দেব নিয়ে গিয়ে ওর হাতে দিও—

—আজ্ঞে নিশ্চয়ই দেব—

নিধু পুনরায় বাড়ির মধ্যে ফিরিয়া দেখিল হৈম ওরফে হেমপ্রভা দালানে বসিয়া নাই। মঞ্জু একা বসিয়া অনেকগুলো শিশিবোতল জড়ো করিয়া কি করিতেছে। মুখ তুলিয়া বলিল—আহ্নন নিধুদা, হৈমদি ওপরে গিয়েচে কাকীমার সঙ্গে কথা বলতে—বহ্নন—

—ওসব কি ?

—মা'র কাণ্ড। আসবার সময় আচার এনেছিলেন, আম, জেলি—বর্ষায় সব নষ্ট হয়ে গিয়েচে—হু—একটা যা ভালো আছে দেখে দেখে তুলচি—বাকি ফেলে দিতে হবে—খাবেন নিধুদা ? এই একরকম জিনিস আছে মাজাজি জিনিস—একে বলে ম্যাক্সো পার্ল—চিনির মতো দেখতে। একটু খেয়ে দেখুন, ল্যাংড়া আমের গন্ধ—আম খাচ্চি মনে হবে—

নিধু একটু চিনির মতো গুঁড়া হাতে লইয়া মুখে ফেলিয়া বলিল—বাঃ, সত্যিই তো আমের গন্ধ ! আমরা পাড়াগাঁয়ের লোক, এসব কোথায় পাব বল। মঞ্জুর বড় বড় চোখে যেন বেদনার ছায়া পড়িল—সে নিধুর দিকে চাহিয়া বলিল—ওসব বলতে আছে—ছিঃ—কষ্ট হয় না ?

মঞ্জুর স্বর হঠাৎ এমন ঘনিষ্ঠ আত্মীয়তায় মাখানো, এমন স্নেহপূর্ণ মনে হইল নিধুর—যে তাহার বুকের ভিতরটা যেন কেমন করিয়া উঠিল। নিজের অজান্তসারেই তাহার মুখ দিয়া বাহির হইয়া গেল যে কথা—তাহার জ্ঞান সে সারাদিন অহুতাপ করিয়াছিল মনে মনে। দোষও নাই—নিধু তরুণ যুবক, এই তাহার জীবনের অনাত্মীয়া প্রথম নারী, যে তাহাকে স্নেহের ও প্রীতির চোখে দেখিয়াছে। জীবনের এক সম্পূর্ণ নূতন অভিজ্ঞতা তাহার। নিধু বলিয়া ফেলিল—আর আমার কষ্ট হয় না মঞ্জু ? তোমার জ্ঞান আমার মন কঁাদে না বুঝি ?

মঞ্জু পাথরের মূর্তির মতো অবাক ও নিশ্চেষ্ট ভাবে নিধুর দিকে চাহিয়া বসিয়া রহিল। নিধু আবার বলিল—আমি এখন হু-শনিবার আসব না—

—কেন নিধুদা ?

—সামনের শনিবারে ডিস্ট্রিক্ট ম্যাজিস্ট্রেট আসবেন—তার পরের শনিবারে তোমাদের এখানে সুনীলবাবু আসবেন—এই মাত্র কাকাবাবু ডেকে বললেন—

—কি বললেন ?

—সেই শনিবারে আসবার জগ্গে বললেন—আমি আর কক্ষনো আসব না মঞ্জু। আমার বুঝি মন বলে জিনিস নেই, না ? আমি আসতে পারব না—তুমি কিছু মনে কোরো না।

মঞ্জু অপলক দৃষ্টিতে কিছুক্ষণ নিধুর মুখে চাহিয়া থাকিয়া অগৃদিকে মুখ ফিরাইল। তাহার পদ্যের পাপড়ির মতো ডাগর চোখ দুটি বাহিয়া জল গড়াইয়া পড়িল। নিধুর কথায় সে কোনো জবাব দিল না—হঠাৎ যেন সব কাজে সে উৎসাহ হারাইয়া ফেলিল—জ্যাম জেলির শিশিবোতল অগোছালো ভাবে ইতস্তত পড়িয়াই রহিল—তাহার মধ্যে ভরসাহারা ক্ষুদ্র বালিকার মতো মঞ্জু বসিয়া চোখের জল ফেলিতেছে—এ ছবিটা চিরকাল নিধুর মনে গাঁথিয়া গিয়াছিল।

নিধু বলিল—ওঠ মঞ্জু, আমার ভুল হয়ে গিয়েচে—আর কিছু বলব না।

মঞ্জু জলভরা চোখে তাহার দিকে চাহিয়া বলিল—আসবেন তো ওবেলা—এখানে কিষ্ট থাকেন।

—খাওয়ানোর লোভে তোমার নিধুদা ভুলবে ভেবেচ তুমি ? অমন লোক পাওনি—

আমি কি তাই ভাবচি ? গায়ে পড়ে ঝগড়া বাধান আপনি—

—আমি এখন আসি, ওবেলা আবার আসব—

—না বহন, এখনি গিয়ে কি করবেন ? আপনাদের বন্ধ হবে কবে ?

—এখনো চোদ্দ-দিন বাকি, মহালয়ার দিন থেকে বন্ধ হবে শুনচি—

—কোর্ট বন্ধ হলে এখানে চলে আসবেন তো ?

—ঐ যে বললাম, নয় তো আর যাব কোথায় ! বড়লোক নই যে হিল্লি-দিল্লি মকা যাব। এই বাশবনেই কাটল চিরকাল, এই বাশবনেই আসতে হবে।

—এক কালে বড়লোক হবেন তো, তখন কোথায় যাবেন ?

—আমি হব বড়লোক ! তবেই হয়েছে ! তুমি হাসালে দেখচি মজ্জ !

মজ্জ গম্ভীর ভাবে বলিল—কে বলেচে আপনি বড়লোক হবেন না ? আমি বলচি দেখবেন আপনি খু—উ—ব বড়লোক হবেন।

—তোমার মুখে ফুলচন্দন পড়ুক মজ্জ—

—তা যদি হয়, আজকের দিনের কথা আপনার মনে থাকবে ? দাঁড়ান আজ কি তারিখ, ক্যালেন্ডারটা দেখে আসি ওঘর থেকে—

কথা শেষ করিয়াই মজ্জ লঘুগতি হরিণীর মতো ত্রস্তভঙ্গিতে ছুটিয়া গেল পাশের ঘরে—এবং তখনি হাসিমুখে ফিরিয়া আসিয়া বলিল—আপনার ভায়েরী^১ আছে ? লিখে রাখবেন গিয়ে সতেরোই সেপ্টেম্বর—আমি বলেছিলুম আপনি বড়লোক হবেন—আমি, মঞ্জরী দেবী—

নিধু হাসিতে হাসিতে বলিল—বয়েস যোলো, সাকিন কুড়ুলগাছি মহকুমা রামনগর—থানা—ওই—পিতার নাম শ্রীযুক্ত বাবু লালবিহারী—

মজ্জ খিল খিল করিয়া হাসিতে হাসিতে বলিল—থাক, থাক—ওকি কাণ্ড ! বাবারে, আপনি এতও জানেন ! আমি ভাবি নিধুদা বড় ভালোমানুষ, নিধুদা আমাদের মোটে কথা বলতে জানে না। নিধুদা দেখচি কথার ঝুড়ি।

—কথার ঝুড়ি না হলে কি মোক্তার হয় মজ্জ ? তবে আর ব্যবসাতে উন্নতি করব কি করে, বড়লোকই বা হব কি করে বল !

—আচ্ছা, যদি বড়লোক হন, আমার কথা মনে থাকবে ?

হঠাৎ তাহার মুখ হইতে তরল কোতুকের হাসি অপসৃত হইল—চোখের

কোণে বেদনার ছায়াপাতে মুখখানি অপরূপ ব্যাথাভরা লাবণ্যে ও শ্রীতে
মণ্ডিত হইয়া উঠিল—এক মুহূর্তে যেন মনে হইল এ মঞ্জু ষোড়শী বালিকা
নয়, বহুযুগের প্রৌঢ়া জ্ঞানময়ী, বহু অভিজ্ঞতা ও বহু ক্ষয়ক্ষতি ঘারা লক্ষশক্তি
পুরাতনী নারী—বালিকা হইয়া আজ আসিয়াছে যে, সে ইহার নিতান্তই
লীলা—আরও কতবার এভাবে আসিয়াছে।

নিধু মুগ্ধ হইয়া গেল, তাহার বুকের মধ্যে যেন কেমন করিয়া উঠিল। মঞ্জুকে
সে আর খোঁচা দিয়া কথা বলিবে না, বালিকার মনে কেন সে মিছামিছি
কষ্ট দিতে গিয়াছিল? মঞ্জু চপলা বটে, কিন্তু সে গভীর, সে ধীর বুদ্ধিমতী,
অতলস্পর্শ তাহার মনের রহস্য। এতদিন সে মঞ্জুকে ঠিক চিনিতে পারে নাই।
নিধু কোনো কথা বলিতে পারিল না, কথার সে উত্তর দিতে পারিল না।
জীবনে এমন সময় আসে, এমন মুহূর্তের সন্ধান মেলে—যখন কথা মুখ দিয়া
বাহির হইলেই মনে হয় এই অপরূপ মুহূর্তটির জাহ্নু কাটিয়া যাইবে, ইহার
পবিত্রতার ব্যাঘাত ঘটিবে। তাহা বুকের মধ্যে কিসের ঢেউ যেন উপরের
দিকে ধাক্কা দিতেছিল—সেটাকে আর একটু প্রশ্রয় দিলেই সেটা
কাম্মারূপে চোখ দিয়া গড়াইয়া সব ভাগাইয়া ছুটিবে।

কিছুক্ষণ দুজনেই চূপচাপ—নিস্তব্ধতা যে একটা মনোরম মায়া সৃষ্টি
করিয়াছে এই ঘরের মধ্যে—তা যত কম সময়ের জন্তেই হোক না কেন
কেহ চাহে না যে আগে কথা বলিয়া রুঢ় আঘাতে তাহা ভাঙিয়া দেয়।

এমন সময় হঠাৎ ঘরে ঢুকিলেন নিধুর মা।

—হ্যাঁরে, ও নিধু—এখানে বসে? মঞ্জু মা কি করচ শিশি—বোতল নিয়ে?
ওগুলো কি মা?

—আহ্নন, আহ্নন, জ্যাঠাইমা—সকালে যে!

—তোমাদের পুজোর পাটাপাতা দেখতে এলাম—তা এত সকালে পাটা
পাতলে যে তোমরা! এখনো তো পুজোর সতেরো দিন বাকি—

—তা তো জানিনে জ্যাঠাইমা, পুরুতমশায় কাল নাকি ক্লাকাকে বলে গিয়েচেন—

—দিদি কোথায় দেখচিনে যে ?

—মা ? ওপরের ঘরে পুজো করচেন বোধ হয়—ডাকব ?

—না, না, মা পুজো করচেন, ডাকতে হবে কেন—থাক। আমি এমনি দেখতে এলাম—

—জ্যাঠাইমা, একটু চা খাবেন না ?

—না মা, আমি এখনো নাইনি-ধুইনি—বেলা হয়ে গেল। এইবার নাইতে যাব গিয়ে। নিধু থাকবি নাকি না আসবি ?

মঞ্জু হাসিয়া বলিল—জ্যাঠাইমা, নিধুনা যেন তোমার ছোট্ট খোকাটি, ওকে কোথাও ছেড়ে দিয়ে ঠাণ্ডা থাকতে পারেন না, বাইরে কোথাও দেখলে সন্দেহ করে বাড়ি নিয়ে যেতে হবে ! নিধু সলজ্জমুখে বলিল—তুমি যাও মা, আমি যাব এখন। নিধুর মা কিন্তু তখনি চলিয়া গেলেন না, তিনি আরও আগাইয়া আসিয়া বলিলেন—ওগুলো কিসের শিশি-বোতল মা ? খালি আছে ?

—এগুলো জ্যাম-জেলি—ইয়ে—আচারের-মোরকার শিশি—জ্যাঠাইমা, বর্ষায় খারাপ হয়ে গিয়েছিল তাই বেছে রাখছিলাম—

—আমি ভাবলাম বুঝি খালি আছে।

—কি হবে খালি শিশি ? দরকার জ্যাঠাইমা ?

—এই জিনিসটা পত্তরটা রাখতে—এসব জায়গায় তো পাওয়া যায় না—বেশ শিশিগুলো—

নিধু সঙ্কোচে এতটুকু হইয়া গেল। সে বুঝিল রঙচঙালা শিশিগুলি দেখিয়া মা'র লোভ হইয়াছে—মেয়েমানুষের কাণ্ড ! তা দরকার থাকে, এখানে চাহিবার দরকার কি ? মাকে লইয়া আর পারা যায় না ! ঘটে যদি কিছু বুদ্ধি থাকে এদের !

মঞ্জু সসবাস্ত হইয়া বলিল—হ্যাঁ, হ্যাঁ, জ্যাঠাইমা—শিশির দরকার ? আমি ভালো শিশি এনে দিচ্ছি । বিলিতি জেলির খালি বোতল আছে মা'র ঘরে দোতলায় । আমি আসচি এখুনি—বসুন জ্যাঠাইমা । মঞ্জু ঘর হইতে ত্রুপদে বাহির হইয়া গেল এবং কিছুক্ষণ পরেই দুটি স্ফুট লেবেলমারা খালি বোতল আনিয়া নিধুর মা'র হাতে দিয়া বলিল—এতে হবে জ্যাঠাইমা ?

নিধুর মা বোতল দুটি হাতে পাইয়া যেন স্বর্গ পাইলেন এমন ভাব দেখাইয়া বলিলেন—খুব হবে মা, খুব হবে । আশীর্বাদ করি বেঁচে-বর্তে থাক—রাজরাণী হও মা—আমি আসি তাহলে এবেলা—

নিধুও মায়ের পিছু পিছু বাড়ি আসিল । বাড়িতে পা দিয়াই সে একেবারে অগ্নিমূর্তি হইয়া মাকে বলিল—আচ্ছা, মা, তোমার কি একটা কাণ্ডজ্ঞান নেই ? কি বলে ছটো খালি বোতল ভিক্ষে করতে গেলে ও-বাড়ি থেকে ? তোমার এই মাগুনতুড়ে স্বভাবের জগ্রে আমার মাথা হেঁট হয় তোমার সে জ্ঞান আছে ? ছিঃ ছিঃ—এতটুকু ক কাণ্ডজ্ঞান ভগবান দেননি ?

নিধুর মা বৃষ্টিতে না পারিয়া বিস্ময়ের সুরে বলিলেন—ওমা, তা তুই আবার বকিস কেন ? কি করেচি আমি !

—ভৈরব মুণ্ড করেচ, নেও—এখন শিশিবোতল সাজিয়ে রেখে ঘরে ধুনো দেও । ওতে তোমার কি মালমসলা, অপরূপ সম্পত্তি থাকবে শুনি ?

—তুই তার কিছু বুঝবি ? লবঙ্গ, ধনের চাল, হল গিয়ে গোটার গুঁড়ো কত কি রাখা যায় ! কেমন চমৎকার বোতল দুটো ! এখানে কোথায় পাবি ওরকম ?

নিধু আর কিছু বলিল না । মাকে বুঝাইয়া পারা যাইবে না—নিভাস্ত সরলা, নিধুর লজ্জা যে কোথায়—তাহা তিনি বুঝিবেন না ।

জগোঠাকরুণ পুকুরঘাটে নিধুর মাকে বলিলেন—বলি বড় বাড়ির পুছোর কতদূর, ও নিধুর মা ?

—পিরতিমে গড়ানো হচ্ছে—আজ পাটা পাতা হল ওবেলা—

—পাটা এখন আবার কে পাতে ? বিধেন দিলে কে গা ?

—কি জানি—তবে মঞ্জু বলছিল ওদের ভটচাক্সি দিয়েচেন। আমিও ওকথা বলেছিলাম ওবেলা।

—হ্যাঁগা নিধুর মা, একটা কথা শুনলাম, কি সত্যি ? নাকি মেয়ে-পুরুষে মিলে থিয়েটার করবে ? ওদের বাড়ির মেয়েরা আর ওই ভুবন গাঙ্গুলির মেয়ে হৈম, তোমাদের নিধু—আরও নাকি কে কে ?

—তাতে দিদি বলতে পারলাম না—আমি কিছু শুনিনি—

বাস্তবিকই নিধুর মা একথার কিছুই জানিতেন না।

জগোঠাকরণ বলিতে লাগিলেন—আর কি সেদিন আছে গাঁয়ের ! ছোট-ঠাকুরের প্রতাপে এক সময়ে এ গাঁয়ে যা খুশি করে পার পাবার উপায় ছিল না। তা সবাই গেল মরে হেজে—এখন টাকা যার, সমাজ তার। নইলে এ সব থিরিস্টানি কাণ্ড কি হতে পারত কখনো এখানে ? আমি ভুবনকে আচ্ছা করে শুনিয়ে দিইচি ওবেলা। বললাম—মেয়েকে যে থিয়েটার করতে দিচ্চ, ওরা না হয় জজ-মেজেষ্টার লোক, টাকার জোরে তরে যাবে—তোমার মেয়ের কুচ্ছে। রটলে যদি শশুরবাড়ি থেকে না নেয় ?

—ভুবন ঠাকুরপোকে বললেন ?

—কেন বলব না শুনি ? জগোঠাকরণ—কারো এক চালে বাসও করে না, কাউকে কুকুরের মতো খোসামোদও করে বেড়ায় না—কারো কাছে কোনো পিতোশ রাখিনে কোনোদিন—

শেষের কথাটা নিধুর মাকে লক্ষ্য করিয়াই বোধ হয় বলা—কিন্তু নিধুর মা তাহা বুঝিতে পারিলেন না—খুব সূক্ষ্ম উক্তি বা একটু বাকা ধরনের কথাবার্তা হইলে নিধুর মা তাহা আর বুঝিতে পারেন না।

কথাটা তিনি নিধুকে আসিয়া বলিলেন। নিধু বৈকালের দিকে মঞ্জুদের

বাড়ি গেল মঞ্জুর বাবাকে দেখিতে—কারণ তাঁহার রক্তের চাপ হঠাৎ বৃদ্ধি হওয়ায় দুপুরের পর হইতেই তিনি অসুস্থ হইয়া পড়িয়াছেন—সেখানে গিয়া দেখিল মঞ্জু বাবার ঘরের বাহিরে দোতলার বারান্দাতে বসিয়া সেলাই করিতেছে। নিধুকে দেখিয়া বলিল—আস্তে আস্তে নিধুদা, বাবা এবার একটু ঘুমিয়েচেন। চলুন আমরা নিচে যাই বরং—

—একবার গুঁকে দেখে যাব না ?

—এখন থাক। ঘুম যদি সন্দের আগে ভাঙে, তবে দেখতে আসবেন এখন। সিঁড়িতে নামিবার সময় নিধু মাঘের কাছে যাহা গুঁনিয়াছিল, সব বলিল। মঞ্জু শুনিয়া বিশেষ আশ্চর্য হইল না, বলিল—হৈমদি নিজেই একথা তো ওবেলা বলে গেল। আমরা যদি পুরুষ না নিই—তবুও তাঁরা বাড়িতে করতে দেবে না ?

—তাও বলতে পারিনে—আপত্তি যদি করে তাতেও করতে পারে—
বলিতে বলিতে হৈমের গলা শোন। গেল, বাহির হইতে ডাকিতেছে—ও মঞ্জু, ও নূপেন—

মঞ্জু ছুটিয়া আগাইয়া লইয়া আসিতে গেল। এবেলাও হৈম খুব সাজগোজ করিয়া মুখে ঘন করিয়া পাউডার মাখিয়া, চুলে ফ্যান্সি খোঁপা বাঁধিয়া ও ফুল গুঁজিয়া আসিয়াছে। বাড়ি ঢুকিয়াই সে বলিল—নিধুদা আসেনি ?

—এসে বসে আছেন। এস দালানে হৈমদি—

—আজ অনেকক্ষণ পর্দা রিহার্স্যাল দিতে হবে কিন্তু—

শোনেননি হৈমদি, বাবার বড় অসুখ যে—

হৈম বিশ্বয়ের স্বরে বলিল—জ্যাঠামশায়ের অসুখ ? কি অসুখ ?

—ব্রাদ প্রেসার বেড়েচে—ওই নিঘেই তো ভুগছেন। তাই আজ আর রিহার্স্যাল হবে না।

—না তা আর কি করে হয় ! এখন কেমন আছেন উনি ?

—এখন একটু ভালো। এসব কলকাতার রোগ হৈমদি, পাড়ারগায়ে এসব নেই বলে মনে হয় আমার।

হৈম একটু পরেই বলিল—তাহলে আজ যাই মঞ্জু ভাই—আমি—
হঠাৎ মঞ্জুর মনে পড়িয়া গেল কথাটা। বলিল—হৈমদি, তোমার বাবা কিছু বলেছেন নাকি তোমায় এবিষয়ে?

—কি বিষয়ে?

—এই থিয়েটার করা নিয়ে।

—তা তিনি বলতে পারেন না। আমার স্বশ্রববাড়ি থেকে আপত্তি না করলেই হল। আমি ওসব মানিনে—

—সে কথা নয় হৈমদি—গায়ের কে এক বুড়ি (নিধু নাম বলিয়া দিল)—
হ্যাঁ সেই জগোঠাকরুণ আপনার বাবাকে কি সব বলেছেন। পুরুষের সঙ্গে
মিশে থিয়েটার করলে বা এমনিই থিয়েটার করলে তোমার মেয়ের বদনাম
রটবে। হৈম তাক্ষিল্যের সুরে বলিল—ওঃ, এই কথা। ও আমি গ্রাহি
করিনে। আমি যা খুশি করব—তাতে বাবা পর্যন্ত কিছু বললে শুনচিনে
তো জগোঠাকরুণ! আচ্ছা এখন তাহলে আসি—

—বারে, চা খেয়ে যান হৈমদি—

—না ভাই, আর একদিন এসে খাব। নিধুদা, আমায় একটু এগিয়ে
দাও না?

নিধু মঞ্জুকে বলিল—বস মঞ্জু, আমি ওই তেঁতুল-তলার মোড় পর্যন্ত
হৈমকে এগিয়ে দিয়ে আসচি—

পথে পড়িয়া হৈম বলিল—তুমি থিয়েটার করবে তো নিধুদা?

—আমার আর করা হয় হৈম? গায়ের মধ্যে যদি কথা গুঠে এ নিয়ে—

—ওঃ, ভারি কথা! তুমি না করলে আমিও করব না নিধুদা, তুমি আছ
তাই করচি।

নিধু আশ্চর্য হইয়া হৈমর মুখের দিকে চাহিল। হৈম বলে কি !

হৈম পুনরায় বলিল—আমার কথা মনে হয় নিধুনা ? বল না নিধুনা—

নিধু একটু বিব্রত হইয়া পড়িল। হৈমর এ সব কথায় সে কি উত্তর দিবে ? হৈম একটু গায়ে-পড়া ধরনের মেয়ে তাহা সে পূর্বেই জানিত। ভাবিয়াছিল, আজকাল বিবাহ হইয়া ও বয়স হইয়া বোধ হর সারিয়া গিয়াছে। এখন দেখা যাইতেছে তা নয়।

পরে মুখে বলিল—ই্যা—তা মনে হত না কি আর ? গাঁয়ের মেয়ে—ছোটবেলা থেকে দেখে আসচি—

—আজ সন্দেবেলা আমাদের বাড়ি এস না কেন নিধুনা—ওখানে চা খাবে—বেশ গল্প করা যাবে এখন—

—আমি চা তো খাইনে হৈম—তা ছাড়া সন্দেবেলা মঞ্জুরের বাড়ি থিয়েটার সপ্তকে হেতুনেস্ত একটা করে ফেলতে হবে, যাই কি করে ?

—কাল আসবে ? না—ও, কাল তো তুমি চলেই যাবে। কাল দিনটা নাই বা গেলে নিধুনা ?

কি বিপদ ! ইহার এত জোর আসিল কোথা হইতে ? নিধু বলিল—না গেলেন-চলে হৈম ? কত দরকারি কেস সব হাতে রয়েছে। যেতেই হবে।

হৈম অভিমানের স্বরে বলিল—আমার কথা রাখবে কেন ? মঞ্জুর কথা হত তো রাখতে—

—আচ্ছা, সামনের শনিবারে এসে তোমাদের ওখানে যাব, হৈম।

হৈম হাসিয়া নিধুর দিকে চাহিয়া বলিল—ঠিক যাবে তো ? তাহলে কথা রইল কিম্বা। এ গাঁয়ে এসে আমার মন মোটে টেকে না নিধুনা—মোটে মিশবার মানুষ নেই—আমি চিরকাল গোয়াড়ী স্বলে থেকে পড়েছি—জানো তো ? আমি গাঁয়ে এসে যেন হাঁপিয়ে উঠি—একটু আমোদ নেই, আহ্লাদ নেই—এমন একটা লোক নেই, যার সঙ্গে দুদণ্ড কথা বলে স্বখ

হয়। তবুও মঞ্জুরা এসেছিল, ওরা শহরের মেয়ে, আমোদ করতে জানে।
ওই বলচে থিয়েটার করবে—আমার ওতে ভারি উৎসাহ। সময়টা তো
বেশ কাটবে? তাই আমি—তুমি থাক—আমার বেশ ভালো লাগে—
হৈম নিধুর দিকে অপাঙ্গ দৃষ্টিতে চাহিয়া হাসিয়া ফেলিল। বলিল—দতি
কিন্তু আসবে সামনের শনিবারে নিধুদা, আমার মাথার দিবি—সেদিন
কিন্তু আমাদের বাড়িতে চা খাবে—

—চা আমি খাইনে হৈম—

—চা না খাও, খাবার খেও। আর আমরা গল্প করব, ঠিক রইল কিন্তু—
—থিয়েটার তাহলে তুমি করবে? কিন্তু জগোঠাকরণ কি বলেচে আজ
মা'র কাছে শুনেচ তো?

—বলুক গে। আমি ওসব মানিনে। আমার স্বশুরবাড়ি তেমন নয়—কেউ
কিছু বলবে না।

—সে তুমি বোঝ, আমার কানে কথাটা উঠেচে যখন তোমাদেব কাছে
বলা আমার উচিত। মঞ্জুদের কেউ কোনো দোষ ধরবে না, কেন না ওরা
হল বড়লোক—ওরা এখানে থাকবেও না। ওদের কে কি করবে?

—আমারও কেউ কিছু করতে পারবে না। জীবনে দুদিন আমোদ করব না,
আহ্লাদ করব না—মুখ বুজিয়ে বসে থাকব এই অজ পাড়াগাঁয়ের মধ্যে—
সে আমার দ্বারা হবে না।

—আচ্ছা, তুমি এস হৈম—

—কোথায় যাবে এখন? মঞ্জুদের বাড়ি?

—না বেলা হয়েছে—এখন বাড়ি যাব।

—ওবেলা যাবে ওখানে—তাহলে আমিও আসি।

নিধু মনে মনে বিরক্ত হইলেও বলিল—তার এখন কিছু ঠিক নেই—
আসতেও পারি। এখন বলতে পারিনে—

বৈকালের দিক্‌ক নিধু ভাবিল সে মঞ্জুদের বাড়ি যাইবে কিনা। মন সেখানে যাইবার জ্ঞানই উন্মুখ হইয়া আছে যেন। অথচ বেশ বোঝা যাইতেছে সেখানে আর তাহার যাওয়া উচিত নয়। বেলা পড়িয়া আসিল—তবুও নিধু ইতস্তত করিতে লাগিল—এবং তারপরই সে হঠাৎ কিসের টানে সব কিছু দ্বিধা ভুলিয়া কখন উহাদের বাড়ির দিকে রওনা হইল।

মঞ্জুদের বৈঠকখানার কাছে গিয়া মনে হইল—আজ মঞ্জু তাহাকে ডাকিয়া পাঠায় নাই তো! অথচ রোজই ডাকিয়া পাঠায়। মনের মধ্যে কোথা হইতে অভিমান আসিয়া জুটিল। নিধু আর মঞ্জুদের বাড়ি না ঢুকিয়া গ্রামের বাহিরে রাস্তার দিকে বেড়াইতে গেল।

পূজার আর বেশি দেরি নাই। আকাশে বাতাসে যেন আসন্ন শারদীয়া পূজার আভাস, আকাশ মেঘমুক্ত, সুনীল—পাকা রাস্তার ধারে ঝোপে-ঝাপে মটরলতায় থোকা-থোকা ফল ধরিয়াছে—আউস ধান কাটা হইয়া গিয়াছে—আমন ধানের নাবাল ক্ষেত ভিন্ন মাঠ প্রায় শূন্য। পনরোদিন রুষ্টি হয় নাই—গুট গরম, কোনোদিকে একটু হাওয়া নাই।

একটা স্নাকোর উপর বসিয়া নিধু ভাবিতে লাগিল—মঞ্জু আজ তাহাকে কেন ডাকিল না? ওবেলা তাহার কথাবার্তায় হয়তো মনে দুঃখ পাইয়াছে। শিশিবোতলের মাঝখানে উপবিষ্ট মঞ্জুর ভরসাহারা কক্ষণ মুখের ছবি মনে আসিল। মঞ্জুকে সে কোনো দুঃখ দিবে না। এ ব্যাপার লইয়া আর কোনো কথা সে মঞ্জুকে বলিবে না।

কিন্তু রবিবার তো ফুরাইয়া আসিল। সন্ধ্যার দেরি নাই। আর কতক্ষণ? সত্যি কি সে মঞ্জুদের বাড়ি দেখা করিতে যাইবে না? তাহা হয় না। এখন গেলে তবুও রাত ন’টা পর্যন্ত থাকিতে পারিবে। নয় তো আবার সাতদিন অদর্শন। থাকা অসম্ভব তাহদের পক্ষে।

নিজের বাড়ির সামনে আসিয়া নিধু ইতস্তত করিতেছে—এমন সময় সে

দেখিল মঞ্জু এবং তাহার পিসতুতো বৌদিদি ওদিকের পথ দিয়া আসিতেছে। নিধুকে দূর হইতে দেখিয়া মঞ্জু বলিল—ও নিধুদা, দাঁড়ান—নিধু বলিল—তোমরা কোথাও গিয়েছিলে নাকি, মঞ্জু ?

—আমি আর বৌদি হৈমদির বাড়ি, আর ওদের পাশে পরেশকাকাদের বাড়ি বেড়াতে গিয়েছিলাম যে। সেই কখন বেলা ছোটোর সময় গিয়েচি—আসব আসব করচি—কিন্তু হৈমদি'র মা চা খাবার না খাইয়ে ছাড়লেন না—তাই একেবাবে সন্দেহ হয়ে গেল।

—তা তো জানি নে—ও !

—আপনি গিয়েছিলেন আমাদের বাড়ি ?

—আমি একটু বেড়িয়ে ফিরচি—তোমাদের ওখানে যাওয়া হয়নি—

—আমিও ভাবচি নিধুদা এসে কি বসে আছে ? আরও তাড়াতাড়ি করচি। জিগেস করুন বৌদিকে—না বৌদি ?

মঞ্জুর বৌদিদি বলিলেন—হ্যাঁ, ও তো অনেকক্ষণ থেকে আসবার বোঁক করচে—তা একজনদের বাড়ি গেলে কি তক্ষুনি আসা ঘটে ? বিশেষ কখনো যখন যাইনে—

মঞ্জু বলিল—আমুন নিধুদা, চলুন আমাদের বাড়ি—

নিধুর অভিমান অনেক আগেই কাটিয়া গিয়াছিল। মঞ্জু যে আজ তাকে ডাকিয়া পাঠায় নাই, তাহার সম্পূর্ণ যুক্তিসঙ্গত কাবণ বিদ্যমান।

বাড়িতে পৌছিয়া মঞ্জু বলিল—কি খাবেন বলুন নিধুদা—

মঞ্জুকে আজ ভারি স্নানর দেখাইতেছে। নিজের বাড়িতে বসিয়া থাকে বলিয়া মঞ্জু কখনো সাজগোজ করে না—আজ পাড়ায় বেড়াইতে বাহির হইয়াছে বলিয়া সে চওড়া শাদা জরির পাড় বসানো চাঁপা রঙের ভালো সিঁকের শাড়ি ও ফিকে গোলাপী রঙের ব্লাউজ পরিয়াছে—কপালে টিপ, চমৎকার টিলে খোঁপা বাধিয়াছে—পায়ে মাদ্রাজি স্ত্রাওল—খুব সুদু

এসেলের সেরেভ তাহার চারিপাশের বাতাসে । মুখখীতে প্রগল্ভতা নাই—অথচ বুদ্ধি ও আনন্দের দীপ্ত সজীব ভঙ্গি তাহার মুখে, হাত-পা নাড়ার ভঙ্গিতে, কথা বলিবার ধরনে ।

নিধু আমতা-আমতা করিয়া বলিল—তা—যা খাওয়াবে—

—আপনার জন্তে কি খাবার করে রেখেছিলাম জানেন ? বলুন তো ?

নিধু বিস্মিত কণ্ঠে বলিল—আমার জন্তে ?

—হ্যাঁ, আপনার জন্তেই । নিমকি ভেজেছিলুম নিজের বসে, দুপুরের পর একঘণ্টা ধরে । বোদি বেলে দিলে, আমি ভাজলাম—গরম গরম দেব বলে আপনাকে ডাকতে পাঠাচ্ছি নূপেনকে—এমন সময়ে হৈমদি'র মা, হৈমদি সবাই এলেন গুঁদের বাড়ি নিয়ে যেতে—

—ও, গুঁরা এসেছিলেন বুঝি ?

—তবে আর বলচি কি ? এসে কিছুতেই ছাড়লেন না—যেতেই হবে । মা বললেন—তবে তুই যা, আমি নধুকে ডেকে খাওয়াব এখন । আমি বললাম—তা হবে না মা । আমি ফিরে এসে ডেকে পাঠাব ।

—এত কথা কিছুই জানিনে আমি ।

—কি করে জানবেন ? একবার ভাবলাম আপনাদের বাড়ি হয়ে যাই—কিন্তু গুঁরা সব ছিলেন—হৈমদি কিন্তু বলেছিল—

—কি বলেছিল হৈম ?

—হৈমদি বললে নিধুদাকে ডেকে নিয়ে গেলে হত । গুর মা বারণ করলেন ।

—হৈমর মা বারণ করে ঠিকই করেচেন । হৈম শহরে-বাজারে কাটিয়েচে, পাড়াগাঁয়ের ব্যাপার ও কিছু বোঝে না । মেয়েরা যাচ্ছে বেড়াতে, তার মধ্যে একজন পুরুষমাতুষ সঙ্গে যাওয়া—লোকে কি বলবে ?

মঞ্জুর উপর অভিমানের বিন্দুমাত্রও এখন আর নিধুর মনে নাই বরং মঞ্জুর স্নেহে ও প্রীতিতে অযথা সন্দেহ করার দরুন নিধু মনে মনে যথেষ্ট লজ্জিত

ও দুঃখিত হইল। মঞ্জু বলিল—বসুন, নিমকি নিয়ে আসি, গরম করে, ঠাণ্ডা হয়ে গেছে খেতে পারবেন না।

—শোনো শোনো, অত-শত করে কাজ নেই—যা আছে তাই ভালো।

মঞ্জু কিন্তু কিছুক্ষণ বিলম্ব করিয়াই গরম গরম নিমকি আনিয়া দিল নিধুকে।

বলিল—আমার ভারি মন খারাপ হয়ে গিয়েছিল নিধুদা, আপনাকে না খাওয়াতে পেরে। ভাবলাম সন্দেহ হয়ে গেল—আপনার সঙ্গে আর কখনি বা দেখা হবে! সকালে উঠে তো চলেই যাবেন—

নিধু হাসিয়া বলিল—সত্যি বলতে গেলে আমাব বাগ হয়েছিল তোমার ওপর—

—কেন, কি অপরাধ হল?

—রোজ বিকেলে ডাকতে পাঠাও আজ কেউ গেল না ডাকতে। আমি বড় বাস্তার দিকে বেড়াতে বার হলাম—

মঞ্জু ভ্রুকুঞ্চিত করিয়া বলিল—ওইখানে আপনাব দোষ। আমাদের পব ভাবেন কিনা তাই না ডাকলে আসেন না—

—সে জ্ঞান নয় মঞ্জু, তোমরা বড়লোক, যখন তখন ঢুকতে ভয় করে—

—ওই ধরনের কথা শুনলে আমার কষ্ট হয় বলেচি না?

—মঞ্জু, তুমি আমায় ক্ষমা কর। ওবেলা তোমাব মনে বড় কষ্ট দিয়েচি চোখের জল ফেলিয়েচি। সেই থেকে আমার মন মোটেই ভালো নেই। তুমি ছিলে কোথায় আর আমি ছিলাম কোথায়, এতদিন তোমার নামও জানতাম না। কিন্তু আলাপ হয়ে পর্যন্ত তোমাকে আর পর বলে মনে হয় না। তাই এমন কথা বলে ফেলি যা হয়তো পরকে বলা যায় না। তুমি জজবাবুর মেয়ে বলে তোমায় সবাই সম্মান করে চলবে—কিন্তু আমি ভাবি ও তো মঞ্জু।

মঞ্জু চুপ করিয়া রহিল।

সে কিছুক্ষণ মেন আপন মনে কি ভাবিল। পরে ধীরে ধীরে বলিল—কিছু মনে করিনি নিধুদা, আপনিও কিছু মনে করবেন না। ও কথা আর তুলবেন না।

তাহার কণ্ঠস্বর ঈষৎ বেদনাক্লিষ্ট। অল্পক্ষণ পূর্বের সে হালকা সুর আর তাহার মাথার মধ্যে নাই।

নিধু অল্প কথা পাড়িবার জগ্ৰ জিজ্ঞাসা করিল—তাহলে কি প্রে করার ঠিক করলে এবার ?

মঞ্জু যেন নিধুর প্রশ্ন শুনিতে পাইল না—সে অগ্ৰমনস্ক হইয়াকি ভাবিতেছে। তাহার পর হঠাৎ নিধুর মুখের দিকে ব্যথাম্মান ডাগর চোখের পূর্ণ দৃষ্টিতে চাহিয়া বলিল—নিধুদা, আমার কথা বিশ্বাস করবেন ?

—কি, বল ?


—আপনার জগ্ৰে আমার মন কেমন করে, আপনি এখান থেকে চলে গেলেই—

নিধু কি একটা বলিতে যাইতেছিল, মঞ্জু বাধা দিয়া বলিল—আরও জানেন, দু-শনিবার আপনি আসেননি, ভেবেছিলুম আপনাকে চিঠি লিখে দিই আসবার জগ্ৰে—কিন্তু বাড়ির কেউ সেটা পছন্দ করত না বলে কিছু করিনি—

—আমার সৌভাগ্য মঞ্জু—কিন্তু সেই জগ্ৰেই মনে হয় আর তোমার সঙ্গে মেশা উচিত নয় আমার—

—কিছু ভাববেন না, নিধুদা। আমি ছেলেমানুষ নই—কষ্ট করতে পারব জীবনে। ও জিনিস কষ্টের জগ্ৰেই হয়। আপনি আশীর্বাদ করবেন যেন সঙ্ক করতে পারি—

নিধুর মুখ দিয়া কথা বাহির হইল না। তেঁতুলগাছে সন্ধ্যার অন্ধকারে বাতুল ডান ঝটাপট করিতেছিল। স্মৃথে আঁধার রাত।



বাড়ি হইতে ফিরিতে নিধুর দেরি হইয়াছিল। বাসায় তালা খুলিতেছে, এমন সময় বিনোদ মুছরী আসিয়া বলিল—বাবু, এত দেরি করে ফেললেন ? প্রায় দশটা বাজে—কেস আছে—

—মক্কেল কোথায়—

—কোর্টের অশথতলায় বসিয়ে রেখেছি—তা আপনি এত বেলা করে ফেলবেন—

—চল যাই। এজাহার করিয়ে দিতে হবে ?

—হ্যাঁ, বাবু। আমি তাহলে যাই—বেহাতি হয়ে যাবে। হরিহর নন্দীর দালাল ঘুরচে। আমি ছুটে দেখতে এলাম আপনি এলেন কিনা বাড়ি থেকে—

—টাকা দেবে ?

—হু-টাকা দেবে কথা হয়েছে—

—তবে তো ভারি মক্কেল ধরেচ দেখছি—হরিহর নন্দী হু-টাকায় এজাহার করবে ?

—বাবু, এক টাকাতেও করবে। আপনি জানেন না—সাধনবাবু আট আনায় করবে। ওই নিরঞ্জন-মোক্তার আট আনায় করবে—আপনার একটু নাম বেরিয়ে গিয়েচে—তাই। আমি যাই বাবু, সামলাই গিয়ে আগে—

পথে নিরঞ্জন-মোক্তারের সঙ্গে দেখা। নিধু বলিল—শুনেচ হে, মক্কেল একে নেই—তার ওপর দালালে বোধ হয় ভাঙিয়ে নেয়—তাই ছুটছি—

নিরঞ্জন হাসিয়া বলিল—ছুট না হে, বিনোদ যতটা বলেচে অতটা নয়
কেউ কারো মক্কেল ভাঙায় না ওভাবে—

—কি করে জানব—বিনোদ বললে তাই শুনলাম—

—হরিহরবাবু দালাল লাগিয়ে তোমার-আমার দু-টাকার মক্কেল ভাঙিয়ে
নেবেন—সে লোক তিনি নন। ছুট না, হোঁচট খেয়ে পড়ে যাবে—আন্তে
আন্তে চল—

—না ভাই, বিশ্বাস নেই কিছু। মক্কেল বেহাতি হয়ে গেলে তখন কেউ
দেখবে না—আমি এগুই—

না—মক্কেল ঠিক হাতেই আছে, বিনোদ দাত বাহির করিয়া আসিয়া
জানাইল। নিরঞ্জন অল্পক্ষণ পরে কোর্টের প্রাঙ্গনে পৌঁছিয়া বলিল—কি
হে ইঁপাচ্চ যে! মক্কেল পেলেন?

—হ্যাঁ ভাই—

—ওসব মুহুরীদের চালাকি। কোথায় যাবে মক্কেল? মুহুরীরা কাজ
দেখাচ্ছে তোমার কাছে। নিজের বাহাদুরি করবার স্বযোগ কি
কেউ ছাড়ে?

সাধন-মোক্কার দূর হইতে নিধুকে দেখিতে পাইয়া বলিলেন—ও নিধিরাম,
বাড়ি থেকে এলে কখন? ভালো সব? শোনো—

—কি বলুন সাধনবাবু—

—ওহে ইন্টারভিউ-লিস্টে তোমার নাম উঠেচে দেখলাম যে! কে নাম
দিলে হে?

—তা তো জানিনে? তবে আমার মনে হয় সাবডেপুটিবাবু—উনিই এস,
ডি, ও'কে বলে করিয়েছেন—

—বেশ, বেশ—দেখে খুশি হলাম—

বেলা তিনটার সময় নিরঞ্জন গোপনে নিধুকে বলিল—একটা কথা আছে,

বেকুব্বার সময় আমার সঙ্গে একা যাবে। জরুরী কথা। কাউকে সঙ্গে নিও না—

—কি এমন জরুরী কথা হে ?

—এখন বলব না। কে শুনে ফেলবে—

আরও আধঘণ্টা পরে দুজনে বাহির হইয়া চলিয়া যাইতেছে—এমন সময় বার-লাইব্রেরীর চাকর ফিরিজি আসিয়া বলিল—বাবু ছুটি তো এসে গেল—হামার বখশিস্ ? এবার পুজোতে নিধিরামবাবুর কাছে ধুতি-উতি নিবো। ফিরিজির বাড়ি ছাপরা জেলায়—আজ প্রায় চল্লিশ বছর রামনগরে আছে—কথাবার্তায় ও চালচলনে যতদূর বাঙালী হওয়া তাহার পক্ষে সম্ভব তাহা সে হইয়াছে। ফিরিজির ছেলে-মেয়েরা বড় বড় হইয়াছে, তাহাদেরও বিবাহ হইয়া ছেলে-মেয়ে হইয়া গিয়াছে ; ফিরিজির বাড়ির ছেলে-মেয়ে ভালো বাংলা বলে।

নিধিরাম বলিল—কেন, এত বড় বাবু থাকতে আমার কাছে কেন রে ?

—আপনিও একদিন বড় হবেন বাবু। বার-লাইব্রিতে আমি আজ তিশ বছর নোকরি করছি, কত বাবু এল, কত বাবু গেল। ওই হরিবাবু নেংটি পিন্‌হে এসেছিল—আজকাল বড় সওয়াল-জবাব করনেওয়ালা। সব দেখুই, আপনারও হোবে নিধিরামবাবু। একটা ধুতি নিব আপনার কাছ থেকে—মেজিস্ট্রেটের সঙ্গে আপনার মোলাকাং হবে শুনলু শনিবারে—

—তুই কোথা থেকে শুনলি রে ফিরিজি ?

—সব কানে আসে, বাবু, সব শুনতে পাই—

ফিরিজি হাসিতে হাসিতে চলিয়া গেল। আর কিছু আগাইয়া নিরঞ্জন বলিল—তোমার সঙ্গে ম্যাজিস্ট্রেটের ইন্টারভিউ আছে শনিবারে। তার জন্তে অনেকে তোমার ওপর বড় চটেচে হে—বিগ ফাইভদের মধ্যেও কেউ কেউ আছেন। ওঁদের অনেকের নাম ইন্টারভিউ লিস্টে নেই—অথচ

তুমি জুনিয়ার মোস্তাব তোমার নাম উঠল—ভয়ানক চটেচে অনেকে—
নিধু বিস্মিত হইয়া বলিল—তাতে আমাব হাত কি হে! তা আমি
কি কবব।

—সবাই বলে, বড্ড হাকিমদের খোশামোদ কবে বেড়াও নাকি। চোখ
টাটিয়েচে অনেকেব। হাকিমে তোমাব কথা বেশি শোনে আজকাল—
এই সব। বিশেষ কবে এই ইণ্টারভিউয়েব ব্যাপাবে তুমি কি কাবো
কাবো নাম দিতে বাবণ করেছিলে? এ সম্বন্ধে কোনো কথা হয়েছিল
তোমাব সুনীলবাবু সঙ্গে?

—আমি। আমাব সঙ্গে পবামর্শ কববেন সাবডেপুটি বাবু। আমি বাবণ
কবেছি নাম দিতে।

—অনেকেব তাই ধাবণা—

—কাব কাব নাম দিতে বাবণ করেচি?

—এই ধব হবিহব নন্দীব নাম নেং, শিববাবু নাম নেই—বড়দের মধ্যে।
আব ছোটদের মধ্যে তো কাবো নাম নেই—এক তুমি ছাড়া।

—তুমি বিশ্বাস কব আমি বাবণ কবেচি?

—আমার কথা ছেড়ে দাও। আমার বিশ্বাস-অবিশ্বাসে কিছু আসবে যাবে
না—কিন্তু বার-লাইব্রেরীব সবাই তোমার ওপর একজোট হলে তোমার
বড্ড অসুবিধা হবে। মক্কেলের কানে মন্ত ঝাড়বে, জামিন পাবে না—
নানাদিক থেকে গোলমাল—

—যত্নকাকাকি এর মধ্যে আছেন নাকি?

নিবঞ্জন জিব কাটিয়া বলিল—আবে রামোঃ—নাঃ। তা ছাড়া তিনি মানী
লোক, তিনি ইণ্টারভিউ লিস্টে প্রথম দিকে আছেন—কোনো ছাঁচড়া
কাজে তিনি নেই।

—আমি এর কিছুই জানিনে ভাই। সুনীলবাবু সেদিন বললেন, আপনার

সঙ্গে ম্যাজিস্ট্রেটের ইন্টারভিউ করিয়ে দেব—আমার ইচ্ছে ছিল না।
উনি হাকিম মাহুয়, অহুরোধ করলেন—কি করি বল। আর আমি দিয়েছি
বারণ করে তাঁকে! নিজের জন্তেই বলিনি, অপরের জন্তে বারণ
করতে গেলাম?

—আমায় বলে কি হবে ভাই? আমি তো চুনো-পুঁটির দলে। কথাটা
কানে গেল তোমাকে বললাম। আমি বলেছি, কারো কাছে যেন বল
না হে—

সন্ধ্যার পরে তাহার বাসায় হঠাৎ সাধন-মোস্তারকে আসিতে দেখিয়া
নিধু একটু আশ্চর্য হইল। সাধন বলিলেন—এই যে বসে আছ নিধিবাম?
বেড়াতে বার হওনি যে?

নিধু বুঝিল ইহা ভূমিকা মাত্র। আসল কথা এখনও বলেন নাই সাধন।
অবশ্য অল্প পরেই তিনি তাহা প্রকাশ করিলেন। ম্যাজিস্ট্রেটের সহিত
তাঁহার ইন্টারভিউ করাইয়া দিতে হইবে নিধিরামের। তাঁহার নামে যেন
একথানা কার্ড আসে।

নিধু অবাক হইয়া গেল। সে সাধনকে যথেষ্ট বুঝাইতে চেষ্টা করিল যে এ
ব্যাপারের মধ্যে সে নাই। এ কি কখনো সম্ভব—সাধনবাবুর মতো প্রবীণ
মোস্তার কি একথা ভাবিতে পারেন যে এস.ডি.ও. তাহার মতো একজন
জুনিয়ার মোস্তারের পরামর্শ লইয়া লিস্ট তৈরি করিবেন? এসব কথা
ভিত্তিহীন। তাহার কোনো হাত নাই, সে জানেও না কিছু। একথা
সাধন কতদূর বিশ্বাস করিলেন তাহা বলা যায় না—বিদায় লইবার সময়
বলিলেন—আর ভালো কথা, ওহে আমি আর একটা অহুরোধ তোমায়
করছি, এই অত্যাচারে এইবার শুভ কাজটা হয়ে যাক—তোমার আশাতে
বাড়িগুড়ু বসে আছে। বাড়িতে এদের তো তোমাকে বড্ড পছন্দ—
আমায় কেবল খোঁচাচ্ছে কোর্ট বন্ধের দিন তোমায় ঘেতেই হবে।

নিধু মনে মনে ভাবিল—বোধ হয় তাহলে বড় ডাল আঁকড়াতে গিয়ে ফসকে গিয়েছে। তাই গরিবের ওপর কুপাদৃষ্টি পড়েছে আবার। মুখে বলিল—আপনার বাড়ি যাব, সে আর বেশি কথা কি—বলব এখন পরে। তবে ইণ্টারভিউর ব্যাপারে আপনি একেবারে সত্যি জেনে রাখুন সাধনবাবু, ধর্মত বলচি, এর বিন্দুবিসর্গের মধ্যে নেই আমি। বিশ্বাস করুন আমার কথা।

সাধন-মোক্তার দাঁত বাহির করিয়া হাসিতে হাসিতে চলিয়া গেলেন।

শুক্রবার রাত্রে সাবভেপুটির চাপরাশি আসিয়া নিধুকে ডাকিয়া লইয়া গেল সকালেই।

সুনীলবাবু বলিলেন—থবর সব ভালো ?

—আজ্ঞে হ্যাঁ—

—লালবিহারীবাবুদের বাড়ির সব—চিঠি দিয়েছিলেন ?

—আজ্ঞে হ্যাঁ।

—কাল শনিবার যেতে পারব না—পরের শনিবারে যাব—আপনিও থাকবেন। এবার বোধ হয়, আপনাকে বলি—

সুনীলবাবু হঠাৎ সলজ্জকণ্ঠে বলিলেন—বাবা, বোধ হয় আসবেন রবিবারে। উনিও মেয়ে দেখতে যাবেন—উনি লিখেচেন—আপনার শরীর অসুস্থ নাকি ?

নিধু আড়ষ্ট স্বরে বলিল—না, এই—আজকাল কাছের চাপ ছুটির আগে, 'তা ছাড়া মাঝে মাঝে ম্যালেরিয়াতে ভুগি—

—একটু গরম চা করে দেবে ? ও আপনি চা খান না, ইয়ে কোকো থাকেন ?

—থাক গে। বরং জল এক গ্লাস—

—হ্যাঁ হ্যাঁ—ওরে বাবুকে এক গ্লাস জল। তারপর শুহুন একটা কথা—


—আজ্ঞে বলুন—

—ভদ্রলোকের কাণ্ড ! কি করি—সাধনবাবু সেদিন এসেছিলেন ওঁর বাড়ি আমাকে নিয়ে যেতৈ মেয়ে দেখতে—তুনেচেন সে কথা ? শোনেননি ?

—না । আপনি গিয়েছিলেন নাকি ?

—যাইনি । আমি ওঁকে খুলে বললুম—কুড়ুলগাছির লালবিহারীবাবুদের সঙ্গে এ নিয়ে কথাবার্তা এগিয়েচে । বোধ হয় সেখানেই—বাবা নিজে আসচেন মেয়ে দেখতে । এ অবস্থায় অগ্রত্ৰ আর—

তাই । নিধু আগেই আন্দাজ করিয়াছিল সাধন-বুড়োর দরদের আসল কারণ । কথাটা নিরঞ্জনকে বলিতে হইবে । ওই একজন সমবয়সী বন্ধু আছে রামনগরে—সুখহুঃখের কথা যাহার কাছে বলিয়া সুখ পাওয়া যায় । যে বুঝিতে পারে, দরদ দিয়া শোনে ।



শনিবার ম্যাজিস্ট্রেটের সহিত ইণ্টারভিউ পর্ব বেলা দেড়টার মধ্যে মিটিয়া গেল। মহকুমাব অনেক বিশিষ্ট লোক উপস্থিত। ভিড়ও খুব। এ যে সময়ের কথা বলা হইতেছে—তৎকালে ম্যাজিস্ট্রেটের সঙ্গে করমর্দন করা সুখবিবল ও যশবিবল পৃথিবীর একটা প্রধান সুখ, একটা প্রধান সম্মান। ম্যাজিস্ট্রেট আহেলা বিলাতী আই.সি.এস.। নাম রবিনসন—লম্বা বলিষ্ঠ চেহারা। চেহারা দিকে কিছুক্ষণ চাহিয়া থাকিতে ইচ্ছা করে।

এস.ডি.ও. হাসিয়া নিধুকে আগাইয়া দিয়া বলিলেন—বাবু, নিধিরাম চৌধুরী—মুকুটিঘাব—

ঠিক পূর্বে সবিসা গিয়াছেন লোকের বোর্ডের মেম্বর শশিপদ বাবু। সাহেব সহাস্রবদনে হাত বাড়াইয়া দিয়া বলিলেন—গুড্, আফটারনুন, বাবু, সো ম্যাড্ টু মিট ইউ—

নিধু ঘামিয়া উঠিয়াছে। সে হাত বাড়াইয়া ম্যাজিস্ট্রেটের হাতে দিবার সঙ্গে সঙ্গে মাথা নিচু করিয়া সেলাম ঠুকিল। মুখে বলিল—গুড্, আফটারনুন, স্যার—ইয়ের অনার—

ম্যাজিস্ট্রেট তাহার দিকে চাহিয়া ভদ্রতা-সূচক হাসিলেন। ইণ্টারভিউ শেষ হইয়া গেল।

আজ আর কাজকর্ম নাই।

ডাক-বাংলা হইতে বাসায় আসিবার পথে নিধু ভাবিয়া ঠিক করিল আজ সে কুড়লগাছি যাইবে। যদিও বলিয়া আসিয়াছিল যাইবে না, কিন্তু যখন সকালে সকালে কাজ মিটিয়া গেল—তখন আজই এখনি বাতির হইয়া

পড়িতে হইবে। সামনের শনিবারে বরং যাইবে না বাড়ি—স্বনীলবাবু এবং তাঁহার বাবা যেদিন মেয়ে দেখিতে যাইবেন—সেদিন তাহার না থাকিলেও কোনো পক্ষের কোনো ক্ষতি নাই।

আজ শরীরটা কিন্তু সকাল হইতেই ভালো নয়। জরজ্বাডি হইতে পারে। সারা গায়ে যেন বেদনা। তবুও বাড়ি আজ তাহার যাওয়া চাই। আজ মঞ্জুকে সে পাইবে পুরোনো দিনের মতো। বাড়িতে ভাবী আত্মীয় কুটুম্বেরা ভিড় করিবে না আজ।

শরতের রোদ্র নীল আকাশের পেয়লা বাহিয়া উপচাইয়া পড়িতেছে। পথের ধারে ছায়া ঝোপে সেই দিনের মতো মটরলতার তুলুনি। ছোট গোয়ালে-লতায় ফুল ধরিয়াছে। শালিক ও ছাতারে পাখির কলরব মাথার উপরে।

পথে হাঁটিতে আরম্ভ করিয়াই নিধু দেখিল তাহার শরীর যেন ক্রমশ খারাপ হইয়া আসিতেছে। শরতের ছায়াভরা বাতাস গায়ে লাগিলে যেন গা শিরশির করে। নিধু মাঝে মাঝে কেবলই বসিতে লাগিল—এ সাঁকোয় বসে, আবার ও সাঁকোয় বসে। সাঁকোর নিচেই গত বর্ষার বন্ধ জল, অল্প সময় তাহার যে একটা গন্ধ আছে—ইহাই নিধুর নাকে লাগিত না—আজ গন্ধটায় তাহার শরীরের মধ্যে যেন পাক দিতেছিল। সাঁকোয় বসিয়া অগ্নমনস্কভাবে বাঁশবনের মাথার উপরে মেঘমুক্ত নীল আকাশে শরতের শুভ্র মেঘের খেলা লক্ষ্য করিতেছিল। মেঘের দল লঘুগতিতে উড়িয়া চলিতে চলিতে কত কি জিনিস তৈরি করিতেছে—কখনো দুর্গ, কখনো পাহাড়, কখনো সিংহ, কখনো বহুদূরের কোন অজানা দেশ—উপরের বায়ুশোত আবার পর-মুহূর্তে সেগুলোকে চূর্ণ করিয়া উড়াইয়া দিতেছে—এই আছে, এই নাই—আবার নব নব শুভ্র মেঘগজ্জা, আবার কল্পনায় কত কি নতুনের সৃষ্টি। ভঙ্গুর মেঘের সৃষ্টি—সে আবার টেকে কতক্ষণ?

কে একজন ডাকিয়া বলিল—বাবু, আপনি এখানে শুয়ে আছেন সাকোর ওপর ? কনে যাবেন ?

পথে চলতি চাষা লোক ? নিধু বলিল—যাব কুড়ুলগাছি। জর এসেচে তাই একটু শুয়ে আছি—

—আমি আপনারে সঙ্গে করে নিয়ে যাবামু, উঠুন আপনি—কতক্ষণ শুয়ে থাকবেন ?

—না বাপু। আমি একটু জিরিয়ে নিলেই আবার ঠিক হাঁটব—তুমি যাও—

লোকটা চলিয়া গেল—কিন্তু যাইবার সময় বার বার পিছনে তাহার দিকে চাহিতে চাহিতে গেল। লোকটা ভালো। শরীর ভালো না থাকিলে কিছুই ভালো লাগে না। ম্যাজিস্ট্রেটের সঙ্গে ইন্টারভিউ হইল—কোথায় মন বেশ খুশি হইবে, গাঁয়ে গিয়া গল্প করিবার মতো। একটা জিনিস হইল—তা না সে যেন মনে কোনো দাগই দেয় নাই। কিন্তু এই জরের ঘোরে মঞ্জু যেন কোন অপার্থিব দেশের দেবী হইয়া তাহার সম্মুখে আসিতেছে। মঞ্জুদের একদিন খাওয়ানো হইল না—পয়সা জমে না হাতে তা কি করা যায় ? সামনেব শনিবারে তো বাড়ি যাইবে না—পরের শনিবারে হইবে। আচ্ছা, বার-লাইবেরীর সকলে কি তাহাকে বয়কট করিবে ? যদি করে সে তো নিরুপায়। তাহার কোনো দোষ নাই, আর কেউ না জানে, সে তো জানে ? সে স্বেচ্ছায় কাহারো অনিষ্ট করিতে যাইবে না।

অতি কষ্টে আরও কয়েক মাইল পথ সে অতিক্রম করিল।

পথ তাহাকে যে করিয়াই হোক, অতিক্রম করিতেই হইবে। এই দীর্ঘ, ক্লান্ত পথের ওপ্রান্তে হাশ্রমুখী মঞ্জু যেন কোথায় তাহার জ্ঞাত অপেক্ষা করিয়া আছে। আজ না গেলে আর তাহার সহিত যেন দেখাই হইবে না। দুদিনের জ্ঞাত আসিয়াছিল—আবার বহু, বহু দূরে চলিয়া যাইবে।

সন্ধ্যার আর দেরি নাই। ওই সন্দেশপুর—সেই মোলবীসাহেবের পাঠশালা
সন্দেশপুর বাঁওড়ের ধারে। বাঁওড়ের বর্ষার জল রাস্তার কিনারা ছুঁইয়াছে—
ওদিকে গাছের গুঁড়ির সাকোর উপর দিয়া ধান বোঝাই মহিষের গাড়ি
পার হইতেছে।

আর এইটুকু গেলেই তাহাদের গ্রাম। সন্ধ্যার শাঁখ বাজিবার সঙ্গে সঙ্গেই
গ্রামের পথে সে পা দিবে।

অমনি মা আগাইয়া আসিয়া বলিবে—এই যে নিধু এলি বাবা! বলেছিলি
আজ যে আসবিনে ?

হয়তো সে বাড়ি পৌঁছলে একথা তাহার মা তাহাকে বলিয়াও থাকিবেন—
কিন্তু আচ্ছন্ন ঘোর ঘোর ভাবে সন্ধ্যার অন্ধকারে যখন সে বাড়ি ঢুকিয়াছিল
টলিতে টলিতে—কখন বাড়ির লোকে তাহাকে ধরিয়া লইয়া গিয়া বিছানায়
'শোয়াইয়া দিয়াছিল—এ সকল কথা তাহার মনে নাই।

দুইমাস রোগেব ঘোরে কখনও চেতন, কখনও অচেতন বা অর্ধচেতন ভাবে
কাটিবার পর নিধুর জীবনের আশা হইল। ক্রমে সে বিছানার উপর
উঠিয়া বসিতে পারিল। ডাক্তারে বলিয়া গিয়াছে আর ভয় নাই।

নিধুর মা পুত্রের সেবা করিতে করিতে রোগা হইয়া পড়িয়াছেন। সে
চেহারা আর নাই মায়ের।

নিধুর সামনে সাবুর বাটি রাখিয়া বলিলেন—আঃ বাবা, রামনগর থেকে
শশধরবাবু ডাক্তার পর্যন্ত এসেছিলেন দুদিন—


নিধু ক্ষীণ স্বরে বলিল—শশধরবাবু! সে তো অনেক টাকার ব্যাপার!

—টাকা কি লেগেছে আমাদের? আহা, আর জন্মে পেটের মেয়েছিল ওই
মঞ্জু—দিন রাতের মধ্যে যে কতবার আসত, বসে থাকত—সেই তো সব
যোগাড়-যন্ত্র করে দিলে জজবাবুকে বলে—জজবাবুও হামেসা আসতেন—
গায়ের সবাই আসত—যেত। সেদিনও জজগিম্মি বলে গেলেন—টাকা খরচ
১৭৪

সার্থক হয়েছে, প্রাণ পাওয়া গেল এই বড় কথা। মিথ্যে কথা বলব কেন, সবাই দেখেচে শুনেচে, করেছে। ভুবন গাঙ্গুলির মেয়ে হৈম পর্যন্ত খুশুর-বাড়ি যাওয়ার আগে রোজ একবার করে আসত—মা সিঁদেখরী কালী মুখ তুলে চেয়েচেন—সকলে তো বলেছিল এই বয়েসের টাইফয়েড—মঞ্জু! অনেক দিন পরে নিধুর রোগক্ষীণ স্মৃতিপটে একখানি আনন্দময়ী বালিকামূর্তি অম্পট ভাসিয়া উঠিল। অনেক দিন এ নাম কানে যায় নাই। কঠিন রোগ তাহাকে মৃত্যুর যে ঘনাক্ষার রহস্যের পথে বহুদূর টানিয়া লইয়া গিয়াছিল—হয়তো সে পথের কোথাও কোনোদিন চেতনাহীন মূর্ত্তে সে একটি বালিকা-কণ্ঠের সহায়ভূতি মাথা উৎসুক স্বর শুনিয়া থাকিবে—হয়তো তাহার দয়ালু হস্তের মুহূ পরশ অঙ্গে লাগিয়া থাকিবে—নিধু তাহা চিনিতে পারে নাই—ধারণাও করিতে পারে নাই।

সে কিছু বলিবার আগেই তাহাব মা বলিলেন—ও শনিবারে যাবার দিনটাতেও মঞ্জু এসে কতক্ষণ বসে রইল—বললে বাবার ছুটি ফুরিয়ে গেল তাই যেতে হচ্ছে জ্যাঠাইমা—নইলে নিধুদাকে এ ভাবে দেখে যেতে কি মন সরে। বাবার কোট খুলবে জগদ্ধাত্রী পূজোর পরে—আর থাকবার ঘো নেই। চোখের জল ফেললে সেদিন বাছা আমার! একেবারে যেন আমার পেটের মেয়ে—বললাম যে। অমন মেয়ে কি হয় আজকালকার বাজারে! তাই তো বলি—

মায়ের বাকি কথা নিধুর কাণে গেল না।



আরও দিন পনরো কাটিয়া গিয়াছে।

নিধু এখন লাঠি ধরিয়া সকালে-বিকালে একটু করিয়া বাড়ির কাছের পথে বেড়ায়।

মঞ্জুদের বাড়ি তালাবন্ধ। কেহ কোথাও নাই।

আগেও তো কেহ ছিল না এ বাড়িতে, কখনো কেহ থাকিত না—
এখনো কেহ নাই—ইহাতে নতুন কি আছে?

এই শেষ হেমস্তের ঈষৎ শীতল অপরাহ্নগুলিতে আগে-আগে ঘন ছোট গোয়ালে-লতার জঙ্গলে জঙ্গবাবুদের বাড়ি ব সদর-দরজা ঢাকিয়া থাকিত—সে আবাল্য দেখিয়া আসিয়াছে—বছবের পর বছর কাটিবার সঙ্গে সঙ্গে সে বন আবার গজাইবে। মধ্যে যে আসিয়াছিল, সে তো হুদিনের স্বপ্ন।

ছহুজ্জলে মাছের ডাল। মাথায় করিয়া চলিয়াছে। তাহাকে দেখিয়া বলিল—
—এই যে দাদাঠাকুর, আজকাল একটু বল পাচ্ছেন?

—হ্যাঁ ছহু—ডাক্তার বলেচে একটু বেড়াতে সকাল-বিকেল—

—তা যান, বেলা গিয়েচে—আর ঠাণ্ডা লাগাবেন না—কার্তিকে হিম—
আপনার তো পুহুরজ্জয় গেল এবার—

—কপালে ভোগ থাকলে—

—তাই দাদাঠাকুর তাই। কপালেই সব। এমন পুজোডা গেল জঙ্গবাবুদের বাড়ি—কি খাওয়ান-দাওয়ান—আমাদের এন্তক হেল ঢেল—জঙ্গবাবু
১৭৬

নিজে সামনে পাড়িয়ে—ছয়, ভালো করে গাও বাবা, যা ভালো লাগে
মুখে চেয়ে নিও—অমন মানুষ আর হয় না।

নিধু বাড়িব দিকে ফিরিবার আগে কেহ কোনোটিকে নাই দেখিয়া বন্ধ
দরজার ফাঁক দিয়া জজবাবুর বাড়ির মধ্যে একবার উঁকি দিয়া দেখিবার
চেষ্টা করিল।

ভালো দেখা গেল না। হেমন্ত সন্ধ্যার অন্ধকার ঘনাইয়া আসিয়াছে
গাছপালায়।



